

ओं नमः परमात्मने, श्री महागणपतये नमः,

श्री गुरुभ्यो नमः

हरिः ओं

कृष्ण यजुर्वेदीय तैत्तिरीय संहिता

सप्तमं काण्डं

Note: Please refer to the book, TS Kandam 1 for notes and conventions used in this Compilation.

Contents

7 कृष्ण यजुर्वेदीय तैत्तिरीय संहितायां सप्तमं काण्डं	4
7.1 सप्तमकाण्डे प्रथमः प्रश्नः– अश्वमेधगतमन्त्राणामभिधानं.....	4
7.1.1 Appendix	29
7.2 सप्तमकाण्डे द्वितीयः प्रश्नः – षड् रात्राद्यानां निरूपणं	30
7.3 सप्तमकाण्डे तृतीयः प्रश्नः – सत्रजातनिरूपणं	53
7.4 सप्तमकाण्डे चतुर्थः प्रश्नः – सत्रकर्मनिरूपणं	76
7.4.1 Appendix.....	104
7.5 सप्तमकाण्डे पञ्चमः प्रश्नः – सत्रविशेषाभिधानं.....	105

Version Notes

1st Version Number 0.0 dated 31 November 2019

2nd and Current Version Number 1.0 dated 31st March 2020

1. This Version replaces earlier version “0.0” dated 31st Nov 2019.
2. We have made general corrections in this version.

ओं नमः परमात्मने, श्री महागणपतये नमः,

श्री गुरुभ्यो नमः, हरिः ओं

7 कृष्ण यजुर्वेदीय तैत्तिरीय संहितायां सप्तमं काण्डं

7.1 सप्तमकाण्डे प्रथमः प्रश्नः- अश्वमेधगतमन्त्राणामभिधानं

TS 7.1.1.1

प्र॒जन॑नं॒ ज्योति॑र॒ग्नि-दे॒वता॑नां॒ ज्योति॑र्वि॒राट् छ॒न्दसां॒ ज्योति॑र्वि॒राड्
वा॒चो॑ऽग्नौ॒ सं ति॑ष्ठते वि॒राज॑म॒भि संप॑द्यते तस्मात् तज्ज्योतिरुच्यते
द्वौ स्तोमौ॑ प्रा॒तस्स॑वनं॒ वह॑तो॒ यथा॑ प्रा॒णश्चा॑ऽपानश्च॒ द्वौ मा॑द्ध्यंदि॒नञ्
स॑वनं॒ यथा॑ चक्षुश्च॒ श्रोत्रं॑ च॒ द्वौ तृ॑तीयस॑वनं॒ यथा॑ वाक् च॒ प्रति॑ष्ठा
च॒ पु॒रुष॑संमि॒तो वा॒ एष॑ य॒ज्ञोऽस्थू॑रि - [] 1

TS 7.1.1.2

र्यं॑ का॒मं का॒मय॑ते तमे॒तेना॒भ्यश्नु॑ते॒ सर्व॑ ह्य॒स्थू॒रिणा॑ऽभ्यश्नु॑ते
ऽग्नि॑ष्टोमे॒न वै प्र॒जाप॑तिः॒ प्रजा॑ अ॒सृज॑त॒ ता अ॑ग्नि॒ष्टोमे॒नैव
पर्य॑गृह्णात् तासां॒ परि॑गृही॒ताना॑-म॒श्वत॑रोऽत्य॒प्रव॑त
तस्या॑नु॒हाय॑रेत॒ आऽद॑त्त॒ तद्-ग॑र्द॒भे न्य॑मा॒र्त् तस्मा॑द्-ग॒र्दभो॑ द्वि॒रेता॒

अथो आहुर्वडबायां न्यमार्डिति तस्माद्-वडबा द्विरेता अथो

आहुरोषधीषु - [] 2

TS 7.1.1.3

न्यमार्डिति तस्मादोषधयो ऽनभ्यक्ता रेभन्त्यथो आहुः प्रजासु न्यमार्डिति
तस्माद्-यमौ जायेते तस्मादश्चतरो न प्र जायत आत्तरेता हि तस्माद्
बर्हिष्यनवक्लृप्तः सर्ववेदसे वा सहस्रे वाऽव क्लृप्तोऽति ह्यप्रवत
य एवं विद्वानग्निष्टोमेन यजते प्राजाताः प्रजा जनयति परि प्रजाता
गृह्णाति तस्मादाहुर्ज्येष्ठयज्ञ इति - [] 3

TS 7.1.1.4

प्रजापतिर्वाव ज्येष्ठः स ह्येतेनाग्रेऽयजत प्रजापतिरकामयत
प्र जायेयेति स मुखतस्त्रिवृतं निरमिमीत तमग्निर्देवता ऽन्वसृज्यत
गायत्री छन्दो रथन्तरं साम ब्राह्मणो मनुष्याणामजः पशूनां तस्मात्
ते मुख्या मुखतो ह्यसृज्यन्तोरसो बाहुभ्यां पञ्चदशं निरमिमीत
तमिन्द्रो देवताऽन्वसृज्यत त्रिष्टुप् छन्दो बृहथ् - [] 4

TS 7.1.1.5

साम॑ राज॒न्यो म॒नु॒ष्या॒णाम॒विः प॒शूनां॑ तस्मात् ते वी॒र्या॑वन्तो
 वी॒र्या॑द्ध्य॒सृज्यन्त॑ म॒द्ध्यतः॑ स॒प्तद॒शं नि॒रमि॑मीत तं वि॒श्वे दे॒वा दे॒वता॑
 अ॒न्व॒सृज्यन्त॑ जगती॒ छन्दो॑ वै रू॒पꣳ साम॑ वै॒र्यो म॒नु॒ष्या॒णां गावः॑
 प॒शूनां॑ तस्मात् त आ॒द्या अ॒न्न॒धाना॒द्ध्य सृज्यन्त॑ तस्माद्-
 भूयाꣳसोऽन्ये॒भ्यो भूयि॑ष्ठा हि दे॒वता॑ अ॒न्व॒सृज्यन्त॑ प॒त्त एक॑विꣳ
 शं नि॒रमि॑मीत तम॒नु॒ष्टुप् छन्दो॑ - [] 5

TS 7.1.1.6

ऽन्व॒सृज्यत॑ वैराजꣳ साम॑ शू॒द्रो म॒नु॒ष्या॒णाम॒श्वः प॒शूनां॑ तस्मात् तौ
 भू॒तसं॑ क्रा॒मिणा॒वश्च॑ शू॒द्रश्च॑ तस्माच्छू॒द्रो य॒ज्ञेऽन॑वक्लृ॒प्तो न हि
 दे॒वता॑ अ॒न्व॒सृज्यत॑ तस्मात् पा॒दावु॑प जी॒वतः॑ प॒त्तो ह्य॒सृज्ये॑तां प्रा॒णा
 वै त्रि॒वृ॒द॒र्धमा॒साः पञ्च॑द॒शः प्र॒जाप॑तिः स॒प्तद॒शस्त्रय॑ इ॒मे लो॒का
 अ॒सावा॑दित्य॒ एक॑विꣳश ए॒तस्मिन्॑ वा ए॒ते श्रि॒ता ए॒तस्मिन्॑ प्र॒तिष्ठि॑ता
 () य ए॒वं वे॒दैतस्मिन्ने॒व श्रय॑त ए॒तस्मिन्॑ प्र॒ति तिष्ठ॑ति ॥ 6

(अ॒स्थू॒रि - रोष॑धीषु - ज्येष्ठ॒यज्ञ॑ इति - बृ॒ह - द॒नु॒ष्टुप् छन्दः॑ -
 प्र॒तिष्ठि॑ता - नव॑ च) (A1)

TS 7.1.2.1

प्रा॒तस्स॒वने॑ वै गा॒य॒त्रेण॑ छ॒न्दसा॑ त्रि॒वृते॑ स्तो॒माय॑ ज्योति॒र्दध॑देति त्रि॒वृता॑ ॥
 ब्र॒ह्मव॑र्च॒सेन॑ पञ्च॒दशाय॑ ज्योति॒र्दध॑देति पञ्च॒दशे॑नौजसा वी॒र्ये॑ण
 सप्त॒दशाय॑ ज्योति॒र्दध॑देति सप्त॒दशे॑न प्राजाप॒त्येन॑ प्र॒जन॑नेनैकवि॒ंशाय॑
 ज्योति॒र्दध॑देति स्तोम॑ ए॒व तथ् स्तो॒माय॑ ज्योति॒र्दध॑देत्यथो स्तोम॑ ए॒व
 स्तोम॑म॒भि प्र॑ णयति याव॑न्तो वै स्तोमा॒स्ताव॑न्तः कामा॒स्ताव॑न्तो लो॒का
 () -स्ता॑वन्ति ज्योती॒ष्येता॑वत ए॒व स्तोमा॑नेतावतः कामा॑नेतावतो
 लो॒काने॑तावन्ति ज्योती॒ष्यव॑ रुन्धे ॥ 7

(ता॑वन्तो लो॒का - स्त्रयो॑दश च) (A2)

TS 7.1.3.1

ब्र॒ह्मवा॑दिनो॒ वद॑न्ति स त्वै यजे॑त योऽग्नि॒ष्टोमे॑न यज॑मानोऽथ
 सर्व॑स्तोमे॒न यजे॑तेति॒ यस्य॑ त्रि॒वृत॑मन्तर्यन्ति प्रा॒णाऽ-स्त॑स्यान्तर्यन्ति
 प्रा॒णेषु॑ मेऽप्य॒सदि॑ति खलु॒ वै य॒ज्ञेन॑ यज॑मानो यज॑ते यस्य
 पञ्च॒दश॑मन्तर्यन्ति वी॒र्यं॑ तस्यान्तर्यन्ति वी॒र्यं॑ मेऽप्य॒सदि॑ति खलु॒ वै
 य॒ज्ञेन॑ यज॑मानो यज॑ते यस्य॑ सप्त॒दश॑-मन्तर्यन्ति - [] 8

TS 7.1.3.2

प्र॒जां तस्या॒न्तर्य॑न्ति प्र॒जायां॑ मे॒ऽप्यस॒दिति॑ ख॒लु वै य॒ज्ञेन॑ यज॒मानो॑
यज॒ते यस्यै॑कवि॒ंशम॑न्तर्य॑न्ति प्र॒तिष्ठां॑ तस्या॒न्तर्य॑न्ति प्र॒तिष्ठायां॑
मे॒ऽप्यस॒दिति॑ ख॒लु वै य॒ज्ञेन॑ यज॒मानो॑ यज॒ते यस्य॑
त्रि॒णव॑मन्तर्य॑न्त्य॒तूँश्च॑ तस्य॑ नक्ष॒त्रियां॑ च वि॒राज॑मन्तर्य॑न्त्य॒तुषु॑
मे॒ऽप्यस॒न्नक्ष॑त्रियायां च वि॒राजी॑ति - [] 9

TS 7.1.3.3

ख॒लु वै य॒ज्ञेन॑ यज॒मानो॑ यज॒ते यस्य॑ त्रयस्त्रि॒ंशम॑न्तर्य॑न्ति
दे॒वता॑स्तस्या॒न्तर्य॑न्ति दे॒वता॑सु मे॒ऽप्यस॒दिति॑ ख॒लु वै य॒ज्ञेन॑ यज॒मानो॑
यज॒ते यो वै॑ स्तो॒माना॑मव॒मं प॒रम॑तां गच्छ॒न्तं वे॒द प॒रम॑तामे॒व गच्छ॑ति
त्रि॒वृद्वै॑ स्तो॒माना॑मव॒मस्त्रि॒वृत् प॒रमो॑ य ए॒वं वे॒द प॒रम॑तामे॒व
गच्छ॑ति ॥ 10

(स॒प्तद॒शम॑न्तर्य॑न्ति - वि॒राजी॑ति - च॒तुश्च॑त्वारि॒ंशच्च॑) (A3)

TS 7.1.4.1

अ॒ङ्गिर॑सो वै स॒न्नमा॑सत॒ ते सु॒वर्गं॑ लो॒कमा॑यन् तेषाँ ह॒विष्माँश्च॑
ह॒विष्कृ॑च्चा॒ऽहीये॑तां ताव॑का॒मये॑ताँ सु॒वर्गं॑ लो॒कमि॑यावेति॒ तावे॑तं

द्विरा॒त्रम॑पश्य॒तां तमा॑ऽहर॒तां तेना॑यजे॒तां ततो॑ वै तौ सु॒वर्गं॑ लो॒कमै॑तां
 य॑ ए॒वं वि॒द्वान् द्विरा॒त्रेण॑ यज॒ते सु॒वर्गमे॒व लो॒कमे॑ति तावै॒तां
 पूर्वे॑णा॒ह्ना ऽगच्छ॑तामु॒त्तरे॑णा – [] 11

TS 7.1.4.2

–भि॒प्लवः॑ पूर्॒वम॑ह॒र्भव॑ति गतिरु॒त्तरं॑ ज्योति॒ष्टोमो॑ऽग्नि॒ष्टोमः॑ पूर्॒वम॑ह॒र्भव॑ति
 तेज॒स्तेना॑व रु॒न्धे सर्व॑स्तोमोऽतिरा॒त्र उत्तर॑ꣳ सर्व॒स्याऽऽ*प॒त्यै
 सर्व॒स्याऽवरु॑द्ध्यै गा॒यत्रं॑ पूर्वे॑ऽह॒न्त्साम॑ भव॒ति तेजो॑ वै गा॒यत्री गा॒यत्री
 ब्र॒ह्मव॑र्चसं तेज ए॒व ब्र॒ह्मव॑र्चसमा॒त्मन् ध॑त्ते त्रै॒ष्टुभ॑मु॒त्तर॑ ओजो॒ वै वी॒र्यं॑
 त्रि॒ष्टुगो॑ज ए॒व वी॒र्यमा॒त्मन् ध॑त्ते रथं॒तरं पूर्वे॑ – [] 12

TS 7.1.4.3

ऽह॒न्त्साम॑ भव॒तीयं॑ वै रथ॒न्तर॑मस्यामे॒व प्रति॑ तिष्ठति बृ॒हदु॒त्तरे॑ऽसौ वै
 बृ॒हद॒मुष्या॑मे॒व प्रति॑ तिष्ठति तदाहुः॒ क्व जग॑ती चाऽनु॒ष्टुप् चेति॑
 वैखान॑सं पूर्वे॑ऽह॒न्त्साम॑ भव॒ति तेन॑ जग॒त्यै नैति॑ षोड॒श्युत्तरे॑
 तेना॑नु॒ष्टुभो॑ऽथा ऽऽ*हु॒र्यथ्॑ समा॒नैर्द॒र्धमा॑से स्याता॒मन्य॑तरस्याहो
 वी॒र्यम॑नु () पद्ये॒तेत्य॑–मावा॒स्यायां॑ पूर्॒वम॑ह–र्भव॒त्युत्तर॑स्मि–न्नु॒त्तरं॑

नानै॒वा ऽ॒र्ध॒मा॒स॒यो॒र्भ॒वतो॑ नाना॒वीर्ये॑ भवतो ह॒विष्म॒न्नि॒धनं॑
पूर्व॒मह॑र्भवति ह॒विष्कृ॒न्नि॒धन॑-मु॒त्तरं॑ प्रति॒ष्ठित्यै॑ ॥ 13

(उ॒त्तरे॑ण - रथ॒न्तरं॑ पूर्वे - ऽ॒न्वे - क॒वि॒श्रुति॑श्च) (A4)

TS 7.1.5.1

आपो॑ वा इ॒दम॒ग्रे स॒लिल॑मासीत् तस्मिन् प्र॒जाप॑ति-वा॒युर्भू॒त्वा ऽच॑रत्
स इ॒माम॑पश्यत् तां व॒राहो॑ भू॒त्वाऽह॑रत् तां वि॒श्वकर्मा॑ भू॒त्वा व्य॑मा॒दृत्
साऽप्र॑थत् सा पृ॒थिव्य॑भवत् तत् पृ॒थिव्यै॑ पृ॒थिवि॒त्वं तस्या॑मश्राम्यत्
प्र॒जाप॑तिः स दे॒वान॑सृजत् वसून् रु॒द्राना॑दि॒त्यान् ते दे॒वाः
प्र॒जाप॑तिमब्रुवन् प्र॒जायाम॑हा इति सोऽब्र॑वीद् - [] 14

TS 7.1.5.2

-यथाऽहं यु॒ष्मा॒स्तप॑सा ऽसृ॒क्ष्ये॒वं तप॑सि प्र॒जन॑न-मिच्छ॒द्ध्वमि॒ति
तेभ्यो॑ऽग्निमा॒यत॑नं प्रा॒प्यच्छ॑दे॒तेना॒ऽऽ*य॑तनेन श्राम्यतेति
तैऽग्नि॑नाऽऽ*य॑तनेनाऽ-श्राम्यन् ते सँव॑त्सर ए॒कां गा॑मसृजन्त तां
व॒सुभ्यो॑ रु॒द्रेभ्य॑ आ॒दित्ये॑भ्यः प्रा॒प्यच्छ॑न्नेताँ रक्ष॒द्ध्वमि॒ति तां
व॒सवो॑ रु॒द्रा आ॒दित्या॑ अरक्षन्त सा व॒सुभ्यो॑ रु॒द्रेभ्य॑ आ॒दित्ये॑भ्यः
प्रा॒जाय॑त त्रीणि च - [] 15

TS 7.1.5.3

श॒तानि॑ त्रयस्त्रिं॑शतं॒ चाथ॑ सैव॒ सहस्र॑तम्य॒भवत्॑ ते दे॒वाः
 प्र॒जाप॑तिमब्रुवन्थ॒ सहस्र॑ण॒ नो या॑जयेति॒ सोऽग्नि॑ष्टोमे॒न वसू॑नयाजयत्
 त इ॒मं लो॒कम॑जयन् तच्चाददुः स उ॒क्थ्ये॑न रु॒द्रान॑याजयत्
 तेऽन्तरि॑क्षमजयन् तच्चाददुः सोऽति॑रात्रेणाऽऽ*दि॒त्यान॑याजयत् तेऽमुं
 लो॒कम॑जयन् तच्चाददुः -स्तदन्तरि॑क्षं - [] 16

TS 7.1.5.4

व्यवै॑र्यत॒ तस्मा॑द्-रु॒द्रा घा॑तु॒का अ॑नायत॒ना हि तस्मा॑दाहुः शिथि॒लं वै
 म॒द्ध्य॑म-महस्त्रि॒रात्र॑स्य॒ वि हि तद॑वैर्यतेति॒ त्रैष्टु॑भं म॒द्ध्य॑मस्याह
 आ॒ज्यं भ॑वति स॒याना॑नि सू॒क्तानि॑ श॒सति॑ षोड॒शिन॑ श॒सत्य॑हो
 धृ॒त्या अ॑शिथिलंभावाय॒ तस्मा॑त् त्रि॒रात्र॑स्याग्नि॒ष्टोम॑ ए॒व प्र॑थ॒मम॑हः
 स्यादथो॒क्थ्यो ऽथाऽति॑रात्र ए॒षां लो॒कानां॑ वि॒धृत्यै॑ त्रीणि॒त्रीणि॑
 श॒ता-न्य॑नूची॒नाह॑-मव्यवच्छिन्नानि ददा - [] 17

TS 7.1.5.5

-त्येषां॑ लो॒काना॑मनु सन्तत्यै द॒शतं॑ न विच्छि॒न्धाद्-वि॒राजं॑
 नेद्विच्छि॒नदानी॑त्यथ॒ या सह॑स्रतम्यासीत् तस्यामिन्द्रश्च॒ विष्णु॑श्च

व्यायच्छेता॑ स इन्द्रोऽमन्यतानया॑ वा इदं विष्णुः॑ सहस्रं॑ वक्ष्यत॑
इति॑ तस्यामकल्पेतां॑ द्विभाग॑ इन्द्रस्तृतीये॑ विष्णुस्तद्वा॑ एषाऽभ्यनूच्यत॑
उभा॑ जिग्यथुरिति॑ तां वा॑ एतामच्छावाक॑ - [] 18

TS 7.1.5.6

एव॑ शसत्यथ॑ या सहस्रतमी॑ सा होत्रे॑ देयेति॑ होतारं॑ वा
अभ्यतिरिच्यते॑ यदतिरिच्यते॑ होता॑ ऽनाप्तस्याऽऽपयिता॑ ऽथाऽहुरुन्नेत्रे॑
देयेत्यतिरिक्ता॑ वा एषा॑ सहस्रस्यातिरिक्त॑ उन्नेत॑ त्विजामथाऽऽहुः॑
सर्वेभ्यः॑ सदस्येभ्यो॑ देयेत्यथाऽऽहुरुदा॑ कृत्या॑ सा वशं॑
चरेदित्यथाऽऽहुर्ब्रह्मणे॑ चाग्नीधे॑ च देयेति॑ - [] 19

TS 7.1.5.7

द्विभागं॑ ब्रह्मणे॑ तृतीयमग्नीधे॑ ऐन्द्रो॑ वै ब्रह्मा॑ वैष्णवो॑ऽग्नीधथैव॑
तावकल्पेतामित्यथा॑ ऽऽहुर्या॑ कल्याणी॑ बहुरूपा॑ सा देयेत्यथा॑
ऽऽहुर्या॑ द्विरूपोभयतएनी॑ सा देयेति॑ सहस्रस्य॑ परिगृहीत्यै॑ तद्वा॑
एतथ्॑ सहस्रस्याऽयनं॑ सहस्रं॑ स्तोत्रीयाः॑ सहस्रं॑ दक्षिणाः॑
सहस्रसम्मितः॑ सुवर्गो॑ लोकः॑ सुवर्गस्य॑ लोकस्याभिजित्यै॑ ॥ 20

(अ॒ब्रवी॑ – च्च – तद॒न्तरि॑क्षं – ददा॒त्य – च्छा॒वाक॑ – श्च दे॒येति॑ –
सप्त॑च॒त्वारि॑ञ्शच्च) (A5)

TS 7.1.6.1

सो॒मो वै स॒हस्र॑मवि॒न्दत् तमि॑न्द्रो ऽन्ववि॒न्दत् तौ य॒मो न्याग॑च्छत्
ताव॑ब्रवी॒दस्तु॑ मेऽत्राऽपी॒त्यस्तु॑ ही(३) इत्य॑ब्रूता॒ञ् स य॒म एक॑स्यां
वी॒र्यं पर्य॑पश्यदि॒यं वा अ॒स्य स॒हस्र॑स्य वी॒र्यं बिभ॑र्तीति
ताव॑ब्रवी॒दियं॑ ममास्त्वे॒तद्-युव॑यो॒रिति॑ ताव॑ब्रूता॒ञ् सर्वे॑ वा
ए॒तदे॒तस्यां॑ वी॒र्यं – [] 21

TS 7.1.6.2

परि॑ प॒श्यामो॑ऽञ्शमा॒ हराम॑हा इति॒ तस्या॑म॒ञ्शमा॑ऽहर॒न्त ताम॑प्सु
प्राऽवे॑शयन्थ् सोमा॑यो॒देहीति॑ सा रोहि॑णी पिङ्ग॒लैक॑हायनी रूपं कृ॒त्वा
त्रय॑स्त्रि॒ञ्शता॑ च त्रि॒भिश्च॑ श॒तैः स॒होदै॑त् तस्मा॒द्-रोहि॑ण्या
पिङ्ग॒लयैक॑हाय॒न्या सोमं॑ क्रीणीयाद्य॒ एवं वि॒द्वान् रोहि॑ण्या
पिङ्ग॒लयैक॑हाय॒न्या सोमं॑ क्रीणाति॒ त्रय॑स्त्रि॒ञ्शता॑ चैवा॒स्य
त्रि॒भिश्च॑ – [] 22

TS 7.1.6.3

श॒तैः सोमः॑ क्री॒तो भव॑ति सु॒क्री॑तेन यज॒ते ताम॑प्सु प्रावे॑शय-
 त्ति॒न्द्रा॒यो॒दे॒हीति॑ सा रोहि॑णी लक्ष्म॒णा प॑ष्ठौही॒ वार्त्र॑घ्नी रू॒पं कृ॒त्वा
 त्रय॑स्त्रि॒ंश॒ता च त्रि॒भिश्च॑ श॒तैः स॒होदै॑त् तस्मा॒द् रोहि॑णीं लक्ष्म॒णां
 प॑ष्ठौहीं वार्त्र॑घ्नीं दद्या॒द्य ए॒वं वि॒द्वान् रोहि॑णीं लक्ष्म॒णां प॑ष्ठौहीं वार्त्र॑घ्नीं
 ददा॑ति त्रय॑स्त्रि॒ंश॒च्चै॒वास्य॑ त्रीणि च श॒तानि॑ सा द॒त्ता - [] 23

TS 7.1.6.4

भव॑ति ताम॑प्सु प्रावे॑शयन् यमा॒यो॒दे॒हीति॑ सा जर॑ती मूर्खा॒ तज्ज॑घ्न्या
 रू॒पं कृ॒त्वा त्रय॑स्त्रि॒ंश॒ता च त्रि॒भिश्च॑ श॒तैः स॒होदै॑त् तस्मा॒ज्जर॑तीं
 मूर्खा॒ तज्ज॑घ्न्या-मनु॒स्तर॑णीं कुर्वी॒त य ए॒वं वि॒द्वान्जर॑तीं मूर्खा॒
 तज्ज॑घ्न्या-मनु॒स्तर॑णीं कुरु॒ते त्रय॑स्त्रि॒ंश॒च्चै॒वास्य॑ त्रीणि च श॒तानि॑
 साऽमु॑ष्मिँल्लो॒के भव॑ति वागे॒व स॒हस्र॑तमी तस्मा - [] 24

TS 7.1.6.5

द्वो दे॒यः सा हि वरः॑ स॒हस्र॑मस्य सा द॒त्ता भव॑ति तस्मा॒द् वरो॑ न
 प्र॒तिगृ॑ह्यः सा हि वरः॑ स॒हस्र॑मस्य प्र॒तिगृ॑हीतं भव॒तीयं वर॑ इति
 ब्रू॒याद॒थान्यां॑ ब्रू॒यादि॒यं ममे॒ति त॒थाऽस्य॑ तथ् स॒हस्र॑-मप्र॒तिगृ॑हीतं

भवत्युभयतएनी स्यात् तदाहुरन्यत एनी स्याथ् सहस्रं

परस्तादेतमिति यैव वरः – [] 25

TS 7.1.6.6

कल्याणी रूपसमृद्धा सा स्याथ् सा हि वरः समृद्ध्यै
तामुत्तरेणाऽऽ*ग्नीद्धं पर्याणीयाऽऽ*हवनीयस्यान्ते द्रोणकलशमव
घ्रापयेदा जिघ्र कलशं मह्युरुधारा पयस्वत्या त्वा विशन्त्विन्दवः
समुद्रमिव सिन्धवः सा मा सहस्र आ भज प्रजया पशुभिः सह
पुनर्मा ऽऽ*विशताद्-रयिरिति प्रजयैवैनं पशुभी रय्या स – [] 26

TS 7.1.6.7

-मर्दयति प्रजावान् पशुमान् रयिमान् भवति य एवं वेद तया
सहाऽऽ*ग्नीद्धं परेत्य पुरस्तात् प्रतीच्यां तिष्ठन्त्यां जुहुयादुभा
जिग्यथुर्न परा जयेथे न परा जिग्ये कतरश्चनैनौः ।
इन्द्रश्च विष्णो यदपस्पृधेथां त्रेधा सहस्रं वि तदैरयेथामिति,
त्रेधाविभक्तं वै त्रिरात्रे सहस्रं साहस्रीमेवैनां करोति
सहस्रस्यैवैनां मात्रां – [] 27

TS 7.1.6.8

करोति॑ रूपाणि॑ जुहोति॑ रूपैरेवैना॑ꣳ सम॑र्द्धयति॑ तस्या॑ उपो॒त्थाय॑
कर्ण॑मा जपेदिडे॑ रन्तेऽदिते॑ सरस्वति॑ प्रिये॑ प्रेयसि॑ महि॑ विश्रुत्ये॒तानि॑
ते अ॒घ्निये॑ नामानि॑ सु॒कृतं॑ मा दे॒वेषु॑ ब्रूता॒दिति॑ दे॒वेभ्य॑ ए॒वैन॒मा
वेद॑यत्यन्वेनं॑ दे॒वा बु॑द्ध्यन्ते ॥ 28 (ए॒तदे॒तस्यां॑ ॥ वी॒र्यं॑ – म॒स्य
त्रि॒भिश्च॑ – द॒त्ता – स॒हस्र॒तमी॑ तस्मा॑ – दे॒व वरः॑ – सं – मा॒त्रा –
मे॒कात्र॑च॒त्वारि॑ꣳश॒च्च) (A6)

TS 7.1.7.1

स॒हस्र॒तम्या॑ वै यज॑मानः सु॒वर्गं॑ लो॒कमे॑ति सैन॑ꣳ सु॒वर्गं॑ लो॒कं
गम॑यति॒ सा मा॑ सु॒वर्गं॑ लो॒कं गम॑येत्याह सु॒वर्गमे॒वैनं॑ लो॒कं गम॑यति॒
सा मा॑ ज्योति॑ष्मन्तं लो॒कं गम॑येत्याह ज्योति॑ष्मन्तमे॒वैनं॑ लो॒कं
गम॑यति॒ सा मा॑ सर्वा॒न् पु॒ण्यां॑ लो॒कान् गम॑येत्याह सर्वा॒नेवैनं॑ पु॒ण्यां॑
लो॒कान् गम॑यति॒ सा – [] 29

TS 7.1.7.2

मा प्रति॑ष्ठां गमय॑ प्र॒जया॑ प॒शुभिः॑ स॒ह पुन॑र्माऽऽ वि॒शताद्–र॒यिरिति॑
प्र॒जयै॒वैनं॑ प॒शुभी॑ र॒य्यां प्रति॑ ष्ठापयति॑ प्र॒जावा॑न् प॒शुमान्॑ र॒यिमान्॑

भवति॑ य॒ एवं॑ वै॒द॒ ताम॒ग्नी॒धे वा॑ ब्र॒ह्म॒णे वा॑ हो॒त्रे वो॒द्गा॒त्रे वा॑ऽद॒ध्व॒र्यवे॑
वा दद्या॑त् स॒हस्र॑मस्य॒ सा द॒त्ता भवति॑ स॒हस्र॑मस्य॒ प्रति॑गृहीतं भवति॒
यस्ताम॑विद्वान् – [] 30

TS 7.1.7.3

प्रति॑गृह्णाति॒ तां प्रति॑गृह्णीयादेका॑ऽसि न स॒हस्र॑मेकां॑ त्वा भू॒तां
प्रति॑ गृह्णामि न स॒हस्र॑मेका॑ मा भू॒ताऽऽ वि॒श मा स॒हस्र॑मित्येका॑मेवैनां॑
भू॒तां प्रति॑गृह्णाति न स॒हस्रं॑ य॒ एवं॑ वै॒द॒ स्यो॒नाऽसि॑ सु॒षदा॑ सु॒शेवा॑
स्यो॒ना मा ऽऽवि॑श सु॒षदा॑ मा ऽऽवि॑श सु॒शेवा॑ मा ऽऽवि॑शे – [] 31

TS 7.1.7.4

–त्याह॑ स्यो॒नैवैन॑ सु॒षदा॑ सु॒शेवा॑ भू॒ताऽऽ वि॒शति॑ नैन॑ हिनस्ति
ब्र॒ह्म॒वादि॒नो वद॑न्ति स॒हस्र॑ सहस्र॑तम्यन्वेती(३) स॒हस्र॑तमी
स॒हस्रा(३)मि॒ति यत् प्रा॑चीमु॒थ् सृ॒जेथ् स॒हस्र॑ सहस्र॑तम्यन्वियात्
तथ् स॒हस्र॑मप्र॒ज्ञात्र॑ सु॒वर्गं॑ लो॒कं न प्र॑ जानीयात् प्र॒तीची॒मुथ्–
सृ॒जति॑ ता सहस्र॑मनु पर्या॑वर्तते सा प्र॒जान॑ती सु॒वर्गं॑ लो॒कमे॒ति
यज॑मान () –म॒भ्यु॒थ् सृ॒जति॑ क्षि॒प्रे स॒हस्रं॑ प्र जा॒यत॑ उत्त॒मा नी॒यते॑
प्रथ॑मा दे॒वान् गच्छ॑ति ॥ 32

(लो॒कान् ग॒मय॒ति सा – ऽवि॒द्वान्त् – सु॒शे॒वा मा॒ऽऽ वि॒श – यज॒मानं
– द्वा॒दश॒ च) (A7)

TS 7.1.8.1

अ॒त्रि॒रद॒दादौ॒र्वाय॒ प्र॒जां पु॒त्रका॒माय॒ स रि॒रिचा॒नोऽम॒न्यत॒ निर्वी॑र्यः
शि॒थि॒लो या॒तया॒मा स ए॒तं च॒तूरा॒त्र-म॒पश्य॒त् तमा॒ऽहर॒त् तेना॒यज॒त
ततो॒ वै तस्य॑ च॒त्वारो॑ वी॒रा आ॒ऽजाय॑न्त सु॒होता॒ सू॒द्राता॒ स्व॒द्ध्वर्युः॑
सु॒स॒भेयो॒ य ए॒वं वि॒द्वान्श्च॒तूरा॒त्रेण॒ यज॒त आ॒ऽस्य॑ च॒त्वारो॑ वी॒रा
जा॒यन्ते॒ सु॒होता॒ सू॒द्राता॒ स्व॒द्ध्वर्युः॑ सु॒स॒भेयो॒ ये च॒तुर्वि॒ंशः
प॒वमा॒ना ब्र॒ह्मव॑र्चसं त – [] 33

TS 7.1.8.2

– द्य उ॒द्यन्तः॒ स्तो॒माः श्रीः॒ सा ऽत्रि॑श्च॒ श्रद्धा॑दे॒वं य॑ज॒मानं॒ च॒त्वारि॑
वी॒र्या॑णि नोपा॒ऽनम॑न् तेज इ॒न्द्रियं॑ ब्र॒ह्मव॑र्चस-म॒न्नाद्य॑ स
ए॒ताश्च॒तुर॑श्च॒तुष्टो॒मान्त् सो॒मान-प॑श्यत् ता॒नाऽहर॒त् तैर॑यज॒त तेज॑ ए॒व
प्र॒थमे॒ना ऽवा॑रुन्धेन्द्रि॒यं द्वि॒तीये॑न ब्र॒ह्मव॑र्चसं तृ॒तीये॑ना॒न्नाद्यं॑ च॒तुर्थे॑न य
ए॒वं वि॒द्वान्श्च॒तुर॑श्च॒तुष्टो॒मान्त् सो॒माना॑हरति तैर्यज॒ते तेज॑ ए॒व ()
प्र॒थमे॒नाव॑ रुन्ध इ॒न्द्रियं॑ द्वि॒तीये॑न ब्र॒ह्मव॑र्चसं तृ॒तीये॑ना॒ऽन्नाद्यं॑ च॒तुर्थे॑न

यामे॒वा॒त्रि॒र्ऋ॒द्धि॒मा॒ध्नो॒त् तामे॒व यज॑मान ऋ॒द्धो॒ति ॥ 34

(तत्-तेज॑ ए॒वा-ष्टा॑दश च) (A8)

TS 7.1.9.1

ज॒मद॑ग्निः पु॒ष्टि॒काम-॑श्चतू॒रात्रे॑णा-यज॑त स ए॒तान् पो॒षा॑ अ॒पुष्य॑त्
तस्मा॑त् प॒लितौ॑ जा॒मद॑ग्नियौ न सं जा॒नाते॑ ए॒ताने॒व पो॒षान् पु॒ष्यति॑
य ए॒वं वि॒द्वाश्च॑तू॒रात्रे॑ण यज॑ते पु॒रोडा॑शिन्य॒ उप॒सदो॑ भव॒न्ति प॒शवो॑
वै पु॒रोडा॑शः प॒शूने॒वाव रु॒न्धे ऽन्नं॑ वै पु॒रोडा॑शोऽन्नमे॒वाव रु॒न्धे
ऽन्ना॑दः प॒शुमान् भव॑ति य ए॒वं वि॒द्वाश्च॑तू॒रात्रे॑ण यज॑ते ॥ 35

(ज॒मद॑ग्नि - र॒ष्टाच॑त्वारि॒ंशत्) (A9)

TS 7.1.10.1

सँव॑त्सरो वा इ॒दमे॑क आसी॒थ् सोऽ॒काम॑यत॒र्तून्थ् सृ॑जे॒येति॑ स ए॒तं
पञ्च॑रात्रमप॒श्यत् तमा॑ऽह॒रत् ते॒नाय॑ज॒त ततो॑ वै स ऋ॒तून॑सृज॒त य
ए॒वं वि॒द्वान् पञ्च॑रात्रे॒ण यज॑ते प्रै॒व जा॑यते त ऋ॒तवः॑ सृ॒ष्टा न
व्याव॑र्तन्त॒ त ए॒तं पञ्च॑रात्रमप॒श्यन् तमा॑ऽह॒रन् ते॒नाय॑जन्त॒ ततो॑
वै ते व्याव॑र्तन्त-[] 36

TS 7.1.10.2

य॒ एवं॑ वि॒द्वान् प॒ञ्चरा॒त्रेण॑ यज॒ते वि पा॒प्मना॒ भ्रातृ॑व्येणाऽऽ* वर्त॒ते
 सार्व॑सेनिः शौ॒चेयोऽकाम॑यत पशु॒मान्त् स्या॒मिति॒ स ए॒तं
 प॒ञ्चरा॒त्रमाऽह॑रत् तेनाऽयज॒त ततो॒ वै स स॒हस्रं॑ प॒शून् प्राऽऽ*प्नो॒द्य
 एवं॑ वि॒द्वान् प॒ञ्चरा॒त्रेण॑ यज॒ते प्र स॒हस्रं॑ प॒शूना॑प्नोति ब॒बरः
 प्रावा॑हणि-रकाम॑यत वा॒चः प्रव॑दिता स्या॒मिति॒ स ए॒तं
 प॒ञ्चरा॒त्रमा - [] 37

TS 7.1.10.3

ऽह॑रत् तेनायज॒त ततो॒ वै स वा॒चः प्रव॑दिताऽभ॒वद्य॒ एवं॑ वि॒द्वान्
 प॒ञ्चरा॒त्रेण॑ यज॒ते प्रव॑दितैव वा॒चो भ॑वत्यथो ए॒नं वा॒चस्प॑ति-
 रित्या॑हु॒रना॑प्त-श्चतू॒रात्रोऽति॑रिक्तः षड्-रा॒त्रोऽथ॒ वा ए॒ष संप्र॑ति य॒ज्ञो
 यत् प॒ञ्चरा॒त्रो य एवं॑ वि॒द्वान् प॒ञ्चरा॒त्रेण॑ यज॒ते संप्र॑त्येव य॒ज्ञेन॑
 यज॒ते प॒ञ्चरा॒त्रो भ॑वति प॒ञ्च वा ऋ॒तवः॑ सँव॒त्सर - [] 38

TS 7.1.10.4

ऋ॒तुष्वे॒व सँव॒त्सरे॒ प्रति॑ तिष्ठत्यथो प॒ञ्चाक्ष॑रा प॒ङ्क्तिः पाङ्क्तो॑
 य॒ज्ञो य॒ज्ञमे॒वाव रु॒न्धे त्रि॑वृ॒दग्नि॑ष्टोमो भ॑वति तेज॒ ए॒वाव रु॒न्धे

पञ्चद॒शो भ॒वतीन्द्रि॒यमे॒वाव रु॒न्धे सप्त॒द॒शो भ॒वत्य॒न्नाद्य॒स्या-वरु॑द्ध्य॒
अथो॒ प्रै॒व ते॒न जा॒यते॒ पञ्च॒वि॒ंशो॑ ऽग्नि॒ष्टोमो॑ भ॒वति॒ प्र॒जाप॑ते॒राप्त्यै॑
महा॒व्रत॒वा-न॒न्नाद्य॒स्या-वरु॑द्ध्यै वि॒श्वजि॒त् सर्व॑पृ॒ष्ठो-ऽति॒रात्रो॑ भ॒वति॒
सर्व॑स्याभि॒जित्यै॑ () ॥ 39

(ते व्यावर्तन्त - प्रवदिता स्यामिति स एतं पञ्चरात्रमा -
सँवत्सरो- भिजित्यै) (A10)

TS 7.1.11.1

दे॒वस्य॑त्वा स॒वितुः॑ प्र॒स॒वे॒ऽश्विनो॑र्बा॒हुभ्यां॑ पू॒ष्णो ह॒स्ताभ्या॑मा द॒द
इ॒माम॑गृ॒भ्णन् र॒शना॑मृ॒तस्य॑ पूर्॒व आयु॑षि वि॒दथे॑षु क॒व्या ।
तया॑ दे॒वाः सु॒तमा॑ ब॒भूवुर् ऋ॒तस्य॑ सा॒मन्थ्-स॒रमा॑रप॒न्ती ॥
अ॒भि॒धा अ॒सि भु॒वन॑म॒सि य॒न्ता॒ऽसि ध॒र्ता॒ऽसि सो॒ऽग्निं वै॑श्वा॒नर॑
सप्र॑थसं गच्छ॒ स्वाहा॑कृतः पृ॒थिव्यां॑ य॒न्ता रा॒ड् य॒न्ता॒ऽसि य॑म॒नो
ध॒र्ता॒ऽसि ध॒रुणः॑ () कृ॒ष्यै त्वा क्षे॑माय॒ त्वा र॒य्यै त्वा पो॑षाय॒ त्वा
पृ॒थिव्यै॑ त्वा ऽन्त॑रि॒क्षाय॑ त्वा दि॒वे त्वा स॒ते त्वा॒ऽसते॑ त्वाद्भ्य॒स्त्वौ-
ष॒धीभ्य॑स्त्वा वि॒श्वेभ्य॑स्त्वा भू॒तेभ्यः॑ ॥ 40

(धरुणः – पञ्चविंशतिश्च) (A11)

TS 7.1.12.1

वि॒भूर्मा॒त्रा प्र॒भूः पि॒त्राश्चो॑ऽसि॒ हयो॑ऽस्य॒त्यो॑ऽसि॒ नरो॑ऽस्य॒र्वा॑ऽसि॒
स॒प्तिर॑सि॒ वा॒ज्यसि॒ वृषा॑ऽसि॒ नृम॑णा॒ असि॒ ययु॑र्ना॒मास्या॑दि॒त्यानां॒
प॒त्वान्वि॑ह्य॒ग्नये॒ स्वाहा॒ स्वाहे॑न्द्रा॒ग्निभ्या॑ ॥ स्वाहा॒ प्र॒जाप॑तये॒ स्वाहा॒
वि॒श्वेभ्यो॑ दे॒वेभ्यः॒ स्वाहा॒ सर्वा॑भ्यो दे॒वेता॑भ्य इ॒ह धृ॑तिः स्वाहे॒ह
वि॒धृतिः॑ स्वाहे॒ह र॑न्तिः स्वाहे () –ह र॑मतिः स्वाहा॒ भूर॑सि॒ भुवे॑ त्वा
भ॒व्याय॑ त्वा भ॒विष्य॑ते त्वा वि॒श्वेभ्य॑स्त्वा भू॒तेभ्यो॑ दे॒वा आ॑शा॒पाला॑ ए॒तं
दे॒वेभ्यो॑ऽश्चं मे॒धाय॑ प्रो॒क्षितं॑ गो॒पाय॑त ॥ 41

(रन्तिः स्वाहा – द्वाविंशतिश्च) (A12)

TS 7.1.13.1

आ॒यना॑य स्वाहा॒ प्राय॑णाय स्वाहो॑द्द्रा॒वाय॒ स्वाहो॑द्द्रु॒ताय॒ स्वाहा॑
शू॒का॒राय॒ स्वाहा॑ शू॒कृता॑य स्वाहा॒ पला॑यिताय स्वाहा॒ ऽप॑ला॒यिताय॒
स्वाहा॒ ऽव॑ल्गा॒ते स्वाहा॑ प॒राव॑ल्गा॒ते स्वाहा॑ ऽय॒ते स्वाहा॑ प्र॒यते॒ स्वाहा॑
सर्व॑स्मै स्वाहा ॥ 42

(आय॑ना॒योत्तर॑मा॒पला॑यिताय षड्विंशतिः) (A13)

TS 7.1.14.1

अ॒ग्नये॒ स्वाहा॒ सोमा॑य॒ स्वाहा॑ वा॒यवे॒ स्वाहा॑ ऽपां॒ मोदा॑य॒ स्वाहा॑
सवि॒त्रे स्वाहा॒ सर॑स्वत्यै॒ स्वाहे॑-न्द्राय॒ स्वाहा॑ बृ॒हस्प॑तये॒ स्वाहा॑
मि॒त्राय॒ स्वाहा॑ वरु॒णाय॒ स्वाहा॑ सर्व॑स्मै॒ स्वाहा॑ ॥ 43

(अ॒ग्नये॒ वा॒यवे॑ऽपां॒ मोदा॑येन्द्रा॒य त्रयो॑वि॒ंशतिः॑) (A14)

TS 7.1.15.1

पृ॒थिव्यै॒ स्वाहा॒ ऽन्तरि॑क्षाय॒ स्वाहा॑ दि॒वे स्वाहा॒ सूर्या॑य॒ स्वाहा॑ च॒न्द्रम॑से
स्वाहा॒ नक्ष॑त्रेभ्यः॒ स्वाहा॒ प्रा॒च्यै दि॒शे स्वाहा॒ दक्षि॑णायै॒ दिशे॑ स्वाहा॑
प्र॒तीच्यै॒ दिशे॑ स्वा॒हो-दी॑च्यै॒ दिशे॑ स्वा॒होर्ध्वा॑यै॒ दिशे॑ स्वाहा॑ दि॒ग्भ्यः॑
स्वाहा॑ ऽवा॒न्तर॑दि॒शाभ्यः॒ स्वाहा॑ स॒माभ्यः॒ स्वाहा॑ श॒रद्भ्यः॒ स्वाहा॑
ऽहो॒रात्रे॑भ्यः॒ स्वाहा॑ ऽर्ध॒मासे॑भ्यः॒ स्वाहा॑ मा॒सेभ्यः॒ स्वाह॑र्तु॒भ्यः॑
स्वाहा॑ सँव॒त्सरा॑य॒ स्वाहा॑ सर्व॑स्मै॒ स्वाहा॑ ॥ 44

(पृ॒थिव्यै॒ सूर्या॑य॒ नक्ष॑त्रेभ्यः॒ प्रा॒च्यै स॒प्तच॑त्वारि॒ंशत्) (A15)

TS 7.1.16.1

अ॒ग्नये॒ स्वाहा॒ सोमा॑य॒ स्वाहा॑ सवि॒त्रे स्वाहा॒ सर॑स्वत्यै॒ स्वाहा॑
पू॒ष्णे स्वाहा॒ बृ॒हस्प॑तये॒ स्वाहा॑ ऽपां॒ मोदा॑य॒ स्वाहा॑ वा॒यवे॒ स्वाहा॑

मि॒त्राय॑ स्वा॒हा वरु॑णाय॒ स्वाहा॑ सर्व॒स्मै स्वा॒हा ॥ 45

(अ॒ग्नये॑ सवि॒त्रे पू॒ष्णेऽपां॑ मोदा॒य वा॒यवे॑ त्रयो॒विंशतिः॑) (A16)

TS 7.1.17.1

पृ॒थि॒व्यै स्वा॒हा ऽन्तरि॑क्षाय॒ स्वाहा॑ दि॒वे स्वा॒हा ऽग्नये॑ स्वा॒हा
सो॒माय॑ स्वा॒हा सू॒र्याय॑ स्वा॒हा च॒न्द्रम॑से स्वा॒हा ऽहे॒ स्वाहा॑
रा॒त्रियै॑ स्वा॒हर्ज॑वे स्वा॒हा सा॒धवे॑ स्वा॒हा सु॒क्षित्यै॑ स्वा॒हा क्षु॒धे स्वा॒हा
ऽऽशि॑ति॒म्ने स्वा॒हा रो॒गाय॑ स्वा॒हा हि॒माय॑ स्वा॒हा शी॒ताय॑ स्वा॒हा
ऽऽत॑पाय॒ स्वाहा॑ ऽर॒ण्याय॑ स्वा॒हा सु॒वर्गाय॑ स्वा॒हा लो॒काय॑ स्वा॒हा
सर्व॒स्मै स्वा॒हा ॥ 46

(पृ॒थि॒व्या अ॒ग्नये॑ऽहे रा॒त्रियै॑ चतु॒श्चत्वारि॑ंशत्) (A17)

TS 7.1.18.1

भु॒वो दे॒वानां॑ क॒र्मणा॑ऽप॒स॒र्तस्य॑ प॒थ्याऽसि॑ वसु॒भिर्दे॒वेभि॑र्दे॒वत॑या
गा॒य॒त्रेण॑ त्वा छ॒न्दसा॑ यु॒नज्मि॑ वस॒न्तेन॑ त्व॒र्तुना॑ ह॒विषा॑ दीक्षयामि
रु॒द्रेभि॑र्दे॒वेभि॑र्दे॒वत॑या त्रैष्टु॒भेन॑ त्वा छ॒न्दसा॑ यु॒नज्मि॑ ग्री॒ष्मेण॑
त्व॒र्तुना॑ ह॒विषा॑ दीक्षया-म्यादि॒त्येभि॑र्दे॒वेभि॑र्दे॒वत॑या जा॒गतेन॑ त्वा

छन्दसा युनज्मि वरुषाभिस्त्वर्तुना हविषा दीक्षयामि विश्वेभि-
 दे॒वेभि॑-दे॒वत॒या ऽऽनु॑ष्टुभेन त्वा छन्दसा युनज्मि - [] 47

TS 7.1.18.2

शरदा त्वर्तुना हविषा दीक्षयाम्यङ्गिरोभि-दे॒वेभि॑-दे॒वत॒या
 पाङ्केन त्वा छन्दसा युनज्मि हेमन्तशिशिराभ्यां त्वर्तुना हविषा
 दीक्षयाम्याऽहं दीक्षामरुहमृतस्य पत्नीं गायत्रेण छन्दसा
 ब्रह्मणा चर्त॑ सत्येऽधा॑ सत्यमृतेऽधां ॥

मही मू षु > ¹ सुत्रामाण > ² -मिह धृतिः स्वाहेह विधृतिः स्वाहेह
 रन्तिः स्वाहेह रमतिः स्वाहा ॥ 48

(आनुष्टुभेन त्वा छन्दसा युनज्म्ये - कान्न पञ्चाशच्च) (A18)

TS 7.1.19.1

ई॒का॒राय॒ स्वाहे॑ कृ॒ताय॒ स्वाहा॑ क्रन्दते स्वाहा ऽवक्रन्दते स्वाहा
 प्रो॒थते॒ स्वाहा॑ प्र॒प्रो॒थते॒ स्वाहा॑ गन्धाय॒ स्वाहा॑ घ्रा॒ताय॒ स्वाहा॑
 प्रा॒णाय॒ स्वाहा॑ व्या॒नाय॒ स्वाहा॑ ऽपा॒नाय॒ स्वाहा॑ सन्दी॒यमा॒नाय॒ स्वाहा॑
 सन्दि॒ताय॒ स्वाहा॑ विचृ॒त्यमा॒नाय॒ स्वाहा॑ विचृ॒त्ताय॒ स्वाहा॑
 पला॒यिष्य॑मा॒णाय॒ स्वाहा॑ पला॒यिता॒य स्वाहो॑पर॒स्यते॒ स्वाहो॑पर॒ताय॒

स्वाहा निवेक्ष्यते स्वाहा निविशमानाय स्वाहा निविष्टाय स्वाहा
निषथ्स्यते स्वाहा निषीदते स्वाहा निषण्णाय स्वाहा – [] 49

TS 7.1.19.2

ऽऽसिष्यते स्वाहा ऽऽसीनाय स्वाहा ऽऽसिताय स्वाहा निपथ्स्यते
स्वाहा निपद्यमानाय स्वाहा निपन्नाय स्वाहा शयिष्यते स्वाहा
शयानाय स्वाहा शयिताय स्वाहा संमीलिष्यते स्वाहा संमीलते
स्वाहा संमीलिताय स्वाहा स्वप्स्यते स्वाहा स्वपते स्वाहा सुप्ताय
स्वाहा प्रभोथ्स्यते स्वाहा प्रबुद्ध्यमानाय स्वाहा प्रबुद्धाय स्वाहा
जागरिष्यते स्वाहा जाग्रते स्वाहा जागरिताय स्वाहा शुश्रूषमाणाय
स्वाहा शृण्वते स्वाहा श्रुताय स्वाहा वीक्षिष्यते स्वाहा – [] 50

TS 7.1.19.3

वीक्षमाणाय स्वाहा वीक्षिताय स्वाहा सञ्हास्यते स्वाहा संजिहानाय
स्वाहो-ज्जिहानाय स्वाहा विवथ्स्यते स्वाहा विवर्तमानाय स्वाहा
विवृत्ताय स्वाहो-त्थास्यते स्वाहोत्तिष्ठते स्वाहोत्थिताय स्वाहा
विधविष्यते स्वाहा विधून्वानाय स्वाहा विधूताय स्वाहो-त्क्रास्यते
स्वाहोत्क्रामते स्वाहोत्क्रान्ताय स्वाहा चङ्क्रमिष्यते स्वाहा

चङ्क्रम्यमा॒णाय॒ स्वाहा॑ चङ्क्रमि॒ताय॒ स्वाहा॑ कण्डूयिष्य॒ते स्वाहा॑
 कण्डूयमा॒णाय॒ स्वाहा॑ कण्डूयि॒ताय॒ स्वाहा॑ निकषिष्य॒ते स्वाहा॑
 निकषमा॒णाय॒ स्वाहा॑ () निकषि॒ताय॒ स्वाहा॑ यदत्ति॒ तस्मै॒ स्वाहा॑ यत्
 पिब॑ति तस्मै॒ स्वाहा॑ यन्मे॑हति तस्मै॒ स्वाहा॑ यच्छ॑कृत् करोति तस्मै॒
 स्वाहा॑ रेत॑से स्वाहा॑ प्र॒जाभ्यः॒ स्वाहा॑ प्र॒जन॑नाय स्वाहा॑ सर्व॑स्मै
 स्वाहा॑ ॥ 51

(निष॑ण्णाय॒ स्वाहा॑ – वीक्षि॑ष्यते स्वाहा॑ – नि॒कष॑मा॒णाय॒ स्वाहा॑ –
 सप्त॑विंशतिश्च) (A19)

TS 7.1.20.1

अ॒ग्नये॒ स्वाहा॑ वा॒यवे॒ स्वाहा॑ सू॒र्याय॒ स्वाहा॑-र्त॑मस्यृतस्य॒र्तम॑सि
 स॒त्यम॑सि स॒त्यस्य॑ स॒त्यम॑स्यृतस्य॒ पन्था॑ अ॒सि दे॒वानां॑ छा॒याऽमृत॑स्य॒
 ना॒म तथ् स॒त्यं यत् त्वं॑ प्र॒जाप॑तिरस्य॒धि यद॑स्मिन् वा॒जिनी॑व शु॒भः
 स्प॑र्द्धन्ते दि॒वः सू॒र्येण॒ विशो॑ऽपो वृ॒णानः॑ प॒वते क॒व्यन् प॒शुं न गो॑पा
 इ॒र्यः परि॑ज्मा ॥ 52

(अ॒ग्नये॒ वा॒यवे॒ सू॒र्याया॑ – ऽष्टा॑चत्वारिंशत्) (A20)

Prasna Korvai with starting Padams of 1 to 20 Anuvaakams :-

(प्र॒जन॑नं – प्रा॒तस्स॑वने॒ वै – ब्र॒ह्म॑वा॒दि॒नः॑ स॒ त्वा – अ॒ङ्गि॑रस॒ – आ॒पो
वै – सो॒मो॒ वै – स॒ह॒स्र॑त॒म्या – त्रि॑ – र्ज॒म॑द॒ग्निः॑ – सँ॒व॒त्स॒रो –
दे॒व॒स्य॑ – वि॒भू – रा॒य॒ना॒या – ऽग्न॑ये – पृ॒थि॒व्या – अ॒ग्न॑ये – पृ॒थि॒व्यै
– भु॒व – ई॒का॒रा॒या – ग्न॑ये वा॒य॒वे सू॒र्या॑य – वि॒श॒तिः)

Korvai with starting Padams of 1, 11, 21 Series of Panchaatis :-

(प्र॒जन॑न – म॒ङ्गि॑रसः॒ – सो॒मो॒ वै – प्र॒ति॒गृ॒ह्णा॑ति – वि॒भू –
वी॒क्ष॑मा॒णाय॑ – द्वि॒प॒ञ्चा॒शत्)

First and Last Padam of First Prasnam of 7th Kandam

(प्र॒जन॑नं – परि॒ज्मा)

॥ हरिः ओं ॥

॥ कृष्ण यजुर्वेदीय तैत्तिरीय संहितायां सप्तमकाण्डे प्रथमः प्रश्नः

समाप्तः ॥

7.1.1 Appendix

7.1.18.2 – मही॒मूषु॑> ¹ सु॒त्रा॒मा॒ण > ²

मही॒मूषु॑ मा॒तर॑ꣳ सु॒व्र॒ता॒ना॒मृ॒तस्य॑ प॒त्नी॒मव॑से हुवे॒म ।
तु॒वि॒क्ष॒त्रा॒मज॑रन्तीमु॒रू॒चीꣳ सु॒श॒र्मा॒णम॑दि॒तिꣳ सु॒प्र॒णी॒तिं ॥

सु॒त्रा॒मा॒णं पृ॒थि॒वीं द्या॑म॒ने॒हस॑ꣳ सु॒श॒र्मा॒ण म॑दि॒तिꣳ सु॒प्र॒णी॒तिं ।
दै॒वीं ना॒वꣳ स्वरि॑त्रा॒मना॑गस॒मस्र॑वन्ती॒मा रु॒हे॒मा स्व॑स्तये ॥

(Appearing in T.S.1.5.11.5)

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

7.2 सप्तमकाण्डे द्वितीयः प्रश्नः – षड् रात्राद्यानां निरूपणं

TS 7.2.1.1

सा॒द्ध्या॒ वै दे॒वाः सु॒वर्ग॑का॒मा ए॒त॒ ष॒ड्-रा॒त्रम॑पश्यन् तमाऽह॒रन्
तेना॑यजन्त॒ ततो॒ वै ते सु॒वर्गं॑ लो॒कमा॑यन्. य ए॒वं वि॒द्वा॒ऽसः
ष॒ड्-रा॒त्रमा॑सते सु॒वर्गमे॒व लो॒कं य॑न्ति दे॒वस॒त्रं वै ष॒ड्-रा॒त्रः
प्र॒त्यक्ष॑ ह्ये॒तानि॑ पृ॒ष्ठानि॒ य ए॒वं वि॒द्वा॒ऽसः ष॒ड्-रा॒त्रमा॑सते
सा॒क्षादे॒व दे॒वता॑ अ॒भ्यारो॑हन्ति ष॒ड्-रा॒त्रो भ॑वति ष॒ड् वा ऋ॒तवः
षट् पृ॒ष्ठानि॑ – [] 1

TS 7.2.1.2

पृ॒ष्ठैरे॒वर्तू॒न-न्वा॑रोहन्त्य॒तुभिः॑ सँव॒त्सरं॑ ते सँव॒त्सर॑ ए॒व प्रति॑ तिष्ठन्ति
बृ॒हद्-र॑थन्त॒राभ्यां॑ य॒न्तीयं॑ वा॒व र॑थं॒तर॒मसौ॑ बृ॒हदा॒भ्यामे॒व य॒न्त्यथो॑
अ॒नयो॑रे॒व प्रति॑ तिष्ठन्त्ये॒ते वै य॒ज्ञस्या॑ज्ज॒साय॑नी स्रु॒ती ता॒भ्यामे॒व
सु॒वर्गं॑ लो॒कं य॑न्ति त्रि॒वृद॑ग्नि॒ष्टोमो॑ भ॑वति तेज॒ ए॒वाव॑ रुन्धते
पञ्च॑द॒शो भ॑वतीन्द्रि॒यमे॒वाव॑ रुन्धते सप्त॑द॒शो- [] 2

TS 7.2.1.3

भव-त्यन्नाद्यस्या-वरुद्ध्या अथो प्रैव तेन जायन्त एकविंशो भवति
 प्रतिष्ठित्या अथो रुचमेवाऽऽत्मन् दधते त्रिणवो भवति विजित्यै
 त्रयस्त्रिंशो भवति प्रतिष्ठित्यै सदोहविर्द्धानि एतेन षड्-रात्रेण
 यजेरन्नाश्वत्थी हविर्द्धानं चाऽऽग्नीध्रं च भवतस्तद्धि सुवर्ग्यं
 चक्रीवती भवतः सुवर्गस्य लोकस्य समष्ट्या उलूखलबुद्धनो यूपो
 भवति प्रतिष्ठित्यै प्राञ्चो यान्ति प्राडिव हि सुवर्गो - [] 3

TS 7.2.1.4

लोकः सरस्वत्या यान्त्येष वै देवयानः पन्थास्त-मेवा-
 न्वारोहन्त्याक्रोशन्तो यान्त्यवर्ति-मेवान्यस्मिन् प्रतिषज्य प्रतिष्ठां
 गच्छन्ति यदा दश शतं कुर्वन्त्यथैक-मुत्थानं शतायुः पुरुषः
 शतेन्द्रिय आयुष्येवेन्द्रिये प्रति तिष्ठन्ति यदा शतं सहस्रं
 कुर्वन्त्यथैक-मुत्थानं सहस्रसंमितो वा असौ लोकोऽमुमेव
 लोकमभि जयन्ति यदै () -षां प्रमीयेत यदा वा जीयेरन्नथैक-
 मुत्थानं तद्धि तीर्थं ॥ 4

(पृष्ठानि-सप्तदशः-सुवर्गो-जयन्ति यदै - कादश च) (A1)

TS 7.2.2.1

कु॒सु॒रु॒बि॒न्द॒ औ॒द्दाल॑कि॒रका॑मय॒त प॒शु॒मान्त् स्या॒मि॒ति स ए॒तꣳ
 स॒प्त॒रा॒त्रमा॑ऽह॒रत् ते॒ना॒य॒ज॒त ते॒न वै स या॑व॒न्तो ग्रा॒म्याः
 प॒श॒व॒स्ता॒नवा॑-रु॒न्ध य ए॒वं वि॒द्वान्त् स॒प्त॒रा॒त्रेण॑ य॒ज॒ते या॑व॒न्त
 ए॒व ग्रा॒म्याः प॒श॒व॒स्ता॒ने॒वाव॑ रु॒न्धे स॒प्त॒रा॒त्रो भ॑वति स॒प्त ग्रा॒म्याः
 प॒श॒वः स॒प्ताऽऽ*र॑ण्याः स॒प्त छ॒न्दाꣳ-स्यु॒भय॑स्या-व॒रु॒द्ध्यै
 त्रि॒वृ॒द॒ग्नि॒ष्टो॒मो भ॑वति ते॒ज - [] 5

TS 7.2.2.2

ए॒वाव॑ रु॒न्धे प॒ञ्च॒द॒शो भ॑वतीन्द्रि॒यमे॒वाव॑ रु॒न्धे स॒प्त॒द॒शो
 भ॑वत्य॒न्नाद्य॑स्या व॒रु॒द्ध्य॒ अथो॒ प्रै॒व ते॒न जा॑य॒त ए॒क॒वि॒ꣳशो॑ भ॑वति
 प्र॒ति॒ष्ठि॒त्या अथो॒ रु॒च॒मे॒वाऽऽ*त्म॑न् ध॒त्ते त्रि॒ण॒वो भ॑वति वि॒जि॒त्यै
 प॒ञ्च॒वि॒ꣳशो॑-ऽग्नि॒ष्टो॒मो भ॑वति प्र॒जा॒प॒ते॒रा॒प्त्यै॑ म॒हा॒व्र॒त॒वा-न॒न्नाद्य॑स्या
 व॒रु॒द्ध्यै वि॒श्व॒जि॒त् सर्व॑पृ॒ष्ठो ऽति॑रा॒त्रो भ॑वति सर्व॑स्या॒भि॒जि॒त्यै यत्
 प्र॒त्य॒क्षं पूर्वे॑ष्व॒हस्सु॑ पृ॒ष्ठान्यु॑पे॒युः प्र॒त्य॒क्षं -[] 6

TS 7.2.2.3

ॐ॒वि॒श्व॒जि॒ति॒ य॒था॒ दु॒ग्धा॒-मु॒प॒सी॒द॒त्ये॒व॒मु॒त्त॒म॒-म॒हः॑ स्या॒न्नै॒क॒रा॒त्रश्च॒न
 स्या॑द् बृ॒हद्-र॒थ॒न्त॒रे पू॒र्वे॒ष्वह॒स्सूप॑ य॒न्ती॒यं ॐ॒वाव॑ र॒थ॒न्त॒र॒मसौ॑
 बृ॒हदा॒भ्यामे॒व न॑ य॒न्त्यथो॑ अ॒नयो॑रे॒व प्र॒ति ति॒ष्ठन्ति॑ यत् प्र॒त्यक्षं॑
 ॐ॒वि॒श्व॒जि॒ति॒ पृ॒ष्ठान्यु॑प॒यन्ति॑ य॒था प्र॒त्तां दु॒हे ता॒दृगे॒व तत् ॥ 7

(तेज॑ - उपेयुः प्रत्यक्षं - द्विचत्वारिंशच्च) (A2)

TS 7.2.3.1

बृ॒ह॒स्प॒ति॒र॒का॒म॒य॒त ब्र॒ह्म॒व॒र्च॒सी स्या॒मि॒ति स॒ ए॒त-म॑ष्ट॒रा॒त्र-म॑प॒श्य॒त्
 त॒माऽह॑र॒त् ते॒ना॒य॒ज॒त त॒तो वै स॒ ब्र॒ह्म॒व॒र्च॒स्य॒भ॒व॒द्य ए॒वं ॐ॒वि॒द्वान॑ष्ट॒रा॒त्रेण॑
 य॒ज॒ते ब्र॒ह्म॒व॒र्च॒स्ये॒व भ॑व॒त्यष्ट॒रा॒त्रो भ॑व॒त्यष्टा॑क्ष॒रा गा॒य॒त्री गा॒य॒त्री
 ब्र॒ह्म॒व॒र्च॒सं गा॒य॒त्रि॒यै॒व ब्र॒ह्म॒व॒र्च॒स॒म॒व रु॒न्धेऽष्ट॒रा॒त्रो भ॑व॒ति च॒त॒स्रो॑
 वै दि॒शश्च॑त॒स्रो ऽवा॑न्त॒र॒दि॒शा दि॒ग्भ्य ए॒व
 ब्र॒ह्म॒व॒र्च॒स॒म॒व रु॒न्धे-[] 8

TS 7.2.3.2

त्रि॒वृ॒द॒ग्नि॒ष्टो॒मो भ॑व॒ति ते॒ज ए॒वा॒व रु॒न्धे प॒ञ्च॒द॒शो भ॑व॒तीन्द्रि॒यमे॒वा॒व
 रु॒न्धे स॒प्त॒द॒शो भ॑व॒त्यन्ना॒द्य॒स्या-व॑रु॒द्ध्य॒ अथो॑ प्रै॒व ते॒न जा॑य॒त

एकविंशो भवति प्रतिष्ठित्या अथो रुचमेवाऽऽत्मन् धत्ते त्रिणवो
भवति विजित्यै त्रयस्त्रिंशो भवति प्रतिष्ठित्यै पञ्चविंशोऽग्निष्टोमो
भवति प्रजापतेराप्त्यै महाव्रतवानन्नाद्यस्या वरुद्ध्यै विश्वजिथ्
सर्वपृष्ठोऽतिरात्रो भवति सर्वस्याभिजित्यै () ॥ 9

(दिग्भ्य एव ब्रह्मवर्चसमव रुन्धे - अभिजित्यै) (A3)

TS 7.2.4.1

प्रजापतिः प्रजा असृजत ताः सृष्टाः क्षुधं न्यायन्त्स एतं नवरात्रमपश्यत्
तमाऽहरत् तेनायजत ततो वै प्रजाभ्योऽकल्पत यर्हि प्रजाः क्षुधं
निगच्छेयुस्तरहि नवरात्रेण यजेतेमे हि वा एतासां लोका अक्लृप्ता
अथैताः क्षुधं नि गच्छन्तीमानेवाऽऽभ्यो लोकान् कल्पयति तान्
कल्पमानान् प्रजाभ्योऽनु कल्पते कल्पन्ते - [] 10

TS 7.2.4.2

ऽस्मा इमे लोका ऊर्जं प्रजासु दधाति त्रिरात्रेणैवेमं लोकं कल्पयति
त्रिरात्रेणान्तरिक्षं त्रिरात्रेणामुं लोकं यथा गुणे गुणमन्वस्यत्येवमेव
तल्लोके लोकमन्वस्यति धृत्या अशिथिलंभावाय ज्योतिर्गौरायुरिति

ज्ञा॒ताः स्तो॒मा भव॑न्ती॒यं वा॒व ज्यो॑ति॒रन्त॑रि॒क्षं गौ॒रसा॑वायु॒रेष्वे॒व लो॒केषु॑
प्रति॑ तिष्ठन्ति ज्ञा॒त्रं प्र॒जानां॑—[] 11

TS 7.2.4.3

गच्छ॑ति नव॒रात्रो॑ भव॑त्यभि॒पूर्वमे॒वाऽस्मिन् तेजो॑ दधा॒ति यो ज्यो॑गामया॒वी
स्याथ् स नव॒रात्रेण॑ यजे॒त प्रा॒णा हि वा ए॒तस्या धृ॒ता अथै॒तस्य
ज्यो॑गामयति प्रा॒णाने॒वास्मिन् दा॒धारो॒त यदी॒तासु॑र्भव॒ति जी॒वत्ये॒व ॥ 12

(कल्प॑न्ते—प्र॒जनां॑ – त्रय॑स्त्रिंशच्च) (A4)

TS 7.2.5.1

प्र॒जाप॑ति॒रकाम॑य॒त प्र जा॑येयेति॒ स ए॒तं दश॑हो॒तारम॑पश्यत् तम॑जुहोत्
तेन॑ दश॒रात्र॑मसृज॒त तेन॑ दश॒रात्रेण॑ प्रा जा॑य॒त दश॑रात्राय दीक्षिष्यमाणो
दश॑हो॒तारं जुहु॑याद्—दश॑होत्रै॒व दश॑रात्रं सृज॒ते तेन॑ दश॒रात्रेण॑
प्र जा॑य॒ते वैरा॒जो वा ए॒ष य॒ज्ञो यद्दश॑रात्रो य ए॒वं वि॒द्वान्—दश॑रात्रेण
यज॑ते वि॒राज॑मे॒व गच्छ॑ति प्राजाप॒त्यो वा ए॒ष य॒ज्ञो
यद्—दश॑रात्रो—[] 13

TS 7.2.5.2

य एवं वि॒द्वान्-द॒शरा॒त्रेण॒ यज॑ते प्रै॒व जा॑यत इन्द्रो॒ वै स॒दृङ्
 दे॒वता॑भि॒रासी॒थ् स न॑ व्या॒वृत॑मगच्छ॒थ् स प्र॒जाप॑तिमुपा॒धाव॑त् तस्मा॑
 ए॒तं द॒शरा॒त्रं प्रा॑यच्छत् तमा॒ऽहर॑त् तेना॒यज॑त ततो॒ वै सोऽन्या॑भि-
 दे॒वता॑भि-व्या॒वृत॑मगच्छ॒द्य एवं॑ वि॒द्वान् द॒शरा॒त्रेण॒ यज॑ते व्या॒वृत॑मे॒व
 पा॒प्मना॒ भ्रातृ॑व्येण गच्छति त्रि॒क॒कु॒द्वा - [] 14

TS 7.2.5.3

ए॒ष य॒ज्ञो यद्-द॒शरा॒त्रः क॒कुत् प॒ञ्चद॑शः क॒कुदे॑कवि॒ंशः क॒कुत्
 त्रय॑स्त्रि॒ंशो य एवं॑ वि॒द्वान् द॒शरा॒त्रेण॒ यज॑ते त्रि॒क॒कुदे॑व स॒मा॒ना॒नां
 भ॒वति॑ यज॒मानः॑ प॒ञ्चद॑शो यज॒मान॑ एकवि॒ंशो यज॑मानस्त्रयस्त्रि॒ंशः
 पु॒र इ॒तरा॑ अ॒भिच॑र्यमाणो द॒शरा॒त्रेण॒ यजे॑त दे॒वपु॒रा ए॒व पर्यू॑हते तस्य॒
 न कु॑तश्च॒नोपा॑व्या॒धो भ॒वति॑ नैन॒मभि॑चरन्थ् स्तृणु॑ते दे॒वा॒सु॒राः सँय॑त्ता
 आ॒सन् ते॒ दे॒वा ए॒ता - [] 15

TS 7.2.5.4

दे॒वपु॒रा अ॒पश्य॑न् यद्-द॒शरा॒त्रस्ताः॑ पर्यू॑हन्त॒ तेषां॑ न कु॑तश्च॒नोपा॑व्या॒धो
 ऽभ॒वत् ततो॑ दे॒वा अ॒भव॑न् परा॒ऽसु॒रा यो भ्रातृ॑व्यवा॒न्थ् स्या॑थ् स

द॒शरा॒त्रेण॑ यजे॒त दे॒वपु॒रा ए॒व पर्यू॑हते॒ तस्य॑ न कु॒तश्च॒नोपा॒व्याधो॑
भ॒वति॑ भ॒वत्या॒त्मना॑ परा॒ऽस्य॑ भ्रातृ॒व्यो भ॒वति॑ स्तोमः॒

स्तोम॒स्योप॑स्तिर्भ॒वति॑ भ्रातृ॒व्यमे॒वोप॑स्तिं कुरु॒ते जा॒मि वा - [] 16

TS 7.2.5.5

ए॒तत् कु॑र्वन्ति॒ यज्ज्या॒याऽस॑ स्तोम॒मुपे॑त्य॒ कनी॒याऽस॑मु॒पय॑न्ति॒
यद॒ग्नि॒ष्टो-म॑सा॒मान्य॑वस्ता॒च्च पर॑स्ता॒च्च भ॑वन्त्यजा॒मित्वा॒य
त्रि॒वृद॑ग्नि॒ष्टोमो॑ ऽग्नि॒ष्टुदा॑ग्नेयीषु॒ भव॑ति॒ तेज॑ ए॒वाव॑ रुन्धे पञ्च॒दश॑
उ॒क्थ्य॑ ऐ॒न्द्रीष्वि॑न्द्रि॒यमे॒वाव॑ रुन्धे॒ त्रि॒वृद॑ग्नि॒ष्टोमो॑ वै॒श्वदे॒वीषु॑ पु॒ष्टिमे॒वाव॑
रुन्धे॒ सप्त॑द॒शोऽग्नि॒ष्टोमः॑ प्रा॒जाप॑त्यासु॒ तीव्र॑सो॒मो ऽन्ना॑द्यस्या-व॒रुद्ध्य॑
अथो॒ प्रैव॑ तेन॒ जाय॑त - [] 17

TS 7.2.5.6

ए॒कवि॑ऽश उ॒क्थ्यः॑ सौरीषु॒ प्रति॑ष्ठित्या॒ अथो॒ रुच॑मे॒वाऽऽत्म॑न् ध॒त्ते
सप्त॑द॒शोऽग्नि॒ष्टोमः॑ प्रा॒जाप॑त्यासूप॒हव्य॑ उप॒हव॑मे॒व ग॑च्छति॒
त्रि॒णवा॑वग्नि॒ष्टोमा॑व॒भित॑ ऐ॒न्द्रीषु॑ वि॒जित्यै॑ त्रयस्त्रि॑ऽश उ॒क्थ्यो॑
वै॒श्वदे॒वीषु॑ प्रति॑ष्ठित्यै॒ विश्व॑जि॒त् सर्व॑पृ॒ष्ठोऽति॑रा॒त्रो भ॑वति॒
सर्व॑स्या॒भिजित्यै॑ ॥ 18

(प्रजापत्यो वा एष यज्ञो यद् दशरात्र – स्त्रिककुब्धा – एता – वै
– जायत – एकत्रिंशच्च) (A5)

TS 7.2.6.1

ऋतवो वै प्रजाकामाः प्रजां नाऽविन्दन्त तेऽकामयन्त प्रजां सृजेमहि
प्रजामव रुन्धीमहि प्रजां विन्देमहि प्रजावन्तः स्यामेति त
एतमेकादशरात्रमपश्यन् तमाऽहरन् तेनायजन्त ततो वै ते प्रजामसृजन्त
प्रजामवारुन्धत प्रजामविन्दन्त प्रजावन्तोऽभवन्त ऋतवोऽभवन्
तदार्तवाना-मार्तवत्व-मृतूनां वा एते पुत्रास्तस्मा – [] 19

TS 7.2.6.2

-दार्तवा उच्यन्ते य एवं विद्वांस एकादशरात्रमासते प्रजामेव
सृजन्ते प्रजामव रुन्धते प्रजां विन्दन्ते प्रजावन्तो भवन्ति
ज्योतिरतिरात्रो भवति ज्योतिरेव पुरस्ताद्-दधते सुवर्गस्य लोकस्या-
नुख्यात्यै पृष्ठ्यः षडहो भवति षड् वा ऋतवः षट् पृष्ठानि
पृष्ठैरेवर्तून-न्वारोहन्त्यृतुभिः सँवत्सरं ते सँवत्सर एव प्रति तिष्ठन्ति
चतुर्विंशो भवति चतुर्विंशत्यक्षरा गायत्री – [] 20

TS 7.2.6.3

गा॒य॒त्रं ब्र॒ह्मव॑र्च॒सं गा॒य॒त्रि॒यामे॒व ब्र॒ह्मव॑र्च॒से प्र॒ति ति॑ष्ठन्ति
चतु॑श्च॒त्वारि॒ंशो भ॑वति चतु॑ष्च॒त्वारि॒ंशद॑क्षरा त्रि॒ष्टुगि॑न्द्रि॒यं त्रि॒ष्टुप्
त्रि॒ष्टुभ्ये॒वेन्द्रि॑ये प्र॒ति ति॑ष्ठन्त्य॒ष्टाच॑त्वारि॒ंशो भ॑वत्य॒ष्टाच॑त्वारि॒ंशद॑क्षरा
जग॑ती जा॒गताः प॒शवो॑ जग॑त्यामे॒व प॒शुषु॑ प्र॒ति ति॑ष्ठन्त्ये-काद॑शरा॒त्रो
भ॑वति पञ्च॒ वा ऋ॒तव॑ आ॒र्तवाः॑ पञ्च॒र्तुष्वे॒वाऽऽ*र्त॑वेषु सँव॑त्सरे
प्र॒तिष्ठा॑य प्र॒जाम॑व रु॒न्धते॑ ऽति॒रात्रा॑व॒भितो॑ भवतः

प्र॒जायै॑ परि॒गृही॑त्यै ॥ 21

॥
(तस्मा॑द् - गा॒य॒त्र्ये - का॒त्रप॑ञ्चा॒शच्च॑) (A6)

TS 7.2.7.1

ऐ॒न्द्रवा॒यवा॒ग्रान् गृ॑ह्णीया॒द्यः का॒मये॑त यथा पूर्वं प्र॒जाः क॑ल्पे॒रन्नि॑ति
य॒ज्ञस्य॑ वै क्लृ॒प्तिम॑नु प्र॒जाः क॑ल्पन्ते य॒ज्ञस्या-क्लृ॑प्तिम॒नु न
क॑ल्पन्ते यथा पूर्वंमे॒व प्र॒जाः क॑ल्पयति न ज्याया॑ँसं कनी॑यानति
क्राम॑त्यै॒न्द्रवा॒यवा॒ग्रान् गृ॑ह्णीया॒दामया॑विनः प्रा॒णेन॑ वा ए॒ष व्यृ॑द्ध्यते
यस्याऽऽ*म॑यति प्रा॒ण ऐ॒न्द्रवा॒यवः प्रा॒णेनै॒वैनं॑ सम॑दर्धयति
मै॒त्रावरु॑णा॒ग्रान् गृ॑ह्णीरन् येषां दी॒क्षिता॑नां प्र॒मीये॑त-[] 22

TS 7.2.7.2

प्राणा॒पाना॒भ्यां॑ ँ॒वा ए॒ते व्य॑द्ध्यन्ते॒ येषां॑ दी॒क्षिता॑नां॒ प्र॒मी॒य॒ते प्रा॒णापा॒नौ
मि॒त्राव॑रुणौ प्राणा॒पाना॒वेव॑ मु॒खतः॑ परि॒ हर॑न्त आ॒श्विना॑ग्रान् गृह्णीता
ऽऽ*नु॒जाव॑रोऽश्विनौ वै दे॒वाना॑मानुजाव॒रौ प॒श्चेवा॑ग्रं प॒र्यै॒ता-म॑श्विना॒वेत॑स्य
दे॒वता॒ य आ॑नुजाव॒र-स्ता॒वेवै॒नम॑ग्रं परि॒ णय॑तः शु॒क्राग्रा॑न् गृह्णीत ग॒तश्रीः॑
प्रति॑ष्ठाका॒मोऽसौ॒ वा आ॑दि॒त्यः शु॒क्र ए॒षोऽन्तोऽन्तं॑ मनु॒ष्यः - [] 23

TS 7.2.7.3

श्रि॒यै ग॒त्वा नि॑ वर्त॒ते ऽन्ता॑दे॒वाऽन्त॑मा र॒भते॒ न ततः॑ पापी॒यान्
भव॑ति मन्थ्य॒ग्रान् गृह्णी॑ता-भि॒चर॑-न्ना॒र्तपा॑त्रं ँ॒वा ए॒तद्-यन्-म॑न्थिपा॒त्रं
मृ॒त्युनै॑वैनं ग्राह॑यति ता॒जगा॑र्ति॒माच्छ॑त्या-ग्र॒यणा॑ग्रान् गृह्णीत॒ यस्य॑ पि॒ता
पि॒ताम॑हः पु॒ण्यः स्या॑दथ तन्न प्राप्नु॒याद्-वा॒चा वा ए॒ष इ॑न्द्रि॒येण॒
व्य॑द्ध्यते॒ यस्य॑ पि॒ता पि॒ताम॑हः पु॒ण्यो - [] 24

TS 7.2.7.4

भव॑त्यथ तन्न प्राप्नो॒त्युर॑ इ॒वैतद्-य॒ज्ञस्य॑ वा॒गिव॑ यदा॒ग्रय॑णो
वा॒चैवै॑नमिन्द्रि॒येण॒ सम॑दर्ध॒यति॒ न ततः॑ पापी॒यान् भव॑त्यु॒क्थ्या॑ग्रान्
गृह्णी॑ताभि॒चर्य॑माणः सर्वे॑षां॒ ँ॒वा ए॒तत् पा॑त्रा॒णामिन्द्रि॒यं य॑दु॒क्थ्यपा॑त्रञ्

सर्वे॑णै॒वैनमिन्द्रि॑येणाति॒ प्रयु॑ङ्क्ते सरस्वत्य॒भि नो॑ ने॒षि वस्य॑ इति
पुरो॑रुचं॒ कुर्या॑द्-वाग्वै - [] 25

TS 7.2.7.5

सरस्वती॑ वा॒चैवैन॒मति॒ प्रयु॑ङ्क्ते मा त्वत् क्षे॒त्राण्य॑रणानि ग॒न्मेत्या॑ह
मृ॒त्योर्वै॑ क्षे॒त्राण्य॑रणानि तेनै॒व मृ॒त्योः क्षे॒त्राणि॑ न गच्छति पू॒र्णान्
॥
ग्रहा॑न् गृह्णीयादामया॒विनः॑ प्रा॒णान् वा ए॒तस्य॑ शु॒गृच्छति॑ यस्या
ऽऽ*मय॑ति प्रा॒णा ग्रहाः॑ प्रा॒णाने॒वास्य॑ शु॒चो मुञ्च॑त्यु॒त यदी॒तासु॑र्भवति
जी॒वत्ये॒व पू॒र्णान् ग्रहा॑न् () गृह्णीयाद्-यर्हि॑ पर्जन्यो॒ न वर्षे॑त्
प्रा॒णान् वा ए॒तर्हि॑ प्र॒जाना॑ञ् शु॒गृच्छति॑ यर्हि॑ पर्जन्यो॒ न वर्षे॑ति
प्रा॒णा ग्रहाः॑ प्रा॒णाने॒व प्र॒जाना॑ञ् शु॒चो मुञ्च॑ति ता॒जक्
प्र॒ वर्ष॑ति ॥ 26

(प्र॒मीर्ये॑त - म॒नुष्य॑ - ऋ॒द्ध्यते॑ यस्य॑ पि॒ता पि॒ताम॒हः पु॒ण्यो-वाग्वा-
ए॒व पू॒र्णान् ग्रहा॑न्-पञ्च॑विं॒शति॑श्च) (A7)

TS 7.2.8.1

गा॒य॒त्रो वा ऐ॑न्द्रवा॒यवो॑ गा॒य॒त्रं प्रा॑यणीय-मह॒स्तस्मा॑त् प्रा॒यणी॑ये-
ऽह॒नैन्द्र॑वा॒यवो॑ गृह्यते॒ स्व ए॒वैन॑मा॒यत॑ने गृह्णाति॒ त्रैष्टु॑भो॒ वै शु॒क्रस्त्रैष्टु॑भं

द्वितीय-महस्तस्माद् द्वितीयेऽहञ्छुक्रो गृह्यते स्व एवैनमायतने गृह्णाति
जागतो वा आग्रयणो जागतं तृतीय-महस्तस्मात् तृतीयेऽहन्नाग्रयणो
गृह्यते स्व एवैनमायतने गृह्णात्येतद्वै - [] 27

TS 7.2.8.2

यज्ञमापद्-यच्छन्दाऽस्याप्नोति यदाग्रयणः श्वो गृह्यते यत्रैव
यज्ञमदृशन् तत एवैनं पुनः प्रयुङ्क्ते जगन्मुखो वै द्वितीयस्त्रिरात्रो
जागत आग्रयणो यच्चतुर्थेऽहन्नाग्रयणो गृह्यते स्व एवैनमायतने
गृह्णात्यथो स्वमेव छन्दोऽनु पर्यावर्तन्ते राथन्तरो वा ऐन्द्रवायवो
राथन्तरं पञ्चममहस्तस्मात् पञ्चमेऽह - [] 28

TS 7.2.8.3

-नैन्द्रवायवो गृह्यते स्व एवैनमायतने गृह्णाति बार्हतो वै शुक्रो
बार्हतः षष्ठमहस्तस्मात् षष्ठेऽहञ्छुक्रो गृह्यते स्व एवैनमायतने
गृह्णात्येतद्वै द्वितीयं यज्ञमापद्-यच्छन्दाऽस्याप्नोति यच्छुक्रः श्वो
गृह्यते यत्रैव यज्ञमदृशन् तत एवैनं पुनः प्रयुङ्क्ते त्रिष्टुड्मुखो वै
तृतीयस्त्रिरात्रस्त्रैष्टुभः - [] 29

TS 7.2.8.4

शुक्रो यथ् सप्तमेऽहञ्छुक्रो गृह्यते स्व एवैनमायतने गृह्णात्यथो
 स्वमेव छन्दोऽनु पर्यावर्तन्ते वाग्वा आग्रयणो वागष्टममह-
 स्तस्मादष्टमेऽहन्नाग्रयणो गृह्यते स्व एवैनमायतने गृह्णाति
 प्राणो वा ऐन्द्रवायवः प्राणो नवम-महस्तस्मान्नवमे ऽहन्नैन्द्रवायवो
 गृह्यते स्व एवैनमायतने गृह्णात्येत - [] 30

TS 7.2.8.5

-द्वै तृतीयं यज्ञमापद्-यच्छन्दाऽस्याप्नोति यदैन्द्रवायवः श्वो गृह्यते
 यत्रैव यज्ञमदृशन् तत एवैनं पुनः प्रयुङ्क्ते ऽथो स्वमेव छन्दोऽनु
 पर्यावर्तन्ते पथो वा एतेऽद्ध्यपथेन यन्ति येऽन्येनैन्द्रवायवात्
 प्रतिपद्यन्तेऽन्तः खलु वा एष यज्ञस्य यद्-दशम-महर्दशमे
 ऽहन्नैन्द्रवायवो गृह्यते यज्ञस्यै-[] 31

TS 7.2.8.6

-वान्तं गत्वा ऽपथात् पन्थामपि यन्त्यथो यथा वहीयसा प्रतिसारं
 वहन्ति तादृगेव तच्छन्दाऽस्यन्योऽन्यस्य
 लोकमभ्यद्ध्यायन् तान्येतेनैव देवा व्यवाहयन्नैन्द्रवायवस्य वा

ए॒तदा॒यत॒नं॒ यच्च॑तु॒र्थम॒हस्त॑स्मि-न्ना॒ग्रय॑णो गृ॒ह्यते॒ तस्मा॑दा॒ग्रय॑णस्या
 ऽऽ*य॑तने न॒वमे॑ऽह॒नैन्द्र॑वा॒यवो॑ गृ॒ह्यते॒ शुक्र॑स्य॒ वा ए॒तदा॒यत॒नं॒ यत्
 पञ्च॑म - [] 32

TS 7.2.8.7

-म॒हस्त॑स्मि॒नैन्द्र॑वा॒यवो॑ गृ॒ह्यते॒ तस्मा॑दैन्द्र॒वाय॑वस्याऽऽ*य॑तने
 सप्त॑मेऽह॒ञ्छुक्रो॑ गृ॒ह्यत॒ आ॒ग्रय॑णस्य॒ वा ए॒तदा॒यत॒नं॒ यत्
 षष्ठ॑म॒हस्त॑स्मि॒ञ्छुक्रो॑ गृ॒ह्यते॒ तस्मा॑च्छु॒क्रस्या॒ ऽऽ*य॑तनेऽष्ट॑मेऽह॒न्ना॒ग्रय॑णो
 गृ॒ह्यते॒ छन्दा॑स्ये॒व तद्वि॑ वा॒हय॑ति॒ प्र व॑स्य॒सो वि॒वाह॑मा॒प्नोति॒ य ए॒वं
 वे॒दाथो॑ दे॒वता॑भ्य॒ एव॒ यज्ञे॑ स॒विदं॑ दधाति॒ तस्मा॑दिद-
 मन्यो॑ऽन्यस्मै () द॒दाति॑ ॥ 33

(ए॒तद्वै - पञ्च॑मेऽह॒न् - त्रैष्टु॑भ - ए॒तद् - गृ॒ह्यते॒ यज्ञ॑स्य॒ - पञ्च॑म
 - म॒न्यस्मा॑ - ए॒कञ्च॑) (A8)

TS 7.2.9.1

प्र॒जाप॑तिर॒काम॑यत॒ प्र जा॑येयेति॒ स ए॒तं द्वा॑द॒शरा॑त्रम॒पश्य॑त् तमा॒ऽहर॑त्
 तेना॑य॒जत॒ ततो॑ वै स प्रा॒जाय॑त॒ यः का॑मयेत॒ प्र जा॑येयेति॒ स
 द्वा॒दश॑रा॒त्रेण॑ य॒जेत॒ प्रैव॑ जा॒यते॑ ब्र॒ह्मवा॑दि॒नो व॑दन्त्य॒ग्निष्टो॑मप्रा॒यणा॑ य॒ज्ञा

अथ कस्मादतिरात्रः पूर्वः प्र युज्यत इति चक्षुषी वा एते यज्ञस्य
यदतिरात्रौ कनीनिके अग्निष्टोमौ य - [] 34

TS 7.2.9.2

-दग्निष्टोमं पूर्वं प्रयुज्जीरन् बहिर्द्धा कनीनिके
दद्ध्युस्तस्मादतिरात्रः पूर्वः प्र युज्यते चक्षुषी एव यज्ञे धित्वा
मद्ध्यतः कनीनिके प्रति दधति यो वै गायत्रीं ज्योतिःपक्षां वेद
ज्योतिषा भासा सुवर्गं लोकमेति यावग्निष्टोमौ तौ पक्षौ
येऽन्तरेऽष्टावुक्थ्याः स आत्मैषा वै गायत्री ज्योतिःपक्षा य
एवं वेद ज्योतिषा भासा सुवर्गं लोक - [] 35

TS 7.2.9.3

-मेति प्रजापतिर्वा एष द्वादशधा विहितो यद् द्वादशरात्रो यावतिरात्रो
तौ पक्षौ येऽन्तरेऽष्टावुक्थ्याः स आत्मा प्रजापतिर्वावैष सन्धसद्ध
वै सत्रेण स्पृणोति प्राणा वै सत् प्राणानेव स्पृणोति सर्वासां वा एते
प्रजानां प्राणैरासते ये सत्रमासते तस्मात् पृच्छन्ति किमेते सत्रिण
इति प्रियः प्रजानां () मुत्थितो भवति य एवं वेद ॥ 36 (अग्निष्टो
मौ यथ - सुवर्गं लोकं - प्रियः प्रजानां - पञ्च च) (A9)

TS 7.2.10.1

न वा ए॒षोऽन्यतो॑वै॒श्वानरः॑ सु॒वर्गाय॑ लो॒काय॑ प्रा॒भवदू॒र्ध्वो ह॒ वा ए॒ष
आ॒तत॑ आसीत् ते दे॒वा ए॒तं वै॑श्वान॒रं प॒र्यो॑हन्थ सु॒वर्गस्य॑ लो॒कस्य॑
प्रभू॑त्या ऋ॒तवो॑ वा ए॒तेन॑ प्र॒जाप॑तिमयाजयन् तेष्वा॒र्ध्नो॒दधि॑
तदू॒र्ध्नोति॑ ह॒ वा ऋ॒त्विक्षु॑ य ए॒वं वि॒द्वान् द्वा॑द॒शाहे॒न यज॑ते
तेऽस्मि॒न्नैच्छ॑न्त॒ स र॒सम॑ह वस॒न्ताय॑ प्रायच्छ – [] 37

TS 7.2.10.2

द्य॒वं ग्री॒ष्मायौष॑धीर्व॒र्षाभ्यो॑ व्री॒हीञ्छ॑रदे मा॒षति॒लौ हे॑मन्तशि॒शिरा॒भ्यां
तेने॑न्द्रं प्र॒जाप॑तिरयाजयत् ततो॒ वा इन्द्र॑ इन्द्रोऽभ॒वत्
तस्मा॑दाहु॒रानु॑जाव॒रस्य॑ य॒ज्ञ इति॑ स ह्ये॒तेनाऽग्रेऽय॑जतैष ह॒ वै
कु॒णप॑म॒त्ति यः स॒त्रे प्र॑तिगृ॒ह्णाति॑ पु॒रुष॑कु॒णप॑मश्चकु॒णपं॑ गौ॒र्वा अ॒न्नं
येन॑ पा॒त्रेणा॒न्नं बि॑भ्रति॒ यत् तन्न॑ निर्णे॒निज॑ति॒ ततोऽधि॑ – [] 38

TS 7.2.10.3

म॒लं जा॑यत॒ एक॑ ए॒व य॑जेतै॒को हि॑ प्र॒जाप॑तिरा॒र्ध्नो॒द् द्वा॑द॒श
रा॒त्रीर्दी॑क्षितः स्या॒द् द्वा॑द॒श मा॒साः सँ॑व॒त्सरः॑ सँ॑व॒त्सरः॑ प्र॒जाप॑तिः
प्र॒जाप॑तिर्वावैष ए॒ष ह॒ त्वै जा॑यते॒ यस्त॑प॒सोऽधि॑ जा॑यते चतु॒र्धा वा

ए॒तास्ति॒स्रस्ति॒स्रो रा॒त्रयो॒ यद् द्वा॒दशो॒पस॒दो याः प्र॒थ॒मा य॒ज्ञं ताभिः॑
सं भ॑रति॒ या द्वि॒तीया॑ य॒ज्ञं ताभि॑रा र॒भते - [] 39

TS 7.2.10.4

यास्तृ॒तीयाः॑ पा॒त्राणि॑ ताभि॒र्निर्णे॑नित्ते॒ याश्चतु॑र्थीरपि॒ ताभि॑रात्मानमन्तरतः॒
शु॒न्धते॒ यो वा अ॑स्य प॒शुम॑त्ति मा॒ꣳसꣳ सोऽ॒त्ति यः पु॑रोडाशं
म॒स्तिष्कꣳ स॒ यः परि॑वापं पु॒रीषꣳ स॒ य आ॒ज्यं म॒ज्जानꣳ स॒ यः
सोमꣳ स्वेदꣳ सोऽपि॑ ह॒ वा अ॑स्य शी॒र्ष॒ण्या नि॒ष्पदः॑ प्रति॑ गृह्णाति
यो द्वा॒दशा॒हे प्रति॑गृह्णाति॒ तस्मा॑द् द्वा॒दशा॒हेन॑ () न याज्यं पाप्मनो
व्यावृ॑त्त्यै ॥ 40

(अय॑च्छ - दधि॑ - रभते - द्वा॒दशा॒हेन॑ - च॒त्वारि॑ च) (A10)

TS 7.2.11.1

एक॑स्मै स्वाहा॒ द्वाभ्याꣳ स्वाहा॑ त्रि॒भ्यः स्वाहा॑ चतु॒र्भ्यः स्वाहा॑
पञ्च॑भ्यः स्वाहा॒ षड्भ्यः॑ स्वाहा॒ सप्त॑भ्यः स्वाहा॒ ऽष्टा॑भ्यः स्वाहा॑
नव॑भ्यः स्वाहा॒ दश॑भ्यः स्वाहै॑ - का॒दश॑भ्यः स्वाहा॒ द्वा॒दश॑भ्यः स्वाहा॑
त्रयो॑दशभ्यः स्वाहा॒ चतु॑र्दशभ्यः स्वाहा॒ पञ्च॑दशभ्यः स्वाहा॑
षोड॑शभ्यः स्वाहा॒ सप्त॑दशभ्यः स्वाहा॒ ऽष्टा॑दशभ्यः स्वाहै॑ -

कान्न वि॒शत्यै॑ स्वाहा॒ नववि॒शत्यै॑ स्वाहै॒-कान्न च॒त्वारि॒शते॑
स्वाहा॒ नवच॒त्वारि॒शते॑ स्वाहै॒-कान्न () ष॒ष्ट्यै॑ स्वाहा॒ नवष॒ष्ट्यै॑
स्वाहै॒ -कान्ना॒शीत्यै॑ स्वाहा॒ नवा॒शीत्यै॑ स्वाहै॒कान्न श॒ताय॑ स्वाहा
श॒ताय॑ स्वाहा॒ द्वाभ्या॑ श॒ताभ्या॑ स्वाहा॒ सर्व॑स्मै॒ स्वाहा॑ ॥ 41

(नवच॒त्वारि॒शते॑ स्वाहै॒-कान्नैकवि॒शतिश्च॑) (A11)

TS 7.2.12.1

एक॑स्मै॒ स्वाहा॑ त्रि॒भ्यः॑ स्वाहा॒ पञ्च॑भ्यः॒ स्वाहा॑ सप्त॒भ्यः॑ स्वाहा॑
नव॑भ्यः॒ स्वाहै॒-काद॑शभ्यः॒ स्वाहा॑ त्रयोद॒शभ्यः॑ स्वाहा॒ पञ्चद॑शभ्यः॒
स्वाहा॑ सप्तद॒शभ्यः॑ स्वाहै॒कान्न वि॒शत्यै॑ स्वाहा॒ नववि॒शत्यै॑
स्वाहै॒कान्न च॒त्वारि॒शते॑ स्वाहा॒ नवच॒त्वारि॒शते॑ स्वाहै॒कान्न ष॒ष्ट्यै॑
स्वाहा॒ नवष॒ष्ट्यै॑ स्वाहै॒कान्ना शी॒त्यै॑ स्वाहा॒ नवा॒शीत्यै॑ स्वाहै॒कान्न
श॒ताय॑ स्वाहा॒ श॒ताय॑ स्वाहा॒ सर्व॑स्मै॒ स्वाहा॑ ॥ 42

(एक॑स्मै॒ त्रि॒भ्यः॑ - पञ्चा॒शत्) (A12)

TS 7.2.13.1

द्वाभ्या॑ च॒त्वारि॒शते॑ स्वाहा॒ चतु॑र्भ्यः॒ स्वाहा॑ षड्भ्यः॒ स्वाहा॑ ऽष्टा॒भ्यः॑ स्वाहा॑
द॒शभ्यः॑ स्वाहा॒ द्वाद॑शभ्यः॒ स्वाहा॑ चतु॑र्द॒शभ्यः॑ स्वाहा॑

षोड॒श॒भ्यः॑ स्वा॒हा ऽष्टा॒द॒श॒भ्यः॑ स्वा॒हा वि॒ंश॒त्यै॑ स्वा॒हा ऽष्टा॒न॒व॒त्यै॑
स्वा॒हा श॒ताय॑ स्वा॒हा सर्व॑स्मै स्वा॒हा ॥ 43

(द्वा॒भ्याम॒ष्टा॒न॒व॒त्यै॑ – षड्वि॒ंश॒तिः॑) (A13)

TS 7.2.14.1

त्रि॒भ्यः॑ स्वा॒हा प॒ञ्च॒भ्यः॑ स्वा॒हा स॒प्त॒भ्यः॑ स्वा॒हा न॒व॒भ्यः॑ स्वा॒है-
का॒द॒श॒भ्यः॑ स्वा॒हा त्रयो॒द॒श॒भ्यः॑ स्वा॒हा प॒ञ्च॒द॒श॒भ्यः॑ स्वा॒हा
स॒प्त॒द॒श॒भ्यः॑ स्वा॒हैका॒न्न वि॒ंश॒त्यै॑ स्वा॒हा न॒ववि॒ंश॒त्यै॑ स्वा॒हैका॒न्न
च॒त्वारि॒ंश॒ते॑ स्वा॒हा न॒वच॒त्वारि॒ंश॒ते॑ स्वा॒हैका॒न्न ष॒ष्ठ्यै॑ स्वा॒हा
न॒वष॒ष्ठ्यै॑ स्वा॒हैका॒न्ना ऽशी॒त्यै॑ स्वा॒हा न॒वाशी॒त्यै॑ स्वा॒हैका॒न्न श॒ताय॑
स्वा॒हा श॒ताय॑ स्वा॒हा सर्व॑स्मै स्वा॒हा ॥ 44

(त्रि॒भ्यो॑ – ऽष्टा॒च॒त्वारि॒ंश॒त्) (A14)

TS 7.2.15.1

च॒तु॒र्भ्यः॑ स्वा॒हा ऽष्टा॒भ्यः॑ स्वा॒हा द्वा॒द॒श॒भ्यः॑ स्वा॒हा षोड॒श॒भ्यः॑ स्वा॒हा
वि॒ंश॒त्यै॑ स्वा॒हा षण्ण॒व॒त्यै॑ स्वा॒हा श॒ताय॑ स्वा॒हा सर्व॑स्मै स्वा॒हा ॥ 45

(च॒तु॒र्भ्यः॑ षण्ण॒व॒त्यै॑ – षोड॒श॑) (A15)

TS 7.2.16.1

पञ्च॒भ्यः॒ स्वा॒हा द॒श॒भ्यः॒ स्वा॒हा पञ्च॒द॒श॒भ्यः॒ स्वा॒हा वि॒ंश॒त्यै॒
स्वा॒हा पञ्च॒न॒व॒त्यै॒ स्वा॒हा श॒ताय॒ स्वा॒हा स॒र्व॒स्मै॒ स्वा॒हा ॥ 46

(पञ्च॒भ्यः॒ पञ्च॒न॒व॒त्यै॒ – चतु॒र्द॒शः) (A16)

TS 7.2.17.1

द॒श॒भ्यः॒ स्वा॒हा वि॒ंश॒त्यै॒ स्वा॒हा त्रि॒ंश॒ते॒ स्वा॒हा च॒त्वारि॒ंश॒ते॒
स्वा॒हा पञ्चा॒श॒ते॒ स्वा॒हा ष॒ष्ठ्यै॒ स्वा॒हा स॒प्त॒त्यै॒ स्वा॒हा ऽशी॒त्यै॒ स्वा॒हा
न॒व॒त्यै॒ स्वा॒हा श॒ताय॒ स्वा॒हा स॒र्व॒स्मै॒ स्वा॒हा ॥ 47

(द॒श॒भ्यो॒ – द्वावि॒ंश॒तिः) (A17)

TS 7.2.18.1

वि॒ंश॒त्यै॒ स्वा॒हा च॒त्वारि॒ंश॒ते॒ स्वा॒हा ष॒ष्ठ्यै॒ स्वा॒हा ऽशी॒त्यै॒ स्वा॒हा
श॒ताय॒ स्वा॒हा स॒र्व॒स्मै॒ स्वा॒हा ॥ 48

(वि॒ंश॒त्यै॒ – द्वाद॒शः) (A18)

TS 7.2.19.1

पञ्चा॒श॒ते॒ स्वा॒हा श॒ताय॒ स्वा॒हा द्वा॒भ्यां॑ श॒ताभ्या॑ स्वा॒हा त्रि॒भ्यः॒
श॒तेभ्यः॒ स्वा॒हा च॒तु॒र्भ्यः॒ श॒तेभ्यः॒ स्वा॒हा पञ्च॒भ्यः॒ श॒तेभ्यः॒ स्वा॒हा
ष॒ड्भ्यः॒ श॒तेभ्यः॒ स्वा॒हा स॒प्त॒भ्यः॒ श॒तेभ्यः॒ स्वा॒हा ऽष्टा॒भ्यः॒ श॒तेभ्यः॒

स्वाहा नवभ्यः शतेभ्यः स्वाहा सहस्राय स्वाहा सर्वस्मै स्वाहा ॥ 49

(पञ्चाशते – द्वात्रिंशत्) (A19)

TS 7.2.20.1

शताय स्वाहा सहस्राय स्वाहा ज्युताय स्वाहा नियुताय स्वाहा
प्रयुताय स्वाहा ऽर्बुदाय स्वाहा न्यर्बुदाय स्वाहा समुद्राय स्वाहा
मद्ध्याय स्वाहा ऽन्ताय स्वाहा परार्द्धाय स्वाहोषसे स्वाहा व्युष्ट्यै
स्वाहोदेष्ट्यते स्वाहोद्यते स्वाहोदिताय स्वाहा सुवर्गाय स्वाहा लोकाय
स्वाहा सर्वस्मै स्वाहा ॥ 50

(शताया-ऽष्टात्रिंशत्) (A20)

Prasna Korvai with starting Padams of 1 to 20 Anuvaakams :-

(साध्याः षड् रात्रं – कुसुरुबिन्दः सप्तरात्रं – बृहस्पतिरष्टरात्रं –
प्रजापतिस्ताः क्षुधन्नवरात्रं – प्रजापतिरकामयत दशहोतारात्र – मृतव
– ऐन्द्रवायवाग्रान् – गायत्रो वै – प्रजापतिः स द्वादशरात्रं – न वा
– एकस्मा – एकस्मै – द्वाभ्यां – त्रिभ्यः – चतुर्भ्यः – पञ्चभ्यो –
दशभ्यो – विंशत्यै – पञ्चाशते – शताय – विंशतिः)

सप्तमकाण्डे द्वितीयः प्रश्नः

Korvai with starting Padams of 1, 11, 21 Series of Panchaatis :-

(सा॒ध्या – अ॒स्मा इ॒मे लो॒का – गा॒य॒त्रं – वै तृ॒तीय – मे॒क॒स्मै –
पञ्चा॒शत्)

First and Last Padam of Second Prasnam of 7th Kandam

(सा॒ध्याः – सर्व॑स्मै स्वाहा॑)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां सप्तमकाण्डे द्वितीयः प्रश्नः

समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

7.3 सप्तमकाण्डे तृतीयः प्रश्नः – सत्रजातनिरूपणं

TS 7.3.1.1

प्र॒ज॒वं वाँ ए॒तेन॑ य॒न्ति॒ यद्-द॑श॒मम॑हः पा॒पाव॑ही॒यं वाँ ए॒तेन॑ भ॒वन्ति॒
यद्-द॑श॒मम॑ह॒र्यो वै प्र॒ज॒वं य॒ताम॑प॒थेन॑ प्र॒तिप॑द्यते॒ यः स्था॒णुः ह॑न्ति॒
यो भ्रेषं॑ न्येति॒ स ही॑यते॒ स यो वै द॑श॒मेऽह॑न्नवि॒वाक्य॑ उप॒ह॒न्यते॒ स
ही॑यते॒ तस्मै॒ य उप॑ह॒ताय॒ व्याह॑ तमे॒वान्वा॒रभ्य॒ सम॑श्नुतेऽथ

यो व्याह स - [] 1

TS 7.3.1.2

ही॑यते॒ तस्माद्-द॑श॒मेऽह॑न्नवि॒वाक्य॑ उप॒ह॒ताय॒ न व्यु॑च्यमथो॒
ख॒ल्वाहु॑र्य॒ज्ञस्य॒ वै समृ॑द्धेन॒ देवाः॑ सु॒वर्गं॑ लो॒कमा॑यन् य॒ज्ञस्य॒
व्यृ॑द्धेनासुरान् प॒राऽभा॑वयन्निति॒ यत् ख॒लु वै य॒ज्ञस्य॒ समृ॑द्धं तद्-
य॒ज॒मान॑स्य॒ यद्व्यृ॑द्धं तद्भा॒तृव्य॑स्य॒ स यो वै द॑श॒मेऽह॑न्नवि॒वाक्य॑
उप॒ह॒न्यते॒ स ए॒वाति॑ रेचयति॒ ते ये बा॑ह्या दृ॒शीक॑वः - [] 2

TS 7.3.1.3

स्युस्ते वि ब्रूयुर्यदि तत्र न विन्देयुरन्तस्सदसाद्-व्युच्यं यँदि तत्र न
विन्देयुर्गृहपतिना व्युच्यं तद्व्युच्यमेवाथ वा एतथ् सर्पराज्ञिया
ऋग्भिः स्तुवन्तीयं वै सर्पतो राज्ञी यद्वा अस्यां किं चार्चन्ति
यदानृचुस्तेनेय॑ सर्पराज्ञी ते यदेव किं च वाचा
ऽऽनृचुर्यदतोऽद्ध्यर्चितार - [] 3

TS 7.3.1.4

-स्तदुभयमाप्त्वा ऽवरुद्ध्योत् तिष्ठामेति ताभिर्मनसा स्तुवते न वा
इमामश्वरथो नाऽश्वतरीरथः सद्यः पर्याप्तुमर्हति मनो वा इमा॑ सद्यः
पर्याप्तुमर्हति मनः परिभवितुमथ ब्रह्म वदन्ति परिमिता वा ऋचः
परिमितानि सामानि परिमितानि यजू॑ष्यथैतस्यैवान्तो
नास्ति यद्-ब्रह्म तत् प्रतिगृणत आ चक्षीत स () प्रतिगरः ॥ 4

(व्याह स - दृशीकवाँ - ऽर्चितारः - स - एकं च) (A1)

TS 7.3.2.1

ब्रह्मवादिनो वदन्ति किं द्वादशाहस्य प्रथमेनाहृत्विजां यँजमानो
वृङ्ग इति तेज इन्द्रियमिति किं द्वितीयेनेति प्राणानन्नाद्यमिति किं

तृ॒तीये॒नेति॒ त्री॒नि॒मा॒न् लो॒का॒नि॒ति किं॑ च॒तु॒र्थे॒नेति॒ चतु॑ष्पदः प॒शू॒नि॒ति
किं॑ पञ्च॒मे॒नेति॒ पञ्चा॑क्षरां प॒ङ्क्ति॑मिति॒ किञ् ष॒ष्ठे॒नेति॒ षड् ऋ॒तू॒नि॒ति
किञ् सप्त॒मे॒नेति॒ सप्त॑पदाञ् श॒क्व॒री॒मि॒ति – [] 5

TS 7.3.2.2

कि॒म॒ष्ट॒मे॒नेत्य॑ष्टाक्षरां गाय॒त्री॒मि॒ति किं॑ न॒व॒मे॒नेति॒ त्रि॒वृ॒त॒ स्तो॒म॒मि॒ति
किं॑ द॒श॒मे॒नेति॒ दशा॑क्षरां वि॒रा॒ज॒मि॒ति कि॒मे॒का॒द॒शे॒नेत्ये॑कादशाक्षरां
त्रि॒ष्टु॒भ॒मि॒ति किं॑ द्वा॒द॒शे॒नेति॒ द्वाद॑शाक्षरां जग॒ती॒मि॒त्ये॒ता॒व॒द्वा अ॑स्ति
या॒व॒दे॒तद्-या॒व॒दे॒वा॒स्ति त॑देषां वृ॒द्धे ॥ 6

(श॒क्व॒री॒मि॒त्ये – क॒च॒त्वा॒रि॒ञ्श॒च्च) (A2)

TS 7.3.3.1

ए॒ष वा आ॒प्तो द्वा॒द॒शा॒हो यत् त्रयो॑द॒श॒रा॒त्रः स॒मा॒न॒ ह्ये॒तद॒ह॒र्यत्
प्रा॒य॒णी॒यश्चो॒द॒य॒नी॒यश्च॒ त्र्य॒ति॒रा॒त्रो भ॑वति त्रय इ॒मे लो॒का ए॒षां
लो॒का॒ना॒मा॒प्त्यै प्रा॒णो वै प्र॑थ॒मोऽति॒रा॒त्रो व्या॒नो द्वि॒तीयो ऽपान॑स्तृ॒तीयः
प्रा॒णा॒पा॒नो-दा॒ने॒ष्वे॒वा॒न्नाद्ये॑ प्रति तिष्ठन्ति॒ सर्व॑मायुर्यन्ति॒ य ए॒वं
वि॒द्वा॒ञ्स-स्त्रयो॑द॒श॒रा॒त्र-मा॒स॒ते तदा॑हु॒र्वा॒ग्वा ए॒षा वि॑त॒ता – [] 7

TS 7.3.3.2

यद् द्वाद॒शाह॒स्तां वि॒च्छिन्द्यु॑र्यन्म॒द्ध्ये ऽति॒रात्रं॑ कुर्यु॑रुप॒दासु॑का
 गृ॒हप॑ते॒र्वाग् स्या॑-दु॒परि॑ष्टाच्छन्दो॒मानां॑ महा॒व्रतं॑ कुर्वन्ति॒ संत॑तामे॒व
 वाच॑मव रुन्ध॒तेऽनु॑प॒दासु॑का गृ॒हप॑ते॒र्वाग्-भव॑ति प॒शवो॑ वै छन्दो॒मा
 अ॒न्नं महा॒व्रतं॑ यदु॒परि॑ष्टाच्छन्दो॒मानां॑ महा॒व्रतं॑ कुर्वन्ति॒ पशु॑षु चै॒वान्नाद्यै॑
 च॒ प्रति॑ तिष्ठन्ति ॥ 8

(वि॒त॒ता - त्रि॒च॒त्वारि॑ंशच्च) (A3)

TS 7.3.4.1

आ॒दि॒त्या अ॒काम॑यन्तो-भयो॑र्लो॒कयो॑र् ऋ॒द्ध्नुया॑मेति॒ त ए॒तं
 चतु॑र्द॒शरा॒त्र- म॒पश्य॑न् तमा॒ऽहर॑न् तेना॒यज॑न्त॒ ततो॑ वै त उ॒भयो॑-
 लो॒कयो॑-रा॒द्ध्नुव॑न्नस्मि॒श्चा-मु॒ष्मिश्च॑ य ए॒वं वि॒द्वाँस॑-
 श्चतु॑र्द॒शरा॒त्रमा॑सत उ॒भयो॑रे॒व लो॒कयो॑र्. ऋ॒द्ध्नुव॑न्त्यस्मि॒श्चा-
 मु॒ष्मिश्च॑ चतु॑र्द॒शरा॒त्रो भ॑वति स॒प्त ग्रा॒म्या ओ॒षध॑यः स॒प्ताऽऽ*र॑ण्या
 उ॒भयी॑षाम॒वरु॑द्ध्यै यत् प॒राची॑नानि पृ॒ष्ठानि॑ - [] 9

TS 7.3.4.2

भवन्त्यमुमेव तैर्लोकमभि जयन्ति यत् प्रतीचीनानि पृष्ठानि
 भवन्तीममेव तैर्लोकमभि जयन्ति त्रयस्त्रिंशौ मद्ध्यतः स्तोमौ
 भवतः साम्राज्यमेव गच्छन्त्यधिराजौ भवतोऽधिराजा एव समानानां
 भवन्त्यतिरात्रावभितो भवतः परिगृहीत्यै ॥ 10

(पृष्ठानि – चतुस्त्रिंशच्च) (A4)

TS 7.3.5.1

प्रजापतिः सुवर्गं लोकमैत् तं देवा अन्वायन् तानादित्याश्च
 पशवश्चान्वायन् ते देवा अब्रुवन्. यान् पशूनुपाजीविष्म त इमे
 ऽन्वाग्मन्निति तेभ्य एतं चतुर्दशरात्रं प्रत्यौहन् त आदित्याः पृष्ठैः
 सुवर्गं लोकमाऽरोहन् त्र्यहाभ्यामस्मिन् लोके पशून् प्रत्यौहन्
 पृष्ठैरादित्या अमुष्मिन् लोक आद्धनुवन् त्र्यहाभ्यामस्मिन् – [] 11

TS 7.3.5.2

लोके पशवो य एवं विद्वांस-श्चतुर्दशरात्रमासत उभयोरेव
 लोकयोर् ऋद्धनुवन्त्यस्मिंश्चामुष्मिंश्च पृष्ठैरेवाऽमुष्मिन्
 लोक ऋद्धनुवन्ति त्र्यहाभ्यामस्मिन् लोके ज्योतिर्गौरायुरिति त्र्यहो

भवती॒यं वा॒व ज्योति॑रन्तरि॒क्षं गौ॒रसा॑वायु॒रिमा॑ने॒व लो॒का॒नभ्या॑रोहन्ति
यद॒न्यतः॑ पृ॒ष्ठानि॑ स्युर्वि॒विव॑धꣳ स्यान्म॒द्ध्ये पृ॒ष्ठानि॑ भवन्ति

सविवधत्वायौ – [] 12

TS 7.3.5.3

–जो॒ वै वी॒र्यं॑ पृ॒ष्ठान्यो॑ज ए॒व वी॒र्यं॑ म॒द्ध्यतो॑ द॒धते॑ बृह॒द्–रथ॑न्तराभ्यां॑
य॒न्ती॒यं वा॒व रथ॑न्तरमसौ बृह॒दाभ्या॑मे॒व य॒न्त्यथो॑ अ॒नयो॑रे॒व प्रति॑
तिष्ठ॑न्त्ये॒ते वै य॒ज्ञस्या॑ञ्ज॒साय॑नी स्मृ॒ती ताभ्या॑मे॒व सु॒वर्गं॑ लो॒कं य॑न्ति
परा॑ञ्चो वा ए॒ते सु॒वर्गं॑ लो॒कमभ्या॑रोहन्ति ये प॒राची॑नानि
पृ॒ष्ठान्यु॑प॒यन्ति॑ प्र॒त्यङ् त्र्य॒हो भ॑वति प्र॒त्यव॑रूढ्या अथो प्रति॑ष्ठित्या ()
उ॒भयो॑र्लो॒कयो॑र् ऋ॒द्ध्वोत् तिष्ठ॑न्ति चतु॑र्दशै॒तास्ता॑सां॒ या द॑श
द॒शाक्ष॑रा वि॒राडन्नं॑ वि॒राड् वि॒राजै॑वान्नाद्यम॒व रु॑न्धते याश्च॑त॒स्रश्च॑त॒स्रो
दि॒शो दि॒क्ष्वे॒व प्रति॑ तिष्ठ॑न्त्यति॒रात्रा॑व॒भितो॑ भव॒तः परि॑गृहीत्यै ॥ 13

(आध्नु॑वन् त्र्य॒हाभ्या॑मस्मिन् – स॒विव॑धत्वाय – प्रति॑ष्ठित्या –

एक॑त्रिं॒शच्च॑) (A5)

TS 7.3.6.1

इन्द्रो॑ वै स॒दृङ् दे॒वता॑भि॒रासी॒त् स न॑ व्या॒वृत॑मगच्छ॒त् स
 प्र॒जाप॑तिमु॒पाधा॑वत् तस्मा॑ ए॒तं पञ्च॑दशरा॒त्रं प्रा॑यच्छत् तमा॒ऽहर॑त्
 तेना॑यजत॒ ततो॑ वै सो॒ऽन्याभि॑-दे॒वता॑भि-व्या॒वृत॑मगच्छ॒द्य ए॒वं
 वि॒द्वाँ॒सः पञ्च॑दशरा॒त्रमा॑सते व्या॒वृत॑मे॒व पा॒प्मना॑ भ्रातृ॒व्येण॑ गच्छन्ति
 ज्योति॑र्गौरायु॒रिति॑ त्र्य॒हो भ॑वती॒यं वा॑व ज्योति॑रन्तरि॒क्षं - [] 14

TS 7.3.6.2

गौर॑सावायु॒रेष्वे॒व लो॒केषु॑ प्रति॑ तिष्ठन्त्यस॒त्रं वा॑ ए॒तद्-यद॑च्छन्दो॒मं
 य॑च्छन्दो॒मा भ॑वन्ति तेन॒ सत्रं॑ दे॒वता॑ ए॒व पृ॒ष्ठैर॑व रुन्धते
 प॒शूञ्छ॑न्दो॒मैरो॒जो वै वी॒र्यं॑ पृ॒ष्ठानि॑ प॒शवः॑ छन्दो॒मा ओज॑स्ये॒व वी॒र्यं॑
 प॒शुषु॑ प्रति॑ तिष्ठन्ति पञ्च॑दशरा॒त्रो भ॑वति पञ्च॑दशो॒ वज्रो॑ वज्र॒मे॒व
 भ्रातृ॒व्येभ्यः॑ प्र॒ हर॑न्त्यतिरा॒त्राव॑भितो॒ भवत॑ इन्द्रि॒यस्य॑ ()
 परि॑गृहीत्यै ॥ 15

(अ॒न्तरि॑क्ष-मिन्द्रि॒यस्यै॑-कञ्च) (A6)

TS 7.3.7.1

इन्द्रो॑ वै शि॒थिल॑ इ॒वाऽप्र॑तिष्ठित आसी॒थ् सोऽसुरे॑भ्योऽबि॒भेथ् स
 प्र॒जाप॑तिमुपा॒धाव॑त् तस्मा॑ ए॒तं पञ्च॑दशरा॒त्रं व॑ज्रं प्राय॑च्छत्
 तेना॑सुरान् परा॒भाव्य॑ वि॒जित्य॑ श्रिय॑मगच्छदग्नि॒ष्टुता॑ पा॒प्मानं॑ निरद॒हत
 पञ्च॑दशरा॒त्रेणौ॒जो ब॑लमिन्द्रि॒यं वी॑र्यमा॒त्मन् द॑धत् य ए॒वं वि॒द्वाँसः
 पञ्च॑दशरा॒त्रमा॑सते भ्रातृ॒व्याने॒व परा॒भाव्य॑ वि॒जित्य॑ श्रियं
 गच्छ॑न्त्यग्नि॒ष्टुता॑ पा॒प्मानं॑ नि - [] 16

TS 7.3.7.2

द॑हन्ते पञ्च॑दशरा॒त्रेणौ॒जो ब॑लमिन्द्रि॒यं वी॑र्यमा॒त्मन् द॑धत् ए॒ता ए॒व
 प॑श॒व्याः पञ्च॑दश॒ वा अ॑र्धमा॒सस्य॑ रा॒त्रयोऽर्ध॑मा॒सशः॑ सँव॑थ्सर
 आ॑प्यते सँव॑थ्सरं प॒शवोऽनु॑ प्र जा॒यन्ते॑ तस्मा॑त् प॒शव्या॑ ए॒ता ए॒व
 सु॒वर्ग्याः पञ्च॑दश॒ वा अ॑र्धमा॒सस्य॑ रा॒त्रयोऽर्ध॑मा॒सशः॑ सँव॑थ्सर
 आ॑प्यते सँव॑थ्सरः सु॒वर्गो लो॒कस्तस्मा॑त् सु॒वर्ग्या॑ ज्योति॒र्गौरा॑युरि॒ति
 त्र्य॒हो भ॑वती॒यं वा॑व ज्योति॒रन्तरि॑क्षं - [] 17

TS 7.3.7.3

गौरसावायुरिमानेव लोकानभ्यारोहन्ति यदन्यतः पृष्ठानि स्युर्विविवधः७
स्यान्मद्ध्ये पृष्ठानि भवन्ति सविवधत्वायौजो वै वीर्यं पृष्ठान्योज एव
वीर्यं मद्ध्यतो दधते बृहद्-रथन्तराभ्यां यन्तीयं वाव रथन्तरमसौ
बृहदाभ्यामेव यन्त्यथो अनयोरेव प्रति तिष्ठन्त्येते वै यज्ञस्याञ्जसायनी
स्रुती ताभ्यामेव सुवर्गं लोकं - [] 18

TS 7.3.7.4

यन्ति पराञ्चो वा एते सुवर्गं लोकमभ्यारोहन्ति ये पराचीनानि
पृष्ठान्युपयन्ति प्रत्यङ् त्र्यहो भवति प्रत्यवरूढ्या अथो प्रतिष्ठित्या
उभयौलोकयोर् ऋद्ध्वोत् तिष्ठन्ति पञ्चदशैतास्तासां या दश
दशाक्षरा विराडन्नं विराड् विराजैवान्नाद्यमव रुन्धते याः पञ्च
पञ्च दिशो दिक्ष्वेव प्रति तिष्ठन्त्यतिरात्रावभितो भवत इन्द्रियस्य
वीर्यस्य प्रजायै () पशूनां परिगृहीत्यै ॥ 19

(गच्छन्त्यग्निष्टुता पाप्मानं नि-रन्तरिक्षं - लोकं - प्रजायै - द्वे च)
(A7)

TS 7.3.8.1

प्र॒जाप॑ति-र॒काम॑यता॒न्नादः॑ स्या॒मिति॑ स ए॒तꣳ स॑प्तद॒शरा॒त्र-म॑पश्यत्
तमाऽह॑रत् तेना॒यज॑त ततो॒ वै सोऽन्ना॑दोऽभव॑द्य ए॒वं वि॒द्वान्सः॑
सप्त॑दश-रा॒त्रमा॑सते ऽन्ना॒दा ए॒व भव॑न्ति पञ्चा॒हो भव॑ति पञ्च॒ वा
ऋ॒तवः॑ सँव॑त्सर ऋ॒तुष्वे॒व सँव॑त्सरे प्र॒ति तिष्ठ॑न्त्यथो पञ्चाक्ष॑रा
प॒ङ्क्तिः पा॒ङ्क्तो य॒ज्ञो य॒ज्ञमे॒वाऽव॑ रुन्ध॒ते ऽस॒त्रं वा ए॒त- [] 20

TS 7.3.8.2

-द्यद॑छन्दो॒मं यँ॑च्छन्दो॒मा भव॑न्ति तेन स॒त्रं दे॒वता॑ ए॒व पृ॒ष्ठैर॑व
रुन्ध॑ते प॒शूञ्छ॑न्दो॒मैरो॒जो वै वी॒र्यं॑ पृ॒ष्ठानि॑ प॒शवः॑ छन्दो॒मा ओज॑स्ये॒व
वी॒र्यं॑ प॒शुषु॑ प्र॒ति तिष्ठ॑न्ति सप्तद॒शरा॒त्रो भव॑ति सप्तद॒शः प्र॒जाप॑तिः
प्र॒जाप॑ते॒राप्त्या॑ अति॒रात्रा॑व॒भितो॑ भवतोऽन्नाद्य॑स्य परिगृ॒हीत्यै॑ ॥ 21

(ए॒तथ् - स॒प्तत्रिं॑शच्च) (A8)

TS 7.3.9.1

सा वि॒राड् वि॒क्रम्या॑तिष्ठद्-ब्र॒ह्मणा॑ दे॒वेष्व॑न्नेना-सु॒रेषु॑ ते दे॒वा
अ॒काम॑यन्तो॒भयꣳ सं वृ॑ज्जीमहि ब्र॒ह्म चा॒न्नं चे॒ति त ए॒ता
विं॑शतिꣳ रा॒त्रीर॑पश्यन् ततो॒ वै त उ॒भयꣳ स॑मवृज्जत ब्र॒ह्म

चान्नं॑ च ब्र॒ह्मव॑र्च॒सिनो॑ऽन्नादा॒ अभ॒वन्. य ए॒वं वि॒द्वान्स॑ ए॒ता
आस॑त उ॒भय॑मे॒व सँ वृ॑ज्जते ब्र॒ह्म चा॒न्नं च॑ – [] 22

TS 7.3.9.2

ब्र॒ह्मव॑र्च॒सिनो॑ऽन्नादा॒ भव॑न्ति॒ द्वे वा॑ ए॒ते वि॒राजौ॑ तयो॒रेव॑ ना॒ना प्र॑ति
ति॒ष्ठन्ति॑ वि॒शो वै पु॑रु॒षो द॑श॒ हस्त्या॑ अ॒ङ्गुल॑यो द॑श॒ पद्मा॑ यावा॒नेव॑
पु॒रुष॑स्तमा॒प्त्वोत् ति॑ष्ठन्ति॒ ज्योति॑र्गौरा॒युरि॑ति॒ त्र्यहा॑ भ॒वन्तीयं॑ वा॒व
ज्योति॑रन्त॒रिक्षं॑ गौर॒सावा॑यु॒रिमा॑ने॒व लो॒का-न॒भ्यारो॑हन्त्यभि॒पूर्वं
त्र्यहा॑ भ॒वन्त्यभि॑पूर्वमे॒व सु॒वर्गं॑ – [] 23

TS 7.3.9.3

लोक॑म॒भ्यारो॑हन्ति॒ यद॒न्यतः॑ पृ॒ष्ठानि॑ स्युर्वि॒विव॑धꣳ स्यान्म॒द्ध्ये
पृ॒ष्ठानि॑ भ॒वन्ति॑ स॒विव॑ध॒त्वायौ॑जो॒ वै वी॒र्यं॑ पृ॒ष्ठान्यो॑ज ए॒व वी॒र्यं॑
म॒द्ध्यतो॑ द॒धते॑ बृ॒हद्-रथ॑न्त॒राभ्यां॑ य॒न्तीयं॑ वा॒व रथ॑न्त॒रम॒सौ
बृ॒हदा॑भ्यामे॒व य॒न्त्यथो॑ अनयो॒रेव॑ प्र॒ति ति॑ष्ठन्त्ये॒ते वै
य॒ज्ञस्या॑ज्ज॒साय॑नी॒ स्रु॒ती ता॑भ्यामे॒व सु॒वर्गं॑ लोकं॑ य॒न्ति॒ परा॑ञ्चो
वा ए॒ते सु॒वर्गं॑ () लोक॑म॒भ्यारो॑हन्ति॒ ये प॑रा॒चीना॑नि पृ॒ष्ठान्यु॑प॒यन्ति॑

प्रत्यङ् न्यहो भवति प्रत्यवरूढ्या अथो प्रतिष्ठित्या उभयोर्लोकयोर्.
 ऋद्ध्वोत् तिष्ठन्त्यतिरात्रावभितो भवतो ब्रह्मवर्चस-स्यान्नाद्यस्य
 परिगृहीत्यै ॥ 24

(वृञ्जते ब्रह्म चां नं च - सुवर्ग - मेते सुवर्ग - त्रयोविंशतिश्च)
 (A9)

TS 7.3.10.1

असावादित्योऽस्मिन् लोक आसीत् तं देवाः पृष्ठैः परिगृह्य सुवर्गं
 लोकमगमयन् परैरवस्तात् पर्यगृह्णन् दिवाकीर्त्येन सुवर्गे लोके
 प्रत्यस्थापयन् परैः परस्तात् पर्यगृह्णन् पृष्ठैरुपावारोहन्त्स वा
 असावादित्योऽमुष्मिन् लोके परैरुभयतः परिगृहीतो यत् पृष्ठानि
 भवन्ति सुवर्गमेव तैर्लोकं यजमाना यन्ति परैरवस्तात् परि गृह्णन्ति
 दिवाकीर्त्येन - [] 25

TS 7.3.10.2

सुवर्गे लोके प्रति तिष्ठन्ति परैः परस्तात् परि गृह्णन्ति पृष्ठैरुपावारोहन्ति
 यत् परे परस्तान्न स्युः पराञ्चः सुवर्गा-ल्लोकान्निष्पद्येरन्.
 यदवस्तान्न स्युः प्रजा निर्दहेयुरभितो दिवाकीर्त्यं परस्सामानो भवन्ति

सुवर्ग॑ ए॒वैनां॑ लो॒क उ॒भय॑तः परि॑ गृह्णन्ति॒ यज॑माना॒ वै दि॒वाकी॒र्त्यञ्
सँव॑त्सरः॒ पर॑स्सामानोऽभि॒तो दि॒वाकी॒र्त्यं पर॑स्सामानो भवन्ति
सँव॑त्सर ए॒वोभ॑यतः – [] 26

TS 7.3.10.3

प्रति॑ तिष्ठन्ति पृ॒ष्ठं वै दि॒वाकी॒र्त्यं पा॒र्श्वे पर॑स्सामानोऽभि॒तो
दि॒वाकी॒र्त्यं पर॑स्सामानो भवन्ति॒ तस्मा॑द॒भितः॑ पृ॒ष्ठं पा॒र्श्वे
भूयि॑ष्ठा॒ ग्रहा॑ गृह्यन्ते॒ भूयि॑ष्ठञ् शस्यते॒ यज्ञ॑स्यैव तन्मद्ध्यतो
ग्रन्थिं॑ ग्र॒थन्त्य॑वि॒स्रञ्साय॑ स॒प्त गृह्य॑न्ते स॒प्त वै शी॑र्ष॒ण्याः
प्रा॒णाः प्रा॒णाने॒व यज॑मानेषु दधति॒ यत् परा॑ची॒नानि॑ पृ॒ष्ठानि॑
भव॑न्त्यमु॒मेव तै॑-लो॒कम॒भ्यारो॑हन्ति॒ यदि॑मं लो॒कं न – [] 27

TS 7.3.10.4

प्रत्य॑व-रोहे॒युरु॒द्धा मा॒द्येयु॑र्यज॒मानाः॑ प्र वा मीये॒रन् यत् प्र॑ती॒चीना॑नि
पृ॒ष्ठानि॑ भव॑न्तीममेव तै॒र्लो॒कं प्र॑त्य॒वरो॑हन्त्यथो अ॒स्मिन्ने॒व लो॒के प्र॑ति
तिष्ठ॑न्त्यनु॒न्मादा॑येन्द्रो वा अ॒प्रति॑ष्ठित आसी॒त् स प्र॑जापति॒-मुपा॑धावत्

तस्मा॑ ए॒तमे॑कवि॒शति॑रा॒त्रं प्रा॑यच्छत् तमा॒ऽहर॑त् तेना॒यज॑त॒ ततो॑ वै स
प्रत्य॑तिष्ठ॒द्ये बहु॑या॒जिनो॑ ऽप्रति॑ष्ठिताः – [] 28

TS 7.3.10.5

स्यु॑स्त एकवि॒शति॑-रा॒त्रमा॑सीरन् द्वाद॑श मा॒साः पञ्च॑र्तवस्त्रय॑ इ॒मे
लो॒का अ॒सावा॑दि॒त्य एक॑वि॒श ए॒ताव॑न्तो वै दे॒वलो॒कास्ते॒ष्वेव॑ यथा
पूर्व॑ं प्रति॑ तिष्ठन्त्यसा॒वादित्यो॑ न व्य॑रोचत॒ स प्र॒जाप॑तिमुपा॒धाव॑त् तस्मा॑
ए॒तमे॑कवि॒शति॑रा॒त्रं प्रा॑यच्छत् तमा॒ऽहर॑त् तेना॒यज॑त॒ ततो॑ वै सो
ऽरो॑चत॒ य ए॒वं वि॒द्वा॒स एक॑वि॒शति॑रा॒त्रमा॑सते () रोच॑न्त
ए॒वैक॑वि॒शति॑रा॒त्रो भ॑वति रुग्वा॒ एक॑वि॒शो रुच॑मेव गच्छ॒न्त्यथो॑
प्रति॑ष्ठामेव प्रति॑ष्ठा ह्येक॑वि॒शो ऽति॑रा॒त्राव॑भितो भवतो ब्र॒ह्मव॑र्च॒सस्य॑
परि॑गृहीत्यै ॥ 29

(गृ॒ह्णन्ति॑ दि॒वाकी॒र्त्येनै॑ – वो॒भय॑तो – ना – प्र॑ति॒ष्ठिता – आ॑स॒त –
ए॒कवि॒शति॑श्च) (A10)

TS 7.3.11.1

अ॒र्वाङ् य॒ज्ञः सं॑ क्रा॒मत्व॑मुष्मा॒दधि॑ मा॒मभि॑ ।
ऋ॒षीणां॑ यः पु॒रोहि॑तः ॥

निर्दे॑वं॒ निर्वी॑रं कृ॒त्वा विष्क॑न्धं तस्मिन्॑ हीयतां॒ योऽस्मा॑न् द्वेष्टि॑ ।

शरी॑रं य॒ज्ञश॑मलं कु॒सीदं॑ तस्मिन्॑त्सीदतु॒ योऽस्मा॑न् द्वेष्टि॑ ॥

य॒ज्ञ य॒ज्ञस्य॑ यत् तेज॒स्तेन॑ संक्राम॒ माम॑भि ।

ब्रा॒ह्म॒णानृ॒त्विजो॑ दे॒वान् य॒ज्ञस्य॑ तप॒सा ते सवा॑हमा हु॒वे ॥

इष्टे॑न प॒क्वमु॑प – [] 30

TS 7.3.11.2

ते हु॒वे सवा॑हं ।

सं ते वृ॒ज्जे सु॒कृत॑ सं प्र॒जां प॒शून् ॥

प्रैषा॑न्थ-सा॒मिधे॑नी-रा॒घारा॑वाज्यभा॒गावा-श्रु॑तं प्र॒त्याश्रु॑तमा शृ॒णामि॑ ते ।

प्रया॑जा॒नूया॑जान्थ-स्वि॒ष्टकृ॑त-मिडा॒माशि॑ष आ वृ॒ज्जे सु॒वः ॥

अ॒ग्निने॑न्द्रेण॒ सोमे॑न॒ सर॑स्वत्या विष्णु॒ना दे॒वता॑भिः ।

या॒ज्यानु॑वा॒क्याभ्या॑मुप॒ ते हु॒वे सवा॑हं य॒ज्ञमा॑ ददे॒ ते वष॑ट्कृतं ॥

स्तु॒तं श॒स्त्रं प्र॑ति॒गरं॑ ग्र॒हमिडा॑माशि॒ष – [] 31

TS 7.3.11.3

आ वृज्जे सुवः ।

पत्नीसँयाजानुप ते हुवे सवाह॑ समिष्टयजुरा ददे तव ॥

पशून्थ-सुतं पुरोडाशान्थ-सवनान्योत यज्ञं ।

देवान्थ-सेन्द्रानुप ते हुवे सवाह-मग्निमुखान्थ-सोमवतो ये च
विश्वे ॥ 32

(उप - ग्रहमिडांमाशिषो - द्वात्रिंशच्च) (A11)

TS 7.3.12.1

भूतं भव्यं भविष्यद्वषट्थ् स्वाहा नम ऋग् साम यजुर्वषट्थ् स्वाहा
नमो गायत्री त्रिष्टुब् जगती वषट्थ् स्वाहा नमः पृथिव्यन्तरिक्षं
द्यौर्वषट्थ् स्वाहा नमो ऽग्निर्वायुः सूर्यो वषट्थ् स्वाहा नमः प्राणो-
व्यानो-ऽपानो वषट्थ् स्वाहा नमो ऽन्नं कृषि-वृष्टि-वषट्थ् स्वाहा
नमः पितापुत्रः पौत्रो वषट्थ् स्वाहा नमो भूर्भुवः () सुव वषट्थ्
स्वाहा नमः ॥ 33

(भुव - श्रुत्वारि च) (A12)

TS 7.3.13.1

आ॒ मे॒ गृ॒हा भ॒व॒न्त्वा प्र॒जा म॒ आ मा॒ य॒ज्ञो वि॒शतु॑ वी॒र्या॑वान् ।
 आपो॑ दे॒वीर्य॑ज्ञिया॒ माऽऽवि॑शन्तु स॒हस्र॑स्य मा भू॒मा मा प्र॑ हा॒सीत् ॥
 आ॒ मे॒ ग्र॒हो भ॒व॒त्वा पु॒रोरु॑ख् स्तु॒तश॑स्त्रे मा ऽऽ वि॒शता॑ꣳ स॒मीची॑ ॥
 आ॒दि॒त्या रु॒द्रा व॑स॒वो मे॒ सद॒स्याः स॒हस्र॑स्य मा भू॒मा मा प्र॑ हा॒सीत् ॥
 आ माऽग्नि॑ष्टो॒मो वि॑शतू () क्थ्य॑श्चाति॒रात्रो॒ माऽऽ वि॑श॒त्वापि॑शर्व॒रः ।
 तिरो॑अ॒हिया॒ मा सु॒हुता॒ आ वि॑शन्तु स॒हस्र॑स्य मा भू॒मा मा
 प्र॑ हा॒सीत् ॥ 34

(अ॒ग्नि॒ष्टो॒मो वि॑श॒त्व – षा॑द॒श च) (A13)

TS 7.3.14.1

अ॒ग्नि॒ना त॑पोऽन्व॒भवद्-वा॒चा ब्र॑ह्म म॒णिना॑ रू॒पाणी॑न्द्रेण दे॒वान् वा॒तेन॑
 प्रा॒णान्त् सूर्ये॑ण द्यां च॒न्द्रम॑सा नक्ष॒त्राणि॑ य॒मेन॑ पि॒तृन् रा॒जा म॑नु॒ष्यान्
 फ॒लेन॑ नादे॒यान॑ज॒गरे॑ण स॒र्पान् व्या॒घ्रेणा॑ऽऽर॒ण्यान् प॒शूञ्छ्ये॑नेन
 प॒त॒त्रि॒णो वृ॑ष्णाऽश्वा॒नृष॑भेण गा ब॒स्तेना॒जा वृ॑ष्णिनाऽवी॒र्व्रीहि॑णाऽन्ना॒नि

यवे॑नौष॑धी॒र्न्य॒ग्रो॒धेन॑ वन॒स्पती॑नुदु॒ंबरे॑णोर्जं॑ गाय॒त्रिया॑ छन्दा॒सि त्रि॒वृता॑
स्तो॒मान् ब्रा॒ह्म॒णेन॑ () वाचं॑ ॥ 35

(ब्राह्मणेनै – कं च) (A14)

TS 7.3.15.1

स्वाहा॑ऽऽधि॒मा॒धी॒ताय॑ स्वाहा॑ स्वाहा॑ऽऽधी॒तं मन॑से स्वाहा॑ स्वाहा॑ मनः॑
प्र॒जाप॑तये स्वाहा॑ काय॑ स्वाहा॑ कस्मै॑ स्वाहा॑ क॒तम॑स्मै स्वाहा॑ ऽदित्यै॑
स्वाहा॑ ऽदित्यै॑ मह्यै॑ स्वाहा॑ऽदित्यै॑ सुमृ॒डीका॑यै स्वाहा॑ सर॒स्वत्यै॑ स्वाहा॑
सर॒स्वत्यै॑ बृ॒हत्यै॑ स्वाहा॑ सर॒स्वत्यै॑ पाव॒कायै॑ स्वाहा॑ पू॒ष्णे स्वाहा॑
पू॒ष्णे प्र॑प॒थ्याय॑ स्वाहा॑ पू॒ष्णे न॒रन्धि॑षाय स्वाहा॑ त्वष्ट्रे॑ स्वाहा॑ त्वष्ट्रे॑
तु॒रीपा॑य स्वाहा॑ त्वष्ट्रे॑ पु॒रुरूपा॑य स्वाहा॑ () वि॒ष्णवे॑ स्वाहा॑
वि॒ष्णवे॑ नि॒खुर्य॑पाय स्वाहा॑ वि॒ष्णवे॑ नि॒भूय॑पाय स्वाहा॑ सर्व॑स्मै
स्वाहा॑ ॥ 36

(पुरुरूपाय स्वाहा – दशं च) (A15)

TS 7.3.16.1

द॒द्भ्यः॑ स्वाहा॑ ह॒नूभ्या॑ स्वा॒होष्ठा॑भ्या स्वाहा॑ मु॒खाय॑ स्वाहा॑
ना॒सिका॑भ्या स्वाहा॑ ऽक्षी॑भ्या स्वाहा॑ क॒र्णाभ्या॑ स्वाहा॑

पार॑ इक्ष॒वोऽ॒वार्ये॑भ्यः पक्ष्म॑भ्यः स्वाहा॑ ऽवार॑ इक्ष॒वः पा॒र्ये॑भ्यः
 पक्ष्म॑भ्यः स्वाहा॑ शी॒र्ष्णे स्वाहा॑ भ्रू॒भ्या॑ स्वाहा॑ ल॒ला॒टाय॑ स्वाहा॑
 मू॒र्ध्ने स्वाहा॑ म॒स्तिष्का॑य स्वाहा॑ के॒शेभ्यः॑ स्वाहा॑ वहा॑य स्वाहा॑
 ग्री॒वाभ्यः॑ स्वाहा॑ स्क॒न्धेभ्यः॑ स्वाहा॑ की॒कसा॑भ्यः स्वाहा॑ पृ॒ष्ठीभ्यः॑
 स्वाहा॑ पा॒जस्या॑य स्वाहा॑ पा॒श्वाभ्या॑ स्वाहा॑ – [] 37

TS 7.3.16.2

ऽ॒साभ्या॑ स्वाहा॑ दोष॑भ्या स्वाहा॑ बा॒हुभ्या॑ स्वाहा॑
 जङ्घा॑भ्या स्वाहा॑ श्रो॒णीभ्या॑ स्वाहा॑ रु॒भ्या स्वाहा॑ ऽ॒ष्टीवद्भ्या॑
 स्वाहा॑ जङ्घा॑भ्या स्वाहा॑ भ॒सदे॑ स्वाहा॑ शि॒खण्डे॑भ्यः स्वाहा॑
 वा॒ल॒धा॒नाय॑ स्वाहा॑ ऽ॒ण्डाभ्या॑ स्वाहा॑ शे॒पाय॑ स्वाहा॑ रे॒तसे॑ स्वाहा॑
 प्र॒जाभ्यः॑ स्वाहा॑ प्र॒जन॑नाय स्वाहा॑ प॒द्भ्यः स्वाहा॑ श॒फेभ्यः॑ स्वाहा॑
 लो॒मभ्यः॑ स्वाहा॑ त्व॒चे स्वाहा॑ लो॒हि॒ताय॑ स्वाहा॑ मा॒साय॑ स्वाहा॑
 स्ना॒वभ्यः॑ स्वाहा॑ ऽ॒स्थभ्यः॑ स्वाहा॑ म॒ज्जभ्यः॑ स्वाहा॑ () ऽ॒ङ्गेभ्यः॑
 स्वाहा॑ ऽ॒त्मने॑ स्वाहा॑ सर्व॑स्मै स्वाहा॑ ॥ 38

(पा॒श्वाभ्या॑ स्वाहा॑ – म॒ज्जभ्यः॑ स्वाहा॑ – षट् च) (A16)

TS 7.3.17.1

अ॒ञ्ज्ये॒ताय॒ स्वाहा॑ ऽञ्जि॒सक्थाय॒ स्वाहा॑ शि॒तिप॒दे स्वाहा॑
 शि॒ति॒क॒कु॒दे स्वाहा॑ शि॒ति॒र॒न्ध्राय॒ स्वाहा॑ शि॒ति॒पृ॒ष्ठाय॒ स्वाहा॑
 शि॒त्य॒साय॒ स्वाहा॑ पु॒ष्प॒कर्णाय॒ स्वाहा॑ शि॒त्यो॒ष्ठाय॒ स्वाहा॑ शि॒ति॒भ्रवे॒
 स्वाहा॑ शि॒ति॒भ॒सदे॒ स्वाहा॑ श्वे॒तानू॒काशाय॒ स्वाहा॑ ऽञ्ज्ये॒ स्वाहा॑
 ल॒लामा॒य स्वाहा॑ ऽसि॒त॒ज्ञवे॒ स्वाहा॑ कृ॒ष्णै॒ताय॒ स्वाहा॑ रो॒हितै॒ताय॒
 स्वाहा॑ ऽरु॒णै॒ताय॒ स्वाहे॒दृशाय॒ स्वाहा॑ की॒दृशाय॒ स्वाहा॑
 ता॒दृशाय॒ स्वाहा॑ स॒दृशाय॒ स्वाहा॑ वि॒स॒दृशाय॒ स्वाहा॑
 सु॒स॒दृशाय॒ स्वाहा॑ रू॒पाय॒ स्वाहा॑ () सर्व॑स्मै स्वाहा॑ ॥ 39

(रू॒पाय॒ स्वाहा॑ – द्वे च॑) (A17)

TS 7.3.18.1

कृ॒ष्णाय॒ स्वाहा॑ श्वे॒ताय॒ स्वाहा॑ पि॒शङ्गाय॒ स्वाहा॑ सा॒रङ्गाय॒ स्वाहा॑
 ऽरु॒णाय॒ स्वाहा॑ गौ॒राय॒ स्वाहा॑ ब॒भ्रवे॒ स्वाहा॑ न॒कु॒लाय॒ स्वाहा॑ रो॒हि॒ताय॒
 स्वाहा॑ शो॒णाय॒ स्वाहा॑ श्या॒वाय॒ स्वाहा॑ श्या॒माय॒ स्वाहा॑ पा॒क॒लाय॒
 स्वाहा॑ सु॒रू॒पाय॒ स्वाहा॑ ऽनु॒रू॒पाय॒ स्वाहा॑ वि॒रू॒पाय॒ स्वाहा॑ स॒रू॒पाय॒

स्वाहा॑ प्रति॑रूपाय॒ स्वाहा॑ श॒बलाय॒ स्वाहा॑ क॒मलाय॒ स्वाहा॑ पृ॒श्नये॒
स्वाहा॑ पृ॒श्निसक्थाय॒ स्वाहा॑ सर्व॑स्मै स्वाहा॑ ॥ 40

(कृ॒ष्णाय॒ – षट्च॑त्वारि॒ंशत्) (A18)

TS 7.3.19.1

ओष॑धीभ्यः॒ स्वाहा॑ मू॒लेभ्यः॒ स्वाहा॑ तू॒लेभ्यः॒ स्वाहा॑ काण्डे॑भ्यः॒
स्वाहा॑ वल्॒शेभ्यः॒ स्वाहा॑ पु॒ष्पेभ्यः॒ स्वाहा॑ फ॒लेभ्यः॒ स्वाहा॑
गृही॑तेभ्यः॒ स्वाहा॑ ऽगृही॑तेभ्यः॒ स्वाहा॑ ऽव॒पन्नेभ्यः॒ स्वाहा॑ श॒याने॑भ्यः॒
स्वाहा॑ सर्व॑स्मै स्वाहा॑ ॥ 41

(ओष॑धीभ्य – श्रु॒तुर्वि॑ंशतिः) (A19)

TS 7.3.20.1

व॒नस्प॑तिभ्यः॒ स्वाहा॑ मू॒लेभ्यः॒ स्वाहा॑ तू॒लेभ्यः॒ स्वाहा॑ स्कन्धो॑भ्यः॒
स्वाहा॑ शा॒खाभ्यः॒ स्वाहा॑ प॒र्णेभ्यः॒ स्वाहा॑ पु॒ष्पेभ्यः॒ स्वाहा॑ फ॒लेभ्यः॒
स्वाहा॑ गृही॑तेभ्यः॒ स्वाहा॑ ऽगृही॑तेभ्यः॒ स्वाहा॑ ऽव॒पन्नेभ्यः॒ स्वाहा॑
श॒याने॑भ्यः॒ स्वाहा॑ शि॒ष्टाय॒ स्वाहा॑ ऽति॑शि॒ष्टाय॒ स्वाहा॑ परि॑शि॒ष्टाय॒
स्वाहा॑ स॒ंशि॑ष्टाय॒ स्वाहा॑-च्छि॑ष्टाय॒ स्वाहा॑ रि॒क्ताय॒ स्वाहा॑ ऽरि॑क्ताय॒

स्वाहा॑ प्र॒रि॒क्ताय॑ स्वाहा॑ स॒र्त्वि॒क्ताय॑ स्वाहो॑ - द्वि॒क्ताय॑ स्वाहा॑ सर्व॑स्मै
॥
स्वाहा॑ ॥ 42

(वनस्पति॑भ्यः - षट् च॑त्वारि॒ंशत्) (A20)

Prasna Korvai with starting Padams of 1 to 20 Anuvaakams :-

(प्र॒ज॒वं - ब्र॒ह्म॒वा॒दि॒नः॑ कि॒ - मे॒ष॒ वा॒ आ॒प्त - आ॒दि॒त्या॑ उ॒भ॒योः॑ -
प्र॒जा॒प॒ति॒र॒न्वा॒य - त्रि॒न्द्रो॒ वै स॒दृङ् - त्रि॒न्द्रो॒ वै शि॒थि॒लः -
प्र॒जा॒प॒ति॒र॒का॒म॒य॒ता ऽन्ना॒दः॑ - सा॒ वि॒रा॒ड - सा॒वा॒दि॒त्यो॑ - ऽर्वाङ् -
भू॒त - मा॒ मे - ऽग्नि॒ना - स्वा॒हा ऽधि॒न् - द॒द्भ्यो॑ - ज्ये॒ताय॑ -
कृ॒ष्णा - यौष॑धी॒भ्यो - वन॑स्पति॒भ्यो - वि॒ंश॒तिः)

Korvai with starting Padams of 1, 11, 21 Series of Panchaatis :-

(प्र॒ज॒वं - प्र॒जा॒प॒ति - र्यद॑छन्दो॒मं - ते॑ हु॒वे स॒वा॒ह - मोष॑धी॒भ्यो
- द्वि॒च॒त्वारि॒ंशत्)

First and Last Padam of Third Prasnam of 7th Kanda

(प्र॒ज॒व॒ - सर्व॑स्मै स्वा॒हा॑)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां सप्तमकाण्डे तृतीयः प्रश्नः

समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

7.4 सप्तमकाण्डे चतुर्थः प्रश्नः – सत्रकर्मनिरूपणं

TS 7.4.1.1

बृह॒स्पति॑रि॒काम॑यत॒ श्र॒न्मे दे॒वा द॒धीर॑न् गच्छे॒यं पु॒रोधा॑मिति॒ स
ए॒तं च॑तुर्वि॒ंशति॑रा॒त्र-म॑पश्य॒त् तमा॑ऽह॒रत् ते॒नाय॑जत॒ ततो॒ वै तस्मै॒
श्रद्दे॒वा अ॑द॒धता॑गच्छ॒त् पु॒रोधां॑ य॒ एवं वि॒द्वाऽस॑-
श्चतुर्वि॒ंशति॑रा॒त्रमा॑स॒ते श्रद्दे॑भ्यो म॒नुष्या॑ द॒धते॒ गच्छ॑न्ति पु॒रोधां॑
ज्योति॒र्गौरा॑यु॒रिति॑ त्र्य॒हा भ॑वन्ती॒यं वा॑व ज्योति॒रन्तरि॑क्षं
गौर॒सावा॑यु - [] 1

TS 7.4.1.2

-रि॒मा॒ने॒व लो॒का॒नभ्या॑रो॒हन्त्य॑भि पूर्वं त्र्य॒हा भ॑वन्त्य॒भिपूर्व॑मे॒व सु॒वर्गं॑
लो॒कम॑भ्या॒रोह॑न्त्य॒सत्रं॑ वा ए॒तद्-य॑दछ॒न्दोमं॑ य॒च्छन्दो॑मा भ॑वन्ति ते॒न
स॒त्रं दे॒वता॑ ए॒व पृ॒ष्ठैर॑व रु॒न्धते॑ प॒शूञ्छ॑न्दो॒मैरो॒जो वै वी॒र्यं॑ पृ॒ष्ठानि॑
प॒शवः॑ छ॒न्दोमा॑ ओ॒जस्ये॒व वी॒र्यं॑ प॒शुषु॑ प्र॒ति ति॑ष्ठन्ति बृहद्-
रथ॑न्तरा॒भ्यां य॑न्ती॒यं वा॑व रथ॑न्तर॒मसौ॑ बृह॒दाभ्या॑मे॒व - [] 2

TS 7.4.1.3

यन्त्यथो॑ अनयो॑रेव॒ प्रति॑ तिष्ठन्त्ये॒ते वै य॒ज्ञस्या॑ञ्जसायनी॑ सु॒ती
ताभ्यामे॒व सु॒वर्गं॑ लो॒कं य॑न्ति चतुर्विं॒शतिरा॒त्रो भ॑वति
चतुर्विं॒शतिर॑र्धमा॒साः सँव॑त्सरः सँव॑त्सरः सु॒वर्गो लो॒कः
सँव॑त्सर ए॒व सु॒वर्गे लो॒के प्रति॑ तिष्ठन्त्यथो॑ चतुर्विं॒शत्यक्ष॑रा
गाय॒त्री गाय॒त्री ब्र॑ह्मवर्च॒सं गाय॑त्रियै॒व ब्र॑ह्मवर्च॒सम॑व रुन्धते
ऽतिरा॒त्राव॒भितो॑ भवतो ब्रह्मवर्च॒सस्य॑ परिगृही॒त्यै ॥ 3

(असावायु॑ - राभ्यामे॒व - पञ्च॑चत्वारिं॒शच्च॑) (A1)

TS 7.4.2.1

यथा॑ वै म॒नुष्या॑ ए॒वं दे॒वा अ॒ग्र आ॒सन् ते॒ऽकाम॑यन्ताव॒र्तिं पा॒प्मानं॑
मृ॒त्युम॑प॒हत्य॑ दैवीं॑ स॒ऽसदं॑ गच्छे॒मेति॑ त ए॒तं चतुर्विं॒शतिरा॒त्र-
मप॑श्यन् तमा॒ऽहर॑न् तेनायजन्त॒ ततो॑ वै तेऽव॒र्तिं पा॒प्मानं॑ मृ॒त्युम॑प॒हत्य॑
दैवीं॑ स॒ऽसद॑मगच्छन्. य ए॒वं वि॒द्वाँस॑-श्चतुर्विं॒शतिरा॒त्र-
मा॒सते॑ऽव॒र्तिमे॒व पा॒प्मानं॑-मप॒हत्य॑ श्रियं॑ गच्छन्ति श्रीर्.हि
म॒नुष्य॑स्य - [] 4

TS 7.4.2.2

दैवी स॒स॒ज्ज्योति॑रतिरा॒त्रो भ॑वति सु॒वर्ग॑स्य लो॒कस्यानु॑ख्यात्यै
 पृ॒ष्ठयः॑ षड॒हो भ॑वति षड् वा ऋ॒तवः॑ सँव॒थ्सर॑स्तं मा॒सा अ॑र्धमा॒सा
 ऋ॒तवः॑ प्र॒विश्य॑ दैवी॑ स॒स॒सद॑मगच्छन्. य ए॒वं वि॒द्वाँस॑-
 श्रु॒तुर्वि॑शतिरा॒त्रमा॑सते सँव॒थ्सर॑मे॒व प्र॒विश्य॑ वस्यसीँ स॒स॒सदं॑
 गच्छ॑न्ति त्रयस्त्रयस्त्रि॑शा अ॒वस्ता॑द्-भवन्ति त्रयस्त्रयस्त्रि॑शाः
 पर॑स्तात् त्रयस्त्रि॑शैरे॒वोभ॑यतो ऽव॑र्ति पा॒प्मान॑मप॒हत्य॑ दैवी॑ स॒स॒सदं॑
 मद्ध्य॑तो - [] 5

TS 7.4.2.3

गच्छ॑न्ति पृ॒ष्ठानि॑ हि दैवी स॒स॒ज्जामि॑ वा ए॒तत् कु॑र्वन्ति यत्
 त्रयस्त्रयस्त्रि॑शा अ॒न्वञ्चो॑ मद्ध्येऽनि॒रुक्तो॑ भवति तेना॒जाम्यू॑र्ध्वानि
 पृ॒ष्ठानि॑ भवन्त्यू॑र्ध्वाः छन्दो॒मा उ॒भाभ्याँ॑ रू॒पाभ्याँ॑ सु॒वर्गं॑ लो॒कं
 य॑न्त्यस॒त्रं वा॑ ए॒तद्-यद॑छन्दो॒मं य॑च्छन्दो॒मा भ॑वन्ति तेन स॒त्रं दे॒वता॑
 ए॒व पृ॒ष्ठैर॑व रुन्धते प॒शूञ्छन्दो॑मैरो॒जो वै वी॒र्यं॑ पृ॒ष्ठानि॑ प॒शवः॑- [] 6

TS 7.4.2.4

छन्दो॑मा ओज॑स्येव वी॒र्ये॑ प॒शुषु॑ प्रति॑ तिष्ठन्ति॒ त्रय॑स्त्रयस्त्रि॒ंशा
 अव॑स्ताद्-भवन्ति॒ त्रय॑स्त्रयस्त्रि॒ंशाः पर॑स्तान्मद्ध्ये॑ पृ॒ष्ठान्युरो॑ वै
 त्रय॑स्त्रि॒ंशा आ॒त्मा पृ॒ष्ठान्या॒त्मन॑ ए॒व तद्-यज॑मानाः शर्म
 नह्य॑न्तेऽना॒र्त्ये बृ॒हद्-रथ॑न्तराभ्यां॑ य॒न्तीयं॑ वा॒व रथ॑न्तरमसौ
 बृ॒हदा॒भ्यामे॒व य॒न्त्यथो॑ अनयो॒रेव॑ प्रति॑ तिष्ठन्त्ये॒ते वै
 य॒ज्ञस्याञ्ज॑सायनी॒ सु॒ती ता॒भ्यामे॒व - [] 7

TS 7.4.2.5

सु॒वर्गं लो॒कं य॑न्ति॒ परा॑ञ्चो॒ वा ए॒ते सु॒वर्गं लो॒कम॒भ्यारो॑हन्ति
 ये प॒राची॑नानि॒ पृ॒ष्ठान्यु॑पयन्ति॒ प्रत्य॑ङ् षड॒हो भ॑वति॒ प्रत्य॑वरूढ्या॒ अथो॑
 प्रति॑ष्ठित्या॒ उ॒भयो॑र्लो॒कयोर् ऋ॒द्ध्वोत् तिष्ठ॑न्ति॒ त्रिवृ॑तोऽधि॒ त्रिवृ॑तमु॒प
 य॑न्ति॒ स्तोमा॑नाञ् संप॑त्त्यै प्र॒भवा॑य॒ ज्योति॑रग्नि॒ष्टोमो॑ भ॒वत्य॑यं वा॒व स
 क्षयो॑ऽस्मादे॒व तेन॑ क्षया॒न्न य॑न्ति॒ चतु॑र्विंशति॒रात्रो॑ भ॒वति॑
 चतु॑र्विंशति॒रर्द्ध॑मा॒साः सँव॑त्सरः () सँव॑त्सरः सु॒वर्गो लो॒कः
 सँव॑त्सर ए॒व सु॒वर्गे लो॒के प्रति॑ तिष्ठन्त्यथो॒ चतु॑र्विंशत्यक्षरा॒ गाय॑त्री

गा॒य॒त्री ब्र॒ह्मव॑र्च॒सं गा॒य॒त्रियै॑व ब्र॒ह्मव॑र्च॒सम॑व रु॒न्ध॒ते ऽति॒रा॒त्राव॑भि॒तो
भव॑तो ब्र॒ह्मव॑र्च॒सस्य॑ परि॒गृही॑त्यै ॥ 8

(म॒नु॒ष्य॑स्य – म॒ध्य॒तः – प॒श॒व – स्ता॒भ्या॑मे॒व – सँव॑त्सर –
श्च॒तुर्वि॑ंश॒तिश्च॑) (A2)

TS 7.4.3.1

ऋ॒क्षा वा इ॒यम॑लो॒मका॑ऽऽसी॒थ् सा॑ऽका॒मय॑तौष॒धीभि॑-र्व॒नस्प॑तिभिः
प्र जा॑येयेति सै॒तास्त्रि॑ंश॒तं रा॒त्रीर॑पश्यत् ततो वा इ॒यमो॑ष॒धीभि॑-
र्व॒नस्प॑तिभिः प्राजाय॑त ये प्र॒जाका॑माः प॒शुका॑माः स्युस्त ए॒ता
आ॑सी॒रन् प्रै॒व जा॑यन्ते प्र॒जया॑ प॒शुभि॑रियंँ वा अ॒क्षुद्ध्य॑थ् सै॒तां
ँवि॒राज॑मपश्यत् तामा॒त्मन् धि॒त्वाऽन्ना॑द्य॒मवा॑ रु॒न्धौष॑धी – [] 9

TS 7.4.3.2

-र्व॒नस्प॑तीन् प्र॒जां प॒शून् ते॒नाव॑र्द्धत सा जे॒मानं॑ म॒हिमा॑न-मगच्छ॒द्य
ए॒वं ँवि॒द्वाँस॑ ए॒ता आ॑सते वि॒राज॑मे॒वाऽऽ*त्म॑न् धि॒त्वाऽन्ना॑द्य॒मव॑
रु॒न्ध॒ते व॑र्द्धन्ते प्र॒जया॑ प॒शुभि॑र्जे॒मानं॑ म॒हिमा॑नं गच्छन्ति
ज्योति॑रति॒रात्रो॑ भवति सु॒वर्ग॑स्य लो॒कस्या॑नु॒ख्यात्यै॑ पृ॒ष्ठ्यः षड॑हो

भवति षड् वा ऋतवः षट् पृष्ठानि पृष्ठैरेवर्तूनन्वा-रोहन्त्यृतुभिः

सँवथ्सरं ते सँवथ्सर एव - [] 10

TS 7.4.3.3

प्रति तिष्ठन्ति त्रयस्त्रिंशत् त्रयस्त्रिंशमुप यन्ति यज्ञस्य संतत्या
अथो प्रजापतिर्वै त्रयस्त्रिंशः प्रजापतिमेवाऽऽ*रभन्ते प्रतिष्ठित्यै
त्रिणवो भवति विजित्या एकविंशो भवति प्रतिष्ठित्या अथो
रुचमेवाऽऽ*त्मन् दधते त्रिवृदग्निष्टुद्-भवति पाप्मानमेव तेन
निर्दहन्तेऽथो तेजो वै त्रिवृत् तेज एवाऽऽत्मन् दधते पञ्चदश
इन्द्रस्तोमो भवतीन्द्रियमेवाव - [] 11

TS 7.4.3.4

रुन्धते सप्तदशो भवत्यन्नाद्यस्या वरुद्ध्या अथो प्रैव तेन जायन्त
एकविंशो भवति प्रतिष्ठित्या अथो रुचमेवाऽऽ*त्मन् दधते
चतुर्विंशो भवति चतुर्विंशतिरर्द्धमासाः सँवथ्सरः सँवथ्सरः
सुवर्गो लोकः सँवथ्सर एव सुवर्गे लोके प्रति तिष्ठन्त्यथो एष वै

वि॒षू॒वान् वि॒षू॒वन्तो॑ भवन्ति॒ य एवं॑ वि॒द्वा॒ऽस ए॒ता आ॒सते॑
चतुर्वि॒ंश॒ात् पृ॒ष्ठान्यु॑प॒ यन्ति॑ सँव॒त्सर॑ ए॒व प्र॒ति॒ष्ठाय॑ – [] 12

TS 7.4.3.5

दे॒वता॑ अ॒भ्यारो॑हन्ति॒ त्रय॑स्त्रि॒ंश॒ात् त्रय॑स्त्रि॒ंश॒मुप॑ यन्ति॒
त्रय॑स्त्रि॒ंश॒द्वै दे॒वता॑ दे॒वता॑स्वे॒व प्र॒ति ति॑ष्ठन्ति॒ त्रि॒णवो॑ भव॒तीमे॑ वै
लो॒कास्त्रि॑ण॒व ए॒ष्वे॒व लो॒केषु॑ प्र॒ति ति॑ष्ठन्ति॒ द्वा॒वे॒कवि॒ंशौ॑ भव॒तः
प्र॒ति॒ष्ठित्या॑ अथो॒ रुच॑मे॒वाऽऽ॒त्मन् द॑धते॒ ब॒हवः॑ षोड॒शि॒नो भव॑न्ति॒
तस्मा॑द्-ब॒हवः॑ प्र॒जासु॑ वृ॒षा॒णो य॑दे॒ते स्तो॒मा व्य॑तिष॒क्ता भव॑न्ति॒
तस्मा॑दि॒य -मो॑ष॒धीभि॑-र्व॒नस्प॑तिभि॒-र्व्य॑तिष॒क्ता - [] 13

TS 7.4.3.6

व्य॑तिष॒ज्यन्ते॑ प्र॒जया॑ प॒शुभि॑र्य॒ एवं॑ वि॒द्वा॒ऽस ए॒ता आ॒सते॑ ऽक्लृ॒प्ता
वा ए॒ते सु॒वर्गं॑ लो॒कं य॑न्त्युच्चाव॒चान् हि॑ स्तो॒मानु॑प॒यन्ति॒ यदे॒त
ऊ॒र्ध्वाः क्लृ॒प्ताः स्तो॒मा भव॑न्ति॒ क्लृ॒प्ता ए॒व सु॒वर्गं॑ लो॒कं
य॑न्त्यु॒भयो॑रे॒भ्यो लो॒कयोः॑ कल्प॒ते त्रि॒ंश॒दे॒तास्त्रि॒ंश॒दक्ष॑रा वि॒राड॑न्नं
वि॒राड् वि॒राजै॑वान्नाद्य॒मव॑ रुन्ध॒ते ऽति॑रा॒न्नाव॑भितो॒ भव॑तो॒ ऽन्नाद्य॑स्य
परि॑गृही॒त्यै ॥ 14

(ओषधीः - सँवथ्सर एवा - ऽव - प्रतिष्ठाय - व्यतिषक्त्यै -
कात्रपञ्चाशच्च) (A3)

TS 7.4.4.1

प्रजापतिः सुवर्गं लो॒कमै॒त् तं दे॒वा येन॑येन छन्द॒साऽनु प्रायु॑ञ्जत
तेन॒ नाऽऽ*प्नु॑वन् त ए॒ता द्वात्रिं॑शत॒ञ् रात्री॑रपश्यन् द्वात्रिं॑शदक्षरा
ऽनुष्टु॒गा-नुष्टु॑भः प्रजापतिः स्वेनै॒व छन्द॒सा प्रजापति॑-माप्त्वा
ऽभ्या॒रुह्य सुवर्गं लो॒कमाय॑न्. य ए॒वं वि॒द्वा॒ऽस ए॒ता आस॑ते
द्वात्रिं॑शदे॒ता द्वात्रिं॑शदक्षरा ऽनुष्टु॒गा-नुष्टु॑भः प्रजापतिः स्वेनै॒व
छन्द॒सा प्रजापति॑माप्त्वा श्रियं गच्छन्ति - [] 15

TS 7.4.4.2

श्रीर्.हि मनु॑ष्यस्य सुवर्गो लो॒को द्वात्रिं॑शदे॒ता द्वात्रिं॑शदक्षरा-
ऽनुष्टु॒ग्-वागनुष्टु॑फ् सर्वा॑मे॒व वाच॑माप्नुवन्ति सर्वे वा॒चो वदि॑तारो
भवन्ति॒ सर्वे॒ हि श्रियं गच्छन्ति॒ ज्योति॑र्गौरायुरिति त्र्यहा भवन्ती॒यं
ँवाव ज्योति॑रन्तरि॒क्षं गौर॑सावायुरि॒माने॒व लो॒कान॒भ्यारो॑हन्त्यभिपूर्व

त्र्य॒हा भ॒वन्त्य॒भिपूर्॒वमे॒व सु॒वर्गं॑ लो॒कम॒भ्यारो॑हन्ति बृ॒हद्-रथ॑न्त॒राभ्यां॑

य॑न्ती - [] 16

TS 7.4.4.3

-यं॑ वा॒व रथ॑न्त॒रम॒सौ बृ॒हदा॒भ्यामे॒व य॒न्त्यथो॑ अ॒नयो॑रे॒व प्र॒ति
ति॒ष्ठन्त्ये॒ते वै य॒ज्ञस्या॑ञ्ज॒साय॑नी सु॒ती ता॒भ्यामे॒व सु॒वर्गं॑ लो॒कं य॑न्ति
परा॑ञ्चो॒ वा ए॒ते सु॒वर्गं॑ लो॒कम॒भ्यारो॑हन्ति ये प॒राच॑स्त्र्य॒हानु॑प॒यन्ति
प्र॒त्यङ् त्र्य॒हो भ॒वति॑ प्र॒त्यव॑रूढ्या॒ अथो॑ प्र॒तिष्ठि॑त्या उ॒भयो॑र्लो॒कयोर्.
ऋ॒द्ध्वोत् ति॒ष्ठन्ति॒ द्वात्रिं॑श॒देता॑स्ता॒सां या॑ स्त्रिं॒शत्
त्रिं॒शद॑क्षरा () वि॒राड॑न्नं॒ वि॒राड् वि॒राजै॑वाऽन्नाद्य॒मव॑ रुन्ध॒ते ये
द्वे अ॒होरा॒त्रे ए॒व ते उ॒भाभ्या॑ञ् रू॒पाभ्या॑ञ् सु॒वर्गं॑ लो॒कं
य॑न्त्यति॒रात्रा॑व॒भितो॑ भ॒वतः॑ परिगृही॒त्यै ॥ 17

(गच्छ॑न्ति - य॑न्ति - त्रिं॒शद॑क्षरा - द्वाविं॑शतिश्च) (A4)

TS 7.4.5.1

द्वे वा॒व दे॒वस॒त्रे द्वा॒दशा॑हश्चै॒व त्रय॑स्त्रिं॒शद॑हश्च॒ य ए॒वं
वि॒द्वाञ् स॒स्त्रय॑स्त्रिं॒शद॑हमा॒सते॑ सा॒क्षादे॒व दे॒वता॑ अ॒भ्यारो॑हन्ति
यथा॑ ख॒लु वै श्रे॒यान॑भ्या॒रूढः॑ का॒मय॑ते॒ तथा॑ करोति॒ यद्य॑व॒विद्ध्य॑ति

पापी॑यान् भवति॑ यदि॑ ना॒ववि॒द्ध्यति॑ स॒दृङ् य ए॒वं

वि॒द्वा॒स॒स्त्रयस्त्रि॑- श॒द॒हमा॑सते॒ वि पा॒प्मना॑ भ्रातृ॑व्येणाऽऽ* वर्त॑न्ते

ऽह॒र्भाजो॑ वा ए॒ता दे॒वा अ॒ग्र आऽह॑र - [] 18

TS 7.4.5.2

-न्न॒हरे॒को ऽभ॑जता-ह॒रेक॒स्ताभि॒र्वेते॑ प्र॒बाहु॑गा॒ध्नुवन्॑. य ए॒वं

वि॒द्वा॒स॒स्त्रयस्त्रि॑-श॒द॒हमा॑सते॒ सर्व ए॒व प्र॒बाहु॑गृ॒ध्नुवन्ति॑ सर्वे॒

ग्रा॒मणी॑यं प्राप्नु॑वन्ति पञ्चा॒हा भव॑न्ति पञ्च॒ वा ऋ॒तवः॑ सँव॑त्सर

ऋ॒तुष्वे॒व सँव॑त्सरे॒ प्रति॑ तिष्ठ॒न्त्यथो॑ पञ्चाक्ष॑रा प॒ङ्क्तिः पाङ्क्तो॑ य॒ज्ञो

य॒ज्ञमे॒वाव रु॑न्धते॒ त्री॒ण्याश्चि॒नानि॑ भव॑न्ति त्रय॑ इ॒मे लो॒का ए- [] 19

TS 7.4.5.3

-ष्वे॒व लो॒केषु॑ प्रति॑ तिष्ठ॒न्त्यथो॑ त्री॒णि वै य॒ज्ञस्यै॑न्द्रि॒याणि॑ ता॒न्येवा॑व

रु॑न्धते वि॒श्वजि॑द्-भ॒वत्य॒न्नाद्य॑स्या॒ वरु॑द्ध्यै॒ सर्व॑पृ॒ष्ठो भव॑ति

सर्व॑स्या॒भिजि॑त्यै॒ वाग्वै॑ द्वा॒दशा॒हो यत् पु॒रस्ता॑द् द्वा॒दशा॒ह-मु॒पेयु॑र॒नाप्तां॑

वा॒च-मु॒पेयु॑-रु॒पदा॑सु॒कैषां॑ वा॒ख् स्या॑-दु॒परि॑ष्टाद् द्वा॒दशा॒हमु॒प

यन्त्याप्तामेव वाचमुप यन्ति तस्मा-दुपरिष्ठाद्-वाचा वदामो

ऽवान्तरं - [] 20

TS 7.4.5.4

वै दशरात्रेण प्रजापतिः प्रजा असृजत यद्-दशरात्रो भवति प्रजा
एव तद् यजमानाः सृजन्त एतां ह वा उदङ्कः शौल्बायनः
सत्रस्यर्द्धिमुवाच यद् दशरात्रो यद् दशरात्रो भवति सत्रस्यर्द्ध्या
अथो यदेव पूर्वेष्वहस्सु विलोम क्रियते तस्यैवैषा शान्तिर्द्व्यनीका
वा एता रात्रयो यजमाना विश्वजिथ् सहातिरात्रेण पूर्वाः षोडश सहा
() तिरात्रेणोत्तराः षोडश य एवं विद्वांसस्त्रयस्त्रिंशदहमासत
ऐषां द्व्यनीका प्रजा जायते ऽतिरात्रावभितो भवतः परिगृहीत्यै ॥ 21

(अहर- त्रेष्व - वान्तरं - षोडश सह - सप्तदश च) (A5)

TS 7.4.6.1

आदित्या अकामयन्त सुवर्गं लोकमियामेति ते सुवर्गं लोकं न
प्राजानन्न सुवर्गं लोकमायन् त एतं षट्त्रिंशद्वात्र-मपश्यन्
तमाहरन् तेनायजन्त ततो वै ते सुवर्गं लोकं प्राजानन्थ सुवर्गं

लोक॑मा॒यन्॒. य॒ एवं॑ वि॒द्वा॒ऽसः॑ षट्त्रि॒ंशद् रा॒त्रमा॑सते सुव॒र्गमे॒व
लोकं॑ प्र॒ जान॑न्ति सुव॒र्गं लोकं॑ य॒न्ति ज्योति॑रतिरा॒त्रो – [] 22

TS 7.4.6.2

भव॑ति ज्योति॑रे॒व पु॒रस्ता॑द् दध॑ते सुव॒र्गस्य॑ लो॒कस्या॑नु॒ख्यात्यै॑ षड॒हा
भव॑न्ति षड् वा ऋ॒तव॑ ऋ॒तुष्वे॒व प्र॒ति तिष्ठ॑न्ति च॒त्वारो॑ भव॑न्ति च॒तस्रो॑
दि॒शो दि॒क्ष्वे॒व प्र॒ति तिष्ठ॑न्त्यस॒त्रं वा॑ ए॒तद्-यद॑छन्दो॒मं य॑च्छन्दो॒मा
भव॑न्ति तेन॑ स॒त्रं दे॒वता॑ ए॒व पृ॒ष्ठैर॑व रु॒न्धते॑ प॒शूञ्छन्दो॑मैरो॒जो वै वी॒र्यं॑
पृ॒ष्ठानि॑ प॒शवः॑ छन्दो॒मा ओज॑स्ये॒व – [] 23

TS 7.4.6.3

वी॒र्यं प॒शुषु॑ प्र॒ति तिष्ठ॑न्ति षट्-त्रि॒ंशद् रा॒त्रो भव॑ति षट्त्रि॒ंशद॑क्षरा
बृ॒हती॑ बा॒र्हताः॑ प॒शवो॑ बृ॒हत्यै॑व प॒शून॑व रु॒न्धते॑ बृ॒हती॑ छन्द॒सा
स्वा॒राज्य॑मा॒श्नुता॑-श्नु॒वते॒ स्वा॒राज्यं॑ य॒ एवं॑ वि॒द्वा॒ऽसः॑ षट्त्रि॒ंशद्
रा॒त्रमा॑सते सुव॒र्गमे॒व लोकं॑ य॒न्त्यति॑रा॒त्राव॑भि॒तो भव॑तः सुव॒र्गस्य॑
लो॒कस्य॑ परि॒गृही॑त्यै ॥ 24

(अ॒ति॒रा॒त्र – ओज॑स्ये॒व – षट्त्रि॒ंशच्च॑) (A6)

TS 7.4.7.1

वसिष्ठो ह॒तपु॒त्रोऽकाम॑यत वि॒न्देय॑ प्र॒जाम॒भि सौ॑दा॒सान् भवे॑यमि॒ति
स ए॒तमे॑कस्मा-न्नपञ्चा॒श-मप॑श्यत् तमाऽह॒रत् तेना॑यजत॒ ततो॒ वै
सोऽवि॑न्दत प्र॒जाम॒भि सौ॑दा॒सान् भव॑द्य॒ एवं वि॒द्वाँस॑ एकस्मा-
न्नपञ्चा॒शमा॑सते वि॒न्दन्ते॑ प्र॒जाम॒भि भ्रातृ॑व्यान् भवन्ति
त्रय॑स्त्रिवृ॒तोऽग्नि॑ष्टोमा भवन्ति वज्र॑स्यैव मुख॑ँ स॒ ष॑ श्यन्ति
दश॑ पञ्चद॒शा भव॑न्ति पञ्चद॒शो वज्रो॒ - [] 25

TS 7.4.7.2

वज्र॑मेव भ्रातृ॑व्येभ्यः प्र हर॑न्ति षोड॒शि॒मद्-दश॑ममह॒-र्भव॑ति
वज्र॑ ए॒व वी॒र्यं॑ दधति॒ द्वाद॑श सप्तद॒शा भव॑न्त्यन्नाद्य॒स्या वरु॑द्ध्य
अथो॒ प्रैव॑ तैर्जा॑यन्ते पृ॒ष्ठ्यः षड॒हो भव॑ति षड्वा ऋ॒तवः॑ षट् पृ॒ष्ठानि॑
पृ॒ष्ठैरेव॑र्तूनन्वारो॑हन्त्यृ॒तृभिः॑ सँव॑त्सरं ते सँव॑त्सर ए॒व प्रति॑ तिष्ठन्ति
द्वाद॑शैकवि॒ंशा भव॑न्ति प्रति॑ष्ठित्या अथो रुच॑मेवाऽऽत्मन्- [] 26

TS 7.4.7.3

दध॑ते ब॒हवः॑ षोड॒शि॒नो भव॑न्ति विजि॑त्यै षडा॑श्चि॒नानि॑ भवन्ति षड्वा
ऋ॒तव॑ ऋ॒तुष्वे॒व प्रति॑ तिष्ठन्त्यूनातिरि॒क्ता वा ए॒ता रात्र॑य ऊ॒नास्तद्-

यदेकस्यै न पञ्चाशद-तिरिक्तास्तद्-यद्-भूयसी-रष्टाचत्वारिंशत
ऊनाच्च खलु वा अतिरिक्ताच्च प्रजापतिः प्राजायत ये प्रजाकामाः
पशुकामाः स्युस्त एता आसीरन् प्रैव जायन्ते प्रजया ()
पशुभिर्वैराजो वा एष यज्ञो यदेकस्मा-न्नपञ्चाशो य एवं विद्वाँस्
एकस्मा-न्नपञ्चाशमासते विराजमेव गच्छन्त्यन्नादा भवन्त्यति-
रान्नावभितो भवतोऽन्नाद्यस्य परिगृहीत्यै ॥ 27

(वज्र - आत्मन् - प्रजया - द्वाविंशतिश्च) (A7)

TS 7.4.8.1

सँवथ्सराय दीक्षिष्यमाणा एकाष्टकायां दीक्षेरन्नेषा वै सँवथ्सरस्य
पत्नी यदेकाष्टकैतस्यां वा एष एताँ रात्रिँ वसति साक्षादेव
सँवथ्सरमारभ्य दीक्षन्त आर्तं वा एते सँवथ्सरस्याभि दीक्षन्ते
य एकाष्टकायां दीक्षन्ते ऽन्तनामानावृतू भवतो व्यस्तं वा एते
सँवथ्सरस्याऽभि दीक्षन्ते य एकाष्टकायां दीक्षन्तेऽन्तनामानावृतू
भवतः फल्गुनी पूर्णमासे दीक्षेरन् मुखं वा एतथ् - [] 28

TS 7.4.8.2

सँव॑थ्स॒रस्य॒ यत् फ॑ल्गुनी पूर्ण॑मा॒सो मु॑ख॒त ए॒व सँव॑थ्स॒रमा॒रभ्य॑
 दी॒क्षन्ते॒ तस्यै॑कै॒व नि॒र्या य॑त् सा॒म्मे॒ध्ये वि॒षूवा॑न्थ् संप॑द्यते
 चि॒त्रापूर्॑ण॒मासे॑ दी॒क्षेर॑न् मु॒खं वा॑ ए॒तथ् सँव॑थ्स॒रस्य॒ यच्चि॑त्रापूर्॒णमा॒सो
 मु॑ख॒त ए॒व सँव॑थ्स॒रमा॒रभ्य॑ दी॒क्षन्ते॒ तस्य॑ न का च॒न नि॒र्या भ॑वति
 चतु॑रहे पु॒रस्ता॑त् पौ॒र्णमा॒स्यै दी॒क्षेर॑न् तेषा॑मेका॒ष्टका॑यां क्र॒यः सं प॑द्यते
 तेनै॑का॒ष्टकां॑ न छ॒म्बट् कु॑र्वन्ति तेषां॑ – [] 29

TS 7.4.8.3

पूर्व॑पक्षे सु॒त्या सं प॑द्यते पूर्व॑पक्षं मा॒सा अ॒भि सं प॑द्यन्ते ते पूर्व॑पक्ष
 उ॒त् ति॑ष्ठन्ति तानु॑त्तिष्ठ॒त ओष॑धयो व॒नस्प॑तयोऽनू॒त् ति॑ष्ठन्ति तान्
 क॒ल्या॒णी की॒र्तिर॑नू॒त् ति॑ष्ठत्य॒राथ् सु॒रिमे॑ यज॒माना॑ इति॒ तद॑नु॒ सर्वे॑
 रा॒द्धनु॑वन्ति ॥ 30

(ए॒त – छ॒म्बट्कु॑र्वन्ति तेषां॑ – चतु॑स्त्रि॒ंशच्च॑) (A8)

TS 7.4.9.1

सु॒वर्गं वा॑ ए॒ते लो॒कं य॑न्ति॒ ये स॒त्रमु॑प॒यन्त्य॒भीन्ध॑त ए॒व
 दी॒क्षा॑भि॒रात्मा॑न॒ श्र॑पयन्त॒ उप॑स॒द्भिर्द्वा॒भ्यां लो॒माव॑ द्यन्ति॒

द्वाभ्यां॑ त्वचं॑ द्वाभ्यामसृद् द्वाभ्यां॑ मा॒ऽसं द्वाभ्यामस्थि॑ द्वाभ्यां॑
मज्जान॑मा॒त्मदक्षिणं॑ वै स॒त्रमा॒त्मानमे॒व दक्षिणां॑ नी॒त्वा सु॒वर्गं॑
ँलोकं॑ य॒न्ति शि॒खामनु॑ प्र वप॒न्त ऋ॒द्ध्या अथो॑ रघीया॒ऽसः
सुवर्गं॑ ँलोकम॒यामेति॑ () ॥ 31

(सुवर्गं – पञ्चाशत्) (A9)

TS 7.4.10.1

ब्रह्म॑वादि॒नो वद॑न्त्यति॒रात्रः पर॑मो य॒ज्ञक्रतू॑नां कस्मात् तं प्रथ॑ममुप
य॒न्तीत्ये॒तद्वा अ॒ग्निष्टोमं॑ प्रथ॑ममुप य॒न्त्यथो॒क्थ्यमथ॑ षोड॒शिन्-
मथाति॑रात्र-मनु॒पूर्वमे॒वैतद्-य॒ज्ञक्रतू॑नुपेत्य ताना॒लभ्य॑ परिगृह्य
सोममे॒वैतत् पि॑बन्त आसते ज्योति॑ष्टोमं प्रथ॑ममुप यन्ति ज्योति॑ष्टोमो
वै स्तोमा॑नां मुखं मुख॑त ए॒व स्तोमा॑न् प्र यु॒ञ्जते ते - [] 32

TS 7.4.10.2

स॒ऽस्तुता॑ वि॒राज॑म॒भि सं प॑द्यन्ते द्वे चर्चा॑वति रिच्येते एक॑या
गौरति॑रिक्त एक॑याऽऽयु॒रूनः सु॒वर्गो वै लो॒को ज्योति॑रूर्ग-वि॒राट्-
थ्सु॒वर्गमे॒व तेन॑ लो॒कं य॒न्ति रथ॑न्तरं दि॒वा भव॑ति रथ॑न्तरं

न॒क्त॒मि॒त्याहु॑-ब्र॒ह्म॒वादि॒नः॑ के॒न तद॒जामी॑ति सौ॒भरं॑ तृ॒तीय॒सव॒ने
ब्र॒ह्म॒सामं॑ बृ॒हत् तन्म॑द्ध्यतो द॒धति॑ वि॒धृत्यै॑ तेना॒जामि॑ ॥ 33

(त - ए॒कान्न॑पञ्चा॒शच्च॑) (A10)

TS 7.4.11.1

ज्योति॑ष्टोमं प्रथ॒ममु॑प॒ यन्त्य॒स्मिन्ने॒व तेन॑ लो॒के प्रति॑ तिष्ठन्ति गो॒ष्टोमं॑
द्वि॒तीय॒मुप॑ यन्त्यन्तरि॒क्ष ए॒व तेन॑ प्रति॑ तिष्ठन्त्यायु॒ष्टोमं॑ तृ॒तीय॒मुप॑
यन्त्यमु॒ष्मिन्ने॒व तेन॑ लो॒के प्रति॑ तिष्ठन्तीयं वा॒व ज्योति॑रन्तरि॒क्षं
गौ॒रसा॒वायु॑-र्यदे॒तान्थ्-स्तो॒मा-नु॒पय॑न्त्येष्वे॒व तल्लो॒केषु॑ स॒न्निः
प्रति॑ तिष्ठन्तो यन्ति॒ ते सञ्स्तु॑ता वि॒राज॑ - [] 34

TS 7.4.11.2

-म॒भि संप॑द्यन्ते द्वे चर्चा॒वति॑ रिच्येते॒ एक॑या गौ॒रति॑रिक्त
एक॑याऽऽयु॒रूनः॑ सु॒वर्गो॑ वै लो॒को ज्योति॑रूर्ग-वि॒राडूर्ज॑-मे॒वाव
रुन्ध॑ते ते न क्षु॒धा ऽऽर्ति॑मा॒र्च्छन्त्य॑क्षो॒धुका॑ भवन्ति क्षु॒थ् संबा॑धा इ॒व
हि स॒न्निः॑ ऽग्नि॒ष्टोमा॒वभितः॑ प्र॒धी तावु॑क्थ्या म॒द्ध्ये नभ्यं॑ तत् तदे॒तत्
परि॑यद्-दे॒वच॒क्रं यदे॒तेन॑ - [] 35

TS 7.4.11.3

षड॒हे॒न॒ य॒न्ति॑ दे॒व॒च॒क्र॒मे॒व॒ स॒मा॒रो॒ह॒न्त्य॑रि॒ष्ट्यै॒ ते॒ स्व॒स्ति॒ स॒म॒श्नु॑व॒ते॒
 षड॒हे॒न॒ य॒न्ति॑ षड्वा॒ ऋ॒त॒व॒ ऋ॒तु॒ष्वे॒व॒ प्र॒ति॑ ति॒ष्ठ॒न्त्यु॒भय॑तो॒ ज्यो॒ति॒षा॒
 य॒न्त्यु॒भय॑त॒ ए॒व॒ सु॒व॒र्गे॒ लो॒के॒ प्र॒ति॒ति॒ष्ठ॒न्तो॒ य॒न्ति॑ द्वौ॒ षड॒हौ॒ भ॒व॒त॒स्तानि॑
 द्वा॒द॒शा॒हा॒नि॒ सं॒ प॒द्य॒न्ते॒ द्वा॒द॒शो॒ वै॒ पु॒रु॒षो॒ द्वे॒ स॒क्थ्यौ॑ द्वौ॒ बा॒हू॒ आ॒त्मा॒
 च॒ शि॒रश्च॑ च॒त्वार्य॑ङ्गानि॒ स्तनौ॑ द्वा॒द॒शौ॒ – [] 36

TS 7.4.11.4

तत् पु॒रु॒ष॒म॒नु॒ पर्या॑व॒र्त॒न्ते॒ त्रयः॑ षड॒हा॒ भ॒व॒न्ति॒ तान्य॑ष्टा॒द॒शा॒हा॒नि॒
 सं॒ प॒द्य॒न्ते॒ न॒वा॒न्या॒नि॒ न॒वा॒न्या॒नि॒ न॒व॒ वै॒ पु॒रु॒षे॒ प्रा॒णा॒स्तत् प्रा॒णान॑नु॒
 पर्या॑व॒र्त॒न्ते॒ च॒त्वारः॑ षड॒हा॒ भ॒व॒न्ति॒ तानि॑ च॒तुर्विं॑शति॒रहा॑नि॒ सं॒ प॒द्य॒न्ते॒
 च॒तुर्विं॑शति॒रर्ध॑मा॒साः॒ सँ॒व॒त्स॒र॒स्तथ् सँ॒व॒त्स॒र॒म॒नु॒ पर्या॑व॒र्त॒न्ते॒
 ऽप्र॑ति॒ष्ठि॒तः सँ॒व॒त्स॒र॒ इति॑ ख॒लु॒ वा॒ आ॒हु॒र्वर्षी॑यान् प्र॒ति॒ष्ठा॒या॒
 इत्ये॒ता॒व॒द्वै () सँ॒व॒त्स॒र॒स्य॒ ब्रा॒ह्म॒णं॒ या॒व॒न्मा॒सो॒ मा॒सि॒मा॒स्ये॒व॒
 प्र॒ति॒ति॒ष्ठ॒न्तो॒ य॒न्ति॑ ॥ 37

(वि॒राज॑ – मे॒तेन॑ – द्वा॒द॒शा – वे॒ता॒व॒द्वा – अ॒ष्टौ च॑) (A11)

TS 7.4.12.1

मेष॑स्त्वा प॒चतै॑रवतु॒ लो॒हित॑ग्रीवः॒ छा॒गैः॑ श॒ल्मलि॑र्वृ॒द्ध्या॑ प॒र्णो ब्र॑ह्मणा
प्ल॒क्षो मे॑धेन॒ न्यग्रो॑धश्च॒मसै॑रु॒दुम्बर॑ ऊ॒र्जा गा॑यत्री छ॒न्दोभि॑स्त्रिवृ॒थ्
स्तोमै॑रवन्तीः॒ स्थाव॑न्तीस्त्वाऽवन्तु॒ प्रि॒यं त्वा॑ प्रि॒याणां॑ ँवर्षि॒ष्ठमा॑प्यानां
नि॒धीनां॑ त्वा नि॒धिप॑ति॒ हवाम॑हे वसो मम ॥ 38

(मेषः – षट् त्रिंशत्) (A12)

TS 7.4.13.1

कू॒प्याभ्यः॑ स्वाहा॒ कू॒ल्याभ्यः॑ स्वाहा॒ वि॒कर्या॑भ्यः॒ स्वाहा॑ ऽव॒त्याभ्यः॑
स्वाहा॒ ख॒न्याभ्यः॑ स्वाहा॒ ह॒द्याभ्यः॑ स्वाहा॒ सू॒द्याभ्यः॑ स्वाहा॒
स॒रस्या॑भ्यः॒ स्वाहा॑ वै॒शन्ती॑भ्यः॒ स्वाहा॑ प॒ल्वल्या॑भ्यः॒ स्वाहा॑
व॒र्ष्याभ्यः॑ स्वाहा॒ ऽव॒र्ष्याभ्यः॑ स्वाहा॒ ह्रा॒दुनी॑भ्यः॒ स्वाहा॑ पृ॒ष्वाभ्यः॑
स्वाहा॒ स्य॑न्द॒माना॑भ्यः॒ स्वाहा॑ स्था॒वरा॑भ्यः॒ स्वाहा॑ ना॒देयी॑भ्यः॒ स्वाहा॑
सै॒न्धवी॑भ्यः॒ स्वाहा॑ स॒मु॒द्रिया॑भ्यः॒ स्वाहा॑ सर्वा॑भ्यः॒ स्वाहा॑ ॥ 39

(कू॒प्याभ्यः – श्र॒त्वारि॑ंशत्) (A13)

TS 7.4.14.1

अ॒द्भ्यः॑ स्वा॒हा वह॑न्ती॒भ्यः॑ स्वा॒हा परि॒वह॑न्ती॒भ्यः॑ स्वा॒हा सम॑न्तं
व॑हन्ती॒भ्यः॑ स्वा॒हा शी॒घ्रं व॑हन्ती॒भ्यः॑ स्वा॒हा शी॒भं व॑हन्ती॒भ्यः॑
स्वा॒होग्रं॑ व॑हन्ती॒भ्यः॑ स्वा॒हा भी॒मं व॑हन्ती॒भ्यः॑ स्वा॒हाऽम्भो॑भ्यः॑ स्वा॒हा
न॒भोभ्यः॑ स्वा॒हा म॒होभ्यः॑ स्वा॒हा सर्व॑स्मै स्वा॒हा ॥ 40

(अ॒द्भ्य - ए॒कान्न॒त्रि॒ंशत्) (A14)

TS 7.4.15.1

यो अ॒र्वन्तं॑ जिघा॑सति॒ तम॑भ्यमीति॒ वरु॑णः ॥
प॒रो म॑र्तः प॒रः श्वा ॥
अ॒हं च॒ त्वं च॑ वृ॒त्रह॑न्त्सं ब॒भूव॑ स॒निभ्य॑ आ ।
अ॒राती॒वा चि॑द॒द्रि॒वोऽनु॑ नौ शू॒र म॑स॒तै भ॒द्रा इन्द्र॑स्य रा॒तयः॑ ॥
अ॒भि क्र॑त्वेन्द्र॒ भूर॑ध ज॒मन्न॑ ते वि॒व्यड्म॑हि॒मान॑ र॒जासि॑ ।
स्वे॒ना हि॑ वृ॒त्रश्वा॑सा ज॒घन्थ॑ न श॒त्रुरन्तं॑ वि॒विद॑द् ()
यु॒धा ते॑ ॥ 41

(वि॒विद॑द् - द्वे च॑) (A15)

TS 7.4.16.1

नमो॑ रा॒ज्ञे नमो॑ वरु॒णाय॑ नमो॑ऽश्वा॒य नमः॑ प्र॒जाप॑तये नमो॑ऽधि॒पतये॑
 ऽधि॒पतिर॑स्यधि॒पतिं॑ मा कु॒र्वधि॑पतिर॒हं प्र॒जानां॑ भूयासं॑ मां धेहि॑ मयि॑
 धे॒ह्युपा॑कृताय॒ स्वाहा॑ ऽऽल॒ब्धाय॑ स्वाहा॑ हु॒ताय॑ स्वाहा॑ ॥ 42

(नम – एकान्न त्रिंशत्) (A16)

TS 7.4.17.1

मयो॑भूर्वातो॑ अ॒भि वा॒तूस्त्रा॑ ऊ॒र्जस्व॑तीरोष॒धीरा॑ रि॒शन्तां॑ ।
 पी॒वस्व॑तीर्जीव॒धन्याः॑ पिब॒न्त्वव॑साय॒ प॒द्वते॑ रु॒द्र मृ॒ड ॥
 याः स॒रूपा॑ वि॒रूपा॑ ए॒करू॑पा या॒साम॑ग्नि॒रिष्ट्या॑ ना॒मानि॑ वेद॑ ।
 या अ॒ङ्गिर॑सस्तप॒सेह॑ च॒क्रुस्ता॑भ्यः प॒र्जन्य॑ महि॒ शर्म॑ यच्छ ॥
 या दे॒वेषु॑ त॒नुव॑मैरयन्त॒ यासां॑ सोमो॒ विश्वा॑ रू॒पाणि॑ वेद॑ ।
 ता अ॒स्मभ्यं॑ पय॒सा पि॒न्वमा॑नाः प्र॒जाव॑तीरिन्द्र – [] 43

TS 7.4.17.2

गो॒ष्ठे रि॒रीहि॑ ॥
 प्र॒जाप॑तिर्म॒ह्यमे॒ता र॑रा॒णो वि॒श्वैर्दे॒वैः पि॒तृभिः॑ सँवि॒दानः॑ ।
 शि॒वाः स॒तीरु॑प नो गो॒ष्ठमा॑ऽक॒स्तासां॑ व॒यं प्र॒जया॑ सँ स॒देम॑ ॥

इ॒ह धृ॒तिः स्वा॒हेह वि॒धृतिः॑ स्वा॒हेह रन्तिः॑ स्वा॒हेह र॒मतिः॑ स्वाहा
म॒हीमू षु॑ सु॒त्रामा॑णं ॥ 44

(इन्द्रा - षात्रि॑श्च) (A17)

TS 7.4.18.1

कि॒ञ्च स्वि॒दासी॑त् पू॒र्वचि॑त्तिः कि॒ञ्च स्वि॒दासी॑द्-बृ॒हद्वयः॑ ।
कि॒ञ्च स्वि॒दासी॑त् पि॒शंगि॑ला कि॒ञ्च स्वि॒दासी॑त् पि॒लिप्पि॑ला ॥
द्वौरा॑सीत् पू॒र्वचि॑त्तिरश्च आसी॑द् बृ॒हद्वयः॑ ।
रात्रि॑रासीत् पि॒शङ्गि॑ला ऽवि॒रासी॑त् पि॒लिप्पि॑ला ॥
कः स्वि॒देका॑की च॒रति॑ क उ॒ स्विज्जा॑यते पुनः ।
कि॒ञ्च स्वि॒द्धिम॑स्य भे॒षजं॑ कि॒ञ्च स्वि॒दाव॑पनं म॒हत् ॥
सूर्य॑ एका॒की च॒रति॑ - [] 45

TS 7.4.18.2

च॒न्द्रमा॑ जा॒यते॑ पुनः ।
अ॒ग्निर्. हि॒मस्य॑ भे॒षजं॑ भू॒मिरा॑वपनं म॒हत् ॥
पृ॒च्छामि॑ त्वा प॒रम॑न्तं पृथि॒व्याः पृ॒च्छामि॑ त्वा भु॒वन॑स्य नाभिं ॥

पृ॒च्छामि॑ त्वा वृ॒ष्णो अ॒श्वस्य॑ रे॒तः पृ॒च्छामि॑ वा॒चः प॒रमं॑ व्यो॒म ॥

वेदि॑माहुः प॒रमन्तं॑ पृ॒थिव्या॑ य॒ज्ञमाहु॑ भु॒वनस्य॑ नाभिं॑ ।

सोम॑माहुर्वृ॒ष्णो अ॒श्वस्य॑ रे॒तो ब्र॒ह्मैव॑ वा॒चः प॒रमं॑ व्यो॒म ॥ 46

(सूर्य॑ ए॒काकी॑ च॒रति॑ - षट्च॑त्वारि॒ंशच्च॑) (A18)

TS 7.4.19.1

अ॒ंबे अ॒ंबाल्यं॑बि॒के न मा॑ नयति॒ कश्च॑न ।

स॒सस्त्य॑श्च॒कः ॥

सु॒भगे॑ का॒पील॑वा॒सिनि॑ सु॒वर्गे॑ लो॒के सं प्रो॑र्ण॒वाथां॑ ।

आऽह॑म॒जानि॑ गर्भ॒धमा॑ त्वम॒जासि॑ गर्भ॒धं ॥

तौ स॒ह च॒तुरः॑ प॒दः सं प्र॑ सा॒रया॑व॒है ॥

वृ॒षा वाꣳ रे॒तोधा॑ रे॒तो द॒धातू॑थ् स॒क्थ्योꣳर्गृ॑दं धै॒ह्यज्जि॑मु॒दज्जि॑मन्व॒ज ।

यः स्त्री॑णां जी॒वभो॑जनो॒ य आ॑सां - [] 47

TS 7.4.19.2

बि॒लधा॑वनः ।

प्रि॒यः स्त्री॑णाम॒पीच्यः॑ ॥

य आ॑सां कृ॒ष्णे लक्ष्म॑णि॒ सदि॑र्गृदिं प॒राव॑धीत् ॥

अ॒ंबे अ॒ंबाल्यं॑बि॒के न मा॑ य॒भति॑ क॒श्चन॑ ।

स॒सस्त्य॑श्च॒कः ॥

ऊ॒र्ध्वा-मे॒नामु॑च्छ्र॒यता॑द्-वे॒णुभा॑रं गि॒रावि॑व ।

अ॒थास्या॑ म॒द्ध्यमे॑धता॒ ऽ शी॒ते वा॑ते पु॒नन्नि॑व ॥

अ॒ंबे अ॒ंबाल्यं॑बि॒के न मा॑ य॒भति॑ क॒श्चन॑ ।

स॒सस्त्य॑श्च॒कः ॥

य॒द्धरि॑णी य॒वम॑त्ति न - [] 48

TS 7.4.19.3

पु॒ष्टं प॒शु म॑न्यते ।

शू॒द्रा य॑दर्य॒जारा॑ न पो॒षाय॑ ध॒नाय॑ति ॥

अ॒ंबे अ॒ंबाल्यं॑बि॒के न मा॑ य॒भति॑ क॒श्चन॑ ।

स॒सस्त्य॑श्च॒कः ॥

इ॒यं य॑का श॒कुन्ति॑का ऽऽह॒लमि॑ति सर्प॒ति ।

आ॒हतं॑ ग॒भे प॑सो नि ज॒ल्गुली॑ति धा॒णिका॑ ॥

अ॒ंबे अ॒ंबाल्यं॑बि॒के न मा॑ य॒भति॑ क॒श्चन॑ ।

स॒स॒स्त्यश्च॒कः ॥

मा॒ता च॑ ते पि॒ता च॑ तेऽग्रं॑ वृ॒क्षस्य॑ रो॒हतः॑ () । 49

TS 7.4.19.4

प्र सु॒ला॒मीति॑ ते पि॒ता ग॒भे मु॒ष्टि॒मत॑स्यत् ॥

द॒धि॒क्राव्.॒ण्णो॑ अ॒कारि॑षं जि॒ष्णो॒रश्च॑स्य वा॒जिनः॑ ।

सु॒र॒भि नो॑ मु॒खा क॒रत् प्र॒ण आ॒यू॒षि ता॑रिषत् ॥

आपो॑ हि ष्ठा म॒योभु॒वस्ता॑ न ऊ॒र्जे द॑धातन ।

म॒हे॒र॒णाय॑ चक्ष॒से ॥

यो वः॑ शि॒वत॑मो र॒सस्त॑स्य भाज॒यते॑ह नः ।

उ॒श॒ती॒रिव॑ मा॒तरः॑ ॥

तस्मा॑ अ॒रं ग॒माम॑ वो॒ यस्य॑ क्ष॒याय॑ जि॒न्वथ॑ () ।

आपो॑ ज॒नय॑था च नः ॥ 50

(आ॒सा - म॒त्ति न - रो॒हतो॑ - जि॒न्वथ॑ - च॒त्वारि॑ च) (A19)

TS 7.4.20.1

भूर्भु॒वः सु॒वर्व॑सवस्त्वा ऽज्जन्तु॑ गा॒य॒त्रेण॑ छ॒न्दसा॑ रु॒द्रास्त्वा॑ ऽज्जन्तु॑
त्रै॒ष्टु॒भेन॑ छ॒न्दसा॑, ऽऽदि॒त्यास्त्वा॑ ऽज्जन्तु॑ जा॒गते॑न छ॒न्दसा॑ यद्-वा॒तो

अ॒पो अ॒ग॒म॒दि॒न्द्र॒स्य॑ त॒नु॒वं प्रि॒यां ।

ए॒त॒७ स्तो॑त॒रे॒ते॒न॑ प॒था पु॒न॒र॒श्च॒मा॑ वर्त॒या॒सि॑ नः ॥

ला॒जी(३)ञ्छा॑ची(३)न् य॒शो॑ म॒माँ(४) ।

य॒व्या॒यै॑ ग॒व्या॒या॑ ए॒तद्-दे॒वा अ॒न्न॒म॒तै॒तद॒न्न॒म॒द्धि॑ प्र॒जा॒प॒ते ॥

यु॒ञ्ज॒न्ति॑ ब्र॒ध्न ()-म॒रु॒षं च॒र॒न्तं॑ परि॒ त॒स्थु॒षः॑ ।

रो॒च॒न्ते॑ रो॒च॒ना दि॒वि ॥

यु॒ञ्ज॒न्त्य॑स्य॒ का॒म्या॒ ह॒री वि॒प॒क्ष॒सा र॒थे॑ ।

शो॒णा धृ॒ष्णू नृ॒वा॒ह॒सा ॥

के॒तुं कृ॒ण्व॒न्न॒के॒त॒वे पे॒शो म॒र्या॑ अ॒पे॒श॒सै॑ ।

स॒मु॒ष॒द्भि॒रजा॑य॒थाः ॥ 51

(ब्र॒ध्नं - पञ्च॑वि॒ंश॒तिश्च॑) (A20)

TS 7.4.21.1

प्रा॒णाय॑ स्वा॒हा व्या॒नाय॑ स्वा॒हा ऽपा॒नाय॑ स्वा॒हा स्ना॒व॒भ्यः॑ स्वा॒हा
सं॒ता॒ने॒भ्यः॑ स्वा॒हा परि॑सं॒ता॒ने॒भ्यः॑ स्वा॒हा पर्व॑भ्यः स्वा॒हा

स॒न्धाने॑भ्यः स्वाहा शरी॑रेभ्यः स्वाहा य॒ज्ञाय॑ स्वाहा दक्षि॑णाभ्यः
स्वाहा सु॒वर्गाय॑ स्वाहा लो॒काय॑ स्वाहा सर्व॑स्मै स्वाहा ॥ 52

(प्रा॒णाय॑ - द्वावि॑ंशतिः) (A21)

TS 7.4.22.1

सि॒ताय॑ स्वाहा ऽसि॒ताय॑ स्वाहा ऽभि॒हिताय॑ स्वाहा ऽन॒भिहि॑ताय॑ स्वाहा
यु॒क्ताय॑ स्वाहा ऽयु॒क्ताय॑ स्वाहा सु॒युक्ताय॑ स्वाहो - द्यु॒क्ताय॑ स्वाहा
वि॒मुक्ताय॑ स्वाहा प्र॒मुक्ताय॑ स्वाहा व॒ञ्चते॑ स्वाहा परि॒वञ्च॑ते स्वाहा
सँव॑ञ्चते स्वाहा ऽनु॒वञ्च॑ते स्वाहोद् - व॒ञ्चते॑ स्वाहा य॒ते स्वाहा
धा॒वते॑ स्वाहा ति॒ष्ठते॑ स्वाहा सर्व॑स्मै स्वाहा ॥ 53

(सि॒ताया॑ - द्वात्रि॑ंशत्) (A22)

Prasna Korvai with starting Padams of 1 to 22 Anuvaakams :-

(बृ॒हस्प॑तिः श्रद् - य॒था वा॑ - ऋ॒क्षा वै॑ - प्र॒जाप॑तिर्ये॒नये॑न - द्वे
वा॒व दे॑वस॒त्रे - आ॑दि॒त्या अ॑कामयन्त सु॒वर्गं॑ - वँसि॑ष्ठः -
सँव॑त्स॒राय॑ - सु॒वर्गं॑ यै स॒त्रं - ब्र॑ह्मवा॒दिनो॑ऽति॒रात्रो॑ - ज्योति॑ष्ठोमं
- मे॒षः - कू॒प्याभ्यो॑ - ऽद्भ्यो॑ - यो - नमो॑ - मयो॒भूः -
किञ्च॑ स्वि॒द - म्बे॑ - भूः - प्रा॒णाय॑ - सि॒ताय॑ - द्वावि॑ंशतिः)

Korvai with starting Padams of 1, 11, 21 Series of Panchaatis :-

(बृहस्पतिः – प्रति तिष्ठन्ति – वै दशरात्रेण – सुवर्ग – यो अर्वन्तं
– भू – स्त्रिपञ्चाशत्)

First and Last Padam of Fourth Prasnam of 7th Kandam

(बृहस्पतिः – सर्वस्मै स्वाहा)

॥ हरिः ओं ॥

॥ कृष्ण यजुर्वेदीय तैत्तिरीय संहितायां सप्तमकाण्डे चतुर्थः प्रश्नः

समाप्तः ॥

7.4.1 Appendix

7.4.17.2 – मही॒मूषु॑>१ सु॒त्रा॒मा॒णं॑>२

मही॒मूषु॑ मा॒तर॑ सु॒त्र॒ता॒ना॒मृ॒तस्य॑ प॒त्नी॒मव॑से हु॒वेम॑ ।

तु॒वि॒क्ष॒त्रा॒मज॑रन्तीमु॒रू॒ची सु॒श॒र्मा॒णम॑दि॒ति सु॒प्र॒णी॒तिं ॥

सु॒त्रा॒मा॒णं पृ॒थि॒वीं द्या॑म॒ने॒हस॑ सु॒श॒र्मा॒ण म॑दि॒ति सु॒प्र॒णी॒तिं ।

दै॒वीं ना॒व स्वरि॑त्रा॒मना॑गस॒मस्र॑वन्ती॒मा रु॒हे॒मा स्व॑स्तये ॥

(Appearing in T.S.1.5.11.5)

=====

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

7.5 सप्तमकाण्डे पञ्चमः प्रश्नः – सत्रविशेषाभिधानं

TS 7.5.1.1

गावो॑ वा ए॒तथ् स॒त्र-मा॑सताशृ॒ङ्गाः स॒तीः शृ॒ङ्गाणि॑ नो जायन्ता॒ इति॒
का॒मेन॑ तासां॒ दश॒मासा॒ निष॑ण्णा आसन्नथ॒ शृ॒ङ्गाण्यजा॑यन्त॒
ता उ॒दति॑ष्ठन्नरा॒थस्मेत्य॑थ यासां॒ नाजा॑यन्त॒ ताः सँव॑थ्सर-मा॒प्त्वोद॑तिष्ठ॒
-न्नरा॑थस्मेति॒ यासां॒ चाजा॑यन्त॒ यासां॒ च न॒ ता उ॒भयी॑रु-दतिष्ठ॒-
न्नरा॑थस्मेति॒ गोस॒त्रं वै - [] 1

TS 7.5.1.2

सँव॑थ्सरो य ए॒वं वि॒द्वाँसः॑ सँव॑थ्सर-मु॒पय॑न्त्यृ॒द्धनु॑वन्त्ये॒व तस्मा॑त्
तू॒परा॑ वा॒र्षिकौ॑ मा॒सौ प॑र्त्वा चरति॒ स॒त्राभि॑जित॒ ह्यस्यै॑ तस्मा॑त्
सँव॑थ्सरसदो॒ यत् किं॑ च गृ॒हे क्रि॑यते॒ तदा॑प्त-म॒वरु॑द्ध-म॒भिजि॑तं
क्रि॑यते॒ समु॑द्रं वा ए॒ते प्र॑ प्लवन्ते॒ ये सँव॑थ्सरमु॒पय॑न्ति॒ यो वै
समु॑द्रस्य॒ पारं॑ न पश्यति॒ न वै स॒ तत॑ उदेति॒ सँव॑थ्सरो - [] 2

TS 7.5.1.3

वै॑ समु॒द्रस्तस्यै॑तत् पारं॑ यदतिरात्रौ॑ य एवं॑ वि॒द्वा॒ऽसः॑ सँव॑थ्सर-
मु॒पय॑न्त्यनार्ता॑ ए॒वोदृ॑चं गच्छन्ती॒यं वै॑ पूर्वो॑ऽतिरात्रो॑ ऽसावु॑त्तरो॒ मनः॑
पूर्वो॑ वागु॒त्तरः॑ प्रा॒णः पूर्वो॑ऽपान॒ उत्तरः॑ प्र॒रोध॑नं पूर्व॑ उ॒दय॑नमु॒त्तरो॑
ज्योति॑ष्ठोमो वैश्वा॒नरो॑ ऽतिरात्रो॑ भवति॒ ज्योति॑रे॒व पु॒रस्ता॑द्दधते सु॒वर्ग॑स्य
लो॒कस्या॑-नु॒ख्यात्यै॑ चतुर्वि॒ंशः प्रा॑यणीयो॒ भवति॑ चतुर्वि॒ंशति॑-

र॒र्धमा॑साः - [] 3

TS 7.5.1.4

सँव॑थ्सरः प्र॒यन्त॑ ए॒व सँव॑थ्सरे प्रति॑ तिष्ठन्ति॒ तस्य॑ त्रीणि॑ च श॒तानि॑
षष्टि॑श्च स्तो॒त्रीया॑स्तावतीः सँव॑थ्सरस्य रात्रय॒ उभे॑ ए॒व सँव॑थ्सरस्य
रूपे॑ आ॒प्नुव॑न्ति ते स॒ऽस्थि॑त्या अ॒रि॒ष्ट्या॑ उत्त॒रैर॑होभिश्चरन्ति॒ षड॑हा
भव॑न्ति षड् वा ऋ॒तवः॑ सँव॑थ्सर ऋ॒तुष्वे॒व सँव॑थ्सरे प्रति॑ तिष्ठन्ति॒
गौश्चा॑ऽऽ*युश्च म॒द्ध्यतः॑ स्तोमौ॑ भवतः सँव॑थ्सरस्यै॒व तन्मि॑थुनं
म॒द्ध्यतो॑ -[] 4

TS 7.5.1.5

दधति प्रजननाय ज्योतिरभितो भवति विमोचनमेव तच्छन्दाऽस्येव
तद्-विमोकं यन्त्यथो उभयतो ज्योतिषैव षडहेन सुवर्गं लोकं यन्ति
ब्रह्मवादिनो वदन्त्यासते केन यन्तीति देवयानेन पथेति ब्रूयाच्छन्दाऽसि
वै देवयानः पन्था गायत्री त्रिष्टुब्-जगती ज्योतिर्वै गायत्री
गौस्त्रिष्टुगायुर्जगती यदेते स्तोमा भवन्ति देवयानेनैव - [] 5

TS 7.5.1.6

तत् पथा यन्ति समानऽसाम भवति देवलोको वै साम देवलोकादेव
नयन्त्यन्याअन्या ऋचो भवन्ति मनुष्यलोको वा ऋचो
मनुष्यलोकादेवान्यमन्यं देवलोकमभ्यारोहन्तो यन्त्यभिवर्तो ब्रह्मसामं
भवति सुवर्गस्य लोकस्याभिवृत्या अभिजिद्-भवति सुवर्गस्य
लोकस्याभिजित्यै विश्वजिद्-भवति विश्वस्य जित्यै मासिमासि
पृष्ठान्युप यन्ति मासिमास्यतिग्राह्या गृह्यन्ते मासिमास्येव
वीर्यं () दधति मासां प्रतिष्ठित्या उपरिष्ठान्मासां पृष्ठान्युप यन्ति
तस्मादुपरिष्ठादोषधयः फलं गृह्णन्ति ॥ 6

(गो॒स॒त्रं वा॑ – ए॒ति सँव॑त्स॒रो – ऽर्द्ध॑मा॒सा –

मि॒थु॒नं म॑द्ध्य॒तो – दे॒व॒या॒ने॒नै॒व – वी॒र्यं॑ – त्रयो॑द॒श च॑) (A1)

TS 7.5.2.1

गा॒वो वा॑ ए॒तथ् स॒त्रमा॑स॒ताशृ॒ङ्गाः स॒तीः शृ॒ङ्गाणि॑ सि॒षास॑न्ती॒स्तासां॑
द॒श मा॒सा नि॑षण्णा आ॒सन्न॑थ शृ॒ङ्गाण्य॑जायन्त ता अ॒ब्रुव॑न्न॒राथ्स्मोत्
ति॒ष्ठा॒माव॑ तं का॒मम॑रुथ्स्महि॒ येन॑ का॒मेन॑ न्यष॒दामे॑ति ता॒सामु॑ त्वा
अ॒ब्रुव॑न्न॒र्द्धावा॑ याव॒तीर्वा॑ऽऽसा॒महा ए॒वेमौ॑द्वा॒दशौ॑ मा॒सौ सँव॑त्स॒रꣳ
सं॒पाद्यो॑त् ति॒ष्ठामे॑ति ता॒सां – [] 7

TS 7.5.2.2

द्वा॒दशे॑ मा॒सि शृ॒ङ्गाणि॑ प्राव॑र्तन्त श्र॒द्धया॑ वाऽश्र॒द्धया॑ वा ता
इ॒मा या॑स्तू॒परा उ॒भय्यो॑ वाव ता आ॒र्द्धन्व॑न्. याश्च॑ शृ॒ङ्गाण्य॑सन्वन्.
याश्चो॑र्ज॒मवा॑रुन्ध॒तर्द्ध॑नोति द॒शसु॑ मा॒सूत्ति॑ष्ठन्नृ॒द्धनो॑ति द्वा॒दशसु॑
य ए॒वं वैद॑ प॒देन॑ खलु वा ए॒ते य॑न्ति वि॒न्दति॑ खलु वै प॒देन॑ यन्
तद्वा ए॒तदृ॒द्धम॑यनं तस्मा () दे॒तद्-गो॑स॒नि ॥ 8

(ति॒ष्ठामे॑ति ता॒सां – तस्मा॑द् – द्वे च॑) (A2)

TS 7.5.3.1

प्र॒थ॒मे मा॒सि पृ॒ष्ठान्यु॑प॒ यन्ति॑ म॒द्ध्य॒म उप॑ यन्त्यु॒त्त॒म उप॑ यन्ति॒
तदा॑हु॒र्याँ वै त्रि॑रेक॒स्याह॑ उप॒सीद॑न्ति द॒हं वै साऽप॑राभ्यां
दोहा॑भ्यां दु॒हेऽथ॒ कुतः॑ सा धौ॒क्ष्यते॒ यां द्वाद॑श कृ॒त्व उप॑सीद॒न्तीति॑
सँव॑त्स॒रꣳ संपा॑द्यो॒त्त॒मे मा॒सि स॒कृत् पृ॒ष्ठान्यु॑पेयु॒स्तद्-यज॑माना
य॒ज्ञं प॒शून्व रु॑न्धते स॒मुद्रं॑ वा - [] 9

TS 7.5.3.2

ए॒तेन॑वा॒रमपा॑रं प्र प्ल॒वन्ते॒ ये सँव॑त्स॒रमु॑प॒यन्ति॒ यद् बृ॑हद्-रथ॒न्तरे॒
अ॒न्वर्जे॑यु॒र्यथा॒ मद्ध्ये॑ स॒मुद्र॑स्य प्ल॒वम॒न्वर्जे॑यु॒स्तादृ॑क् तदनु॒त्सर्गं॑
बृ॒हद्-रथ॑न्त॒राभ्या॑मि॒त्वा प्र॑ति॒ष्ठां ग॑च्छन्ति॒ सर्वे॑भ्यो॒ वै कामे॑भ्यः
स॒न्धिर्दु॑हे तद्-यज॑मानाः स॒र्वान् कामा॑न॒व रु॑न्धते ॥ 10

(स॒मुद्रं॑ वै - च॒तुस्त्रिं॑शच्च) (A3)

TS 7.5.4.1

स॒मा॒न्य ऋ॒चो भ॑वन्ति म॒नुष्य॑लो॒को वा ऋ॒चो म॑नुष्यलो॒कादे॒व न
य॒न्त्यन्य॑द॒न्यथ् साम॑ भ॒वति॑ दे॒वलो॒को वै साम॑ दे॒वलो॒कादे॒वान्य॑म॒न्यं
म॒नुष्य॑लो॒कं प्र॑त्य॒वरो॑हन्तो यन्ति॒ जग॑ती॒मग्र॑ उप॒ यन्ति॒ जग॑तीं॒ वै

छन्दा॒ऽसि प्र॒त्यव॑रोहन्त्या-ग्र॒यणं॑ ग्र॒हा बृ॒हत् पृ॒ष्ठानि
 त्रय॑स्त्रि॒श॒स्तोमा॑-स्तस्मा॒-ज्याया॑ऽसं कनी॑यान् प्र॒त्यव॑रोहति
 वैश्व॑कर्म॒णो गृ॑ह्यतेविश्वा॒न्येव॑ तेन॒ कर्मा॑णि यज॑माना अव॑ रुन्धत
 आ॒दित्यो॑-[] 11

TS 7.5.4.2

गृ॑ह्यत इ॒यं वा॑ अ॒दिति॑रस्यामे॒व प्रति॑ तिष्ठन्त्यन्यो॑ऽन्यो गृ॑ह्येते
 मि॒थुन॒त्वाय॑ प्र॒जात्या॑ अ॒वान्तरं॑ वै द॒शरा॑त्रेण प्र॒जाप॑तिः प्र॒जा अ॑सृजत
 यद्-द॒शरा॑त्रो भवति प्र॒जा ए॒व तद्-यज॑मानाः सृजन्त ए॒ता ह॒ वा
 उ॒दङ्कः॑ शौ॒ल्बाय॑नः स॒त्रस्य॑र्द्धिमुवाच॒ यद्-द॒शरा॑त्रोयद्-द॒शरा॑त्रो
 भवति॑ स॒त्रस्य॑र्द्ध्या अथो॒ यदे॒व पूर्वे॑ष्वहस्सु॒ विलो॑म क्रि॒यते
 तस्यै॒वै ()-षा॑ शान्तिः ॥ 12

(आ॒दित्य॑ - स्तस्यै॒व - द्वे च॑) (A4)

TS 7.5.5.1

यदि॑ सोमौ स॒ऽसुतौ॑ स्यातां॑ म॒हति॑ रात्रि॒यै प्रा॑तरनुवा॒क-मु॒पाकु॑र्यात्
 पूर्॒वो वाचं॑ पूर्॒वो दे॒वताः॑ पूर्॒वः छन्दा॑ऽसि वृ॒द्धे वृ॑षण्वतीं प्रति॒पदं॑
 कुर्यात्॑ प्रा॒तस्स॒वना॑दे॒वैषा॒मिन्द्रं॑ वृ॒द्धे ऽथो॒ खल्वा॑हुःस॒वनमु॒खे-

स॒वन॒मुखे॑ का॒र्येति॑ स॒वन॒मुखा॑त् स॒वन॒मुखा॑-दे॒वैषा॒मिन्द्रं॑
 वृ॒द्धे सँ॒वेशा॑योप॒वेशाय॑ गाय॒त्रिया॑स्त्रि॒ष्टुभो॑ जग॒त्या अनु॑ष्टुभः
 प॒ङ्क्त्या॑ अ॒भिभू॑त्यै स्वाहा छन्दा॑ऽसि वै सँ॒वेश॑ उप॒वेशः॑
 छन्दा॑भिरे॒वैषां- [] 13

TS 7.5.5.2

छन्दा॑ऽसि वृ॒द्धे सज॑नीय॒ऽशस्यं॑ वि॒हव्य॑ऽशस्य॑मगस्त्यस्य
 कया॑शुभीय॒ऽशस्य॑मेतावद्वा अ॒स्ति याव॑देतद्-याव॑देवास्ति तदे॒षां
 वृ॒द्धे यदि॑ प्रा॒तस्स॒वने॑ क॒लशो॑ दी॒र्ये॒त वैष्ण॑वीषु शि॒पिवि॒ष्टव॑तीषु
 स्तुवी॑रन्.यद्वै य॒ज्ञस्या॑-ति॒रिच्य॑ते वि॒ष्णुं तच्छि॑पिवि॒ष्टम॑भ्यति रिच्यते
 तद्वि॑ष्णुः शि॒पिवि॒ष्टोऽति॑रिक्त ए॒वाति॑रिक्तं दधा॒त्यथो॑ अति॑रिक्तेनै॒वा-
 ति॑रिक्तमाप्त्वाऽव () रुन्ध॑ते यदि म॒द्ध्यन्दि॑ने दी॒र्ये॒त वष॑ट्का॒रनि॑धन॒ऽसाम॑
 कुर्यु॑र्वषट्का॒रो वै य॒ज्ञस्य॑ प्र॒तिष्ठा॑ प्र॒तिष्ठा॑मे॒वैन॑द्-गम॑यन्ति यदि
 तृ॒तीय॑स॒वन ए॒तदे॒व ॥ 14

(छन्दा॑भिरे॒वैषा - म॒वै - का॒न्नवि॑ऽश॒तिश्च॑) (A5)

TS 7.5.6.1

षड॑हैर्मा॒सान्त् स॒ंपाद्या॑ह॒रुथ् सृ॑जन्ति षड॑हैर्.हि मा॒सान्त् संप॑श्यन्त्य-
 र्द्धमा॒सैर्मा॒सान्त् स॒ंपाद्या॑ह॒रुथ् सृ॑जन्त्य-र्द्धमा॒सैर्.हि मा॒सान्त्
 संप॑श्यन्त्यमावा॒स्यया॒ मा॒सान्त् स॒ंपाद्या॑ह॒रुथ् सृ॑जन्त्यमावा॒स्यया॒ हि
 मा॒सान्त् संप॑श्यन्ति पौ॒र्णमा॒स्या मा॒सान्त् स॒ंपाद्या॑ह॒रुथ् सृ॑जन्ति
 पौ॒र्णमा॒स्या हि मा॒सान्त् संप॑श्यन्ति यो वै पू॒र्ण आ॑सिञ्चति॒ परा॒ स
 सि॑ञ्चति॒ यः पू॒र्णादु॑दचति - [] 15

TS 7.5.6.2

प्रा॒णम॑स्मिन्त्स द॑धाति॒ यत् पौ॑र्णमा॒स्या मा॒सान्त् स॒ंपाद्या॑ह॒रुथ् सृ॑जन्ति
 सँव॑त्सरा॒यैव॒ तत् प्रा॒णं द॑धति॒ तदनु॑ स॒न्नि॒त्रिणः॒ प्रा॒णन्ति॒
 यद॑हर्नो॒त्-सृ॒जेयु॑र्यथा॒ दृति॑रुप॒नद्धो॒ विप॑तत्येव॒ सँव॑त्सरो
 वि प॑ते॒दार्ति॑-मा॒च्छैर्यु॑र्यत् पौ॑र्णमा॒स्या मा॒सान्त्-स॒ंपाद्या॑ह॒रुथ् सृ॑जन्ति
 सँव॑त्सरा॒यैव॒ तदु॑दानं॒ दध॑ति॒ तदनु॑ स॒न्नि॒त्रिण॒ उ - [] 16

TS 7.5.6.3

द॑नन्ति॒ नाऽऽ*ति॑मा॒च्छन्ति॒ पू॒र्णमा॒से वै दे॒वाना॑ सु॒तो यत् पौ॑र्णमा॒स्या
 मा॒सान्त्-स॒ंपाद्या॑ह॒रुथ् सृ॑जन्ति॒ दे॒वाना॑मे॒व तद्-य॒ज्ञेन॑ य॒ज्ञं

प्रत्य॑वरो॒हन्ति॑ वि॒ वा ए॒तद्-य॒ज्ञं छि॑न्दन्ति॒ यथ् ष॑ड॒हस॑न्त॒तꣳ
स॑न्त॒मथा॑हरुथ् सृ॒जन्ति॑ प्रा॒जाप॒त्यं प॒शुमा॑ ल॒भन्ते॑ प्र॒जाप॑तिः सर्वा
दे॒वता॑ दे॒वता॑भिरे॒व य॒ज्ञꣳ सं त॑न्वन्ति॒ यन्ति॑ वा ए॒ते
स॒वना॑द्येऽह - [] 17

TS 7.5.6.4

-रुथ् सृ॒जन्ति॑ तुरी॒यं खलु॑ वा ए॒तथ् स॒वनं॑ यथ् सा॒नाय्यं॑ यथ्
सा॒नाय्यं॑ भव॒ति तेनै॒व स॒वनान्न॑ यन्ति॒ समु॑प॒हूय॑ भक्षयन्त्ये॒तथ्-
सो॒मपी॒था ह्ये॒तर्हि॑ यथा॒यत॑नं वा ए॒तेषा॑ꣳ स॒वनभा॑जो दे॒वता॑ गच्छन्ति॒
येऽह॑रुथ् सृ॒जन्त्यनु॑स॒वनं पु॒रोडा॑शान् निर्व॑पन्ति॒ यथा॒यत॑नादे॒व
स॒वनभा॑जो दे॒वता॑ अव॒ रुन्ध॑ते ऽष्टा॒कपा॑लान् प्रा॒तस्स॒वन
एका॑दश॒कपा॑लान् मा॒द्ध्यन्दि॑ने स॒वने द्वा॑दश॒कपा॑लाꣳ-स्तृ॒तीयस॒वने
छन्दा॑ꣳस्ये॒वाऽऽ*प्त्वा () -ऽव॑ रुन्ध॑ते वैश्व॒देवं च॒रुं तृ॒तीयस॒वने
निर्व॑पन्ति॒ वैश्व॒देवं वै तृ॒तीयस॒वनं तेनै॒व तृ॒तीयस॒वनान्न॑ यन्ति ॥ 18

(उ॒द॒च - त्पु - द्येऽह - रा॒प्त्वा - पञ्च॑दश च) (A6)

TS 7.5.7.1

उ॒थ्सृ॒ज्यां(३)नो॒थ्सृ॒ज्या(३)मि॒ति॑ मी॒मा॒न्सन्ते॑ ब्र॒ह्मवा॒दिन॒-स्तद्वा॒हुरु॒थ्
 सृ॒ज्यमे॒वेत्य॑-मा॒वास्या॑यां च पौ॒र्णमा॒स्यां चो॒थ्-सृ॒ज्यमि॒त्याहु॒रेते॑ हि
 य॒ज्ञं व॑हत॒ इति॑ ते त्वाव॑ नो॒थ्सृ॒ज्ये इ॒त्याहु॒र्ये अ॒वान्तरं॑ य॒ज्ञं भे॒जाते॑
 इति॑ या प्र॒थमा॑ व्य॒ष्टका॑ तस्या॒मु॒थ्-सृ॒ज्यमि॒त्याहु॒रेष वै मा॒सो वि॒शर॑
 इति॑ नाऽऽ*दि॒ष्ट - [] 19

TS 7.5.7.2

-मु॒थ्सृ॒जेयु॑-र्यदादि॒ष्ट-मु॒थ्सृ॒जेयु॑र्यादृ॒शे पुनः॑ पर्या॒प्लावे॑ म॒द्ध्ये
 षड॒हस्य॑ संप॒द्येत॑ षड॒हैर्मा॒सान्थ् संपा॒द्य यथ् स॒प्तम॑-मह॒स्तस्मि॒न्नु॒थ्
 सृ॒जेयु॑-स्तद॒ग्नये॑ वसु॒मते॑ पु॒रोडा॑शम॒ष्टाक॑पालं निर्व॒पेयु॒रैन्द्रं॑ दधी॒न्द्राय॑
 मरु॒त्वते॑ पु॒रोडा॑शमेकादशकपालं वैश्वदे॒वं द्वाद॑शकपालम॒ग्नेर्वै
 वसु॒मतः॑ प्रा॒तस्स॒वनं॑ यद॒ग्नये॑ वसु॒मते॑ पु॒रोडा॑शम॒ष्टाक॑पालं निर्व॒पन्ति॑
 दे॒वता॑मे॒व तद्-भा॒गिनीं॑ कु॒र्वन्ति॑ - [] 20

TS 7.5.7.3

स॒वनम॑ष्टाभि॒रुप॑ यन्ति॒ यदै॒न्द्रं दधि॑ भव॒तीन्द्र॑मे॒व तद्-भा॒गधे॒यान्न॑
 च्याव॑यन्तीन्द्रस्य॒ वै मरु॒त्वतो॑ मा॒द्ध्यन्दि॒नञ् स॒वनं॑ य॒दिन्द्रा॑य मरु॒त्वते॑

पुरो॒डाश॒मेका॒दश॒कपालं॑ निर्व॒पन्ति॑ दे॒वता॑मे॒व तद्-भा॒गिनीं॑ कु॒र्वन्ति॑
स॒वनमे॒काद॒शभि॒रुप॑ यन्ति॒ विश्वे॑षां॒ वै दे॒वानामृ॑भु॒मतां॑
तृतीय॑स॒वनँयद्-वै॑श्चदे॒वं द्वाद॑श॒कपालं॑ निर्व॒पन्ति॑ दे॒वता॑ ए॒व तद्-
भा॒गिनीः॑ कु॒र्वन्ति॑ स॒वनं द्वाद॑शभि - [] 21

TS 7.5.7.4

-रुप॑ यन्ति प्राजाप॒त्यं प॒शुमा॑ ल॒भन्ते॑ य॒ज्ञो वै प्र॒जाप॑ति-र्य॒ज्ञस्या-
ननु॑सर्गायाभि॒वर्त॑ इ॒तः षण्मा॒सो ब्र॑ह्म॒सामं॑ भ॒वति॒ ब्रह्म॒ वा अ॑भि॒वर्तो॑
ब्रह्म॑णै॒व तथ् सु॒वर्गं॑ लो॒क-म॑भि॒वर्त॑यन्तो यन्ति प्र॒तिकूल॑मि॒व ही॒तः
सु॒वर्गो लो॒क इन्द्र॑ क्र॒तुं न॒ आ भ॑र पि॒ता पु॒त्रेभ्यो॑ यथा॑ ।
शि॒क्षा नो अ॒स्मिन् पु॑रु॒हूत॒ याम॑नि जी॒वा ज्योति॑रशीम॒हीत्य॑ ()-मु॒त
आ॒य॒ता ष॑ण्मा॒सो ब्र॑ह्म॒सामं॑ भ॒वत्य॑यं॒ वै लो॒को ज्योतिः॑ प्र॒जा
ज्योति॑रिममे॒व तल्लो॒कं प॑श्यन्तोऽभि॒वद॑न्त आ यन्ति ॥ 22
(नाऽऽदिष्टं॑ - कु॒र्वन्ति॑ - द्वाद॑शभि - रि॒ति- वि॒शतिश्च॑) (A7)

TS 7.5.8.1

दे॒वानां॑ वा॒ अ॒न्तं॑ ज॒ग्मु॑षामिन्द्रि॒यं॑ वी॒र्यं॑-म॒पा॒क्राम॑त् तत्
 क्रो॒शेना॑वा॒रुन्ध॑त् तत् क्रो॒शस्य॑ क्रो॒शत्वं॑ य॒त् क्रो॒शेन॑ चा॒त्वा॒ल॒स्यान्ते॑
 स्तु॒वन्ति॑ य॒ज्ञस्यै॑वान्तं॑ ग॒त्वेन्द्रि॒यं॑ वी॒र्यं॑म॒व रु॑न्धते स॒न्नस्य॑द्द॒र्ध्या
 ऽऽह॒वनी॑य॒स्यान्ते॑ स्तु॒वन्त्यग्नि॑-मे॒वोप॑द्-र॒ष्टारं॑ कृ॒त्वर्द्धि॑मु॒प य॑न्ति
 प्र॒जाप॑तेर्हृ॒दये॑न ह॒विर्द्धि॑नेऽन्तः॑ स्तु॒वन्ति॑ प्रे॒माण॑मे॒वास्य॑
 गच्छ॑न्ति श्लो॒केन॑ पु॒रस्ता॑त् सद॒सः - [] 23

TS 7.5.8.2

स्तु॒वन्त्यनु॑श्लो॒केन॑ प॒श्चाद्-य॒ज्ञस्यै॑वान्तं॑ ग॒त्वा श्लो॑क॒भाजो॑ भ॒वन्ति॑
 न॒वभि॑-र॒द्ध्वर्यु॑रुद्-गा॒यति॑ न॒व वै पु॑रु॒षे प्रा॒णाः प्रा॒णाने॑व य॒जमा॑नेषु
 द॒धाति॑ सर्वा॑ ऐन्द्रि॒यो भ॑वन्ति प्रा॒णेष्वे॒वेन्द्रि॒यं द॑ध-त्य॒प्रति॑ह॒ताभि॑रुद्-
 गा॒यति॑ तस्मा॑त् पु॒रुषः॑ सर्वा॑ण्य॒न्यानि॑ शी॒र्ष्णोऽङ्गानि॑ प्र॒त्यच॑ति शि॒र
 ए॒व न प॑ञ्चद॒शऽथ॑न्तरं॑ भ॒वतीन्द्रि॒यमे॒वाव रु॑न्धते स॒प्तद॒शं-[] 24

TS 7.5.8.3

बृ॒ह-द॒न्नाद्य॑स्या॒वरु॑द्द॒ध्या अ॒थो प्रै॒व तेन॑ जा॒यन्त॑ ए॒कवि॑ंशं॑ भ॒द्रं
 द्वि॒पदा॑सु प्र॒तिष्ठि॑त्यै प॒न्नय॑ उप॒ गाय॑न्ति मि॒थुन॑त्वाय॒ प्रजा॑त्यै प्र॒जाप॑तिः

प्र॒जा अ॑सृ॒जत॒ सोऽ॑कामयताऽऽ*साम॒हर् राज्यं॑ परी॒यामि॑ति तासा॒र्
राज॒नेनै॒व रा॒ज्यं पर्यै॑त् तद्-राज॒नस्य॑ राज॒नत्वं यै॑द्-राज॒नं भव॑ति
प्र॒जाना॑मे॒व तद्-यज॑माना रा॒ज्यं परि॑ यन्ति पञ्चवि॒ंशं भव॑ति

प्र॒जाप॑ते - [] 25

TS 7.5.8.4

-रा॒प्त्यै पञ्च॑भि-स्तिष्ठन्तः॑ स्तु॒वन्ति दे॒वलो॒कमे॒वाभि॑ जयन्ति
पञ्च॑भि॒रासी॑ना मनु॒ष्यलो॒कमे॒वाभि॑ जयन्ति द॒श संप॑द्यन्ते द॒शाक्ष॑रा
वि॒राडन्नं॑ वि॒राड् वि॒राजै॒वा-न्नाद्य॑मव रुन्धते पञ्च॒धा वि॒निष॑द्य स्तु॒वन्ति
पञ्च॑ दि॒शो दि॒क्ष्वेव॑ प्र॒ति तिष्ठ॑न्त्ये॒कैक॒याऽस्तु॑तया स॒माय॑न्ति दि॒ग्भ्य
ए॒वान्नाद्य॑ सं भ॑रन्ति ताभि-रु॒द्गातो॑द्-गा॒यति दि॒ग्भ्य

ए॒वान्नाद्य॑-[] 26

TS 7.5.8.5

संभृ॒त्य ते॒ज आ॒त्मन् द॑धते तस्मा॒देकः॑ प्रा॒णः सर्वा॑ण्यङ्गान्यव॒त्यथो॑
यथा॑ सु॒पर्ण॑ उत्प॒तिष्य॑ज्छिर उत्त॒मं कुरु॑त ए॒वमे॒व तद्-यज॑मानाः
प्र॒जाना॑मुत्त॒मा भव॑न्त्यास॒न्दी-मु॒द्गाता॑ ऽऽरो॒हति॑ साम्रा॒ज्यमे॒व गच्छ॑न्ति

प्लेङ्खञ् होता नाकस्यैव पृष्ठञ् रोहन्ति कूर्चावद्ध्वर्यु-र्ब्रध्नस्यैव
विष्टपं गच्छन्त्येतावन्तो वै देवलोकास्तेष्वेव यथापूर्वं प्रति ()
तिष्ठन्त्यथो आक्रमणमेव तथ् सेतुं यजमानाः कुर्वते सुवर्गस्य
लोकस्य समष्ट्यै ॥ 27

(सदसः-सप्तदशं-प्रजापते-र्गायति दिग्भ्य एवान्नाद्यं-प्रत्ये-
कादश च) (A8)

TS 7.5.9.1

अर्क्येण वै सहस्रशः प्रजापतिः प्रजा असृजत ताभ्य इलांदेनेरां
लूतामवारुन्ध यदर्क्यं भवति प्रजा एव तद्-यजमानाः सृजन्त
इलादं भवति प्रजाभ्य एव सृष्टाभ्य इरां लूतामव रुन्धते तस्माद्याञ्
समाञ् सत्रञ् समृद्धं क्षोधुकास्ताञ् समां प्रजा इषञ्
ह्यासामूर्जमाददते याञ् समां व्यृद्ध-मक्षोधुकास्ताञ्
समां प्रजा - [] 28

TS 7.5.9.2

न ह्यासामिषमूर्जमाददत उत्क्रोदं कुर्वते यथा बन्धान्-मुमुचाना
उत्क्रोदं कुर्वत एवमेव तद्-यजमाना देवबन्धान्-मुमुचाना उत्क्रोदं

कुर्व॑त इ॒षमूर्ज॑मा॒त्मन् दधा॑ना वा॒णः श॒तत॑न्तुर्भवति श॒तायुः॑ पु॒रुषः॑
 श॒तेन्द्रि॑य आयु॒ष्येवेन्द्रि॑ये प्र॒ति तिष्ठ॑न्त्याजिं धा॒वन्त्यन॑भिजितस्या-
 भिजि॑त्यै दु॒न्दुभीन्त् स॒माघ्न॑न्ति प॒रमा वा ए॒षा वाग्या॑ दु॒न्दुभौ॑
 प॒रमा॑मेव - [] 29

TS 7.5.9.3

वाच॑मव रु॒न्धते भू॑मिदु॒न्दुभि॑मा घ्नन्ति यैवे॑मां वाक् प्रवि॑ष्टा ता॒मेवा॑व
 रु॒न्धते ऽथो॑ इ॒मामे॒व ज॑यन्ति सर्वा वाचो॑ वदन्ति सर्वा॑सां
 वा॒चाम॑वरुद्ध्य आ॒र्द्रेच॑र्मन् व्यायच्छे॑ते इन्द्रि॒यस्या॑ वरुद्ध्य आऽन्यः
 क्रो॑शति प्रा॒न्यः श॑सति य आक्रो॑शति पु॒नात्ये॒वैनान्त्स॑ यः
 प्र॒श॑सति पू॒तेष्वे॒वान्नाद्यं॑ दधा॒त्यृषि॑कृतं च - [] 30

TS 7.5.9.4

वा ए॒ते दे॒वकृ॑तं च पू॒र्वैर्मा॑सै॒रव रु॒न्धते॑ यद्-भू॒तेच्छ॑दा॒ सामा॑नि
 भ॑वन्त्यु॒भय॑स्यावरुद्ध्यै यन्ति वा ए॒ते मि॒थुना॑द्ये सँव॑त्सर-
 मु॒पय॑न्त्यन्तर्वे॒दि मि॒थुनौ॑ सं भ॑वतस्तेनै॒व मि॒थुना॑न्न यन्ति ॥ 31

(व्यू॒द्धम॑क्षो॒धुका॒स्तां॑ समां॒ प्र॒जाः - पर॒मा॒मे॒व - च -

त्रि॒ंशच्च॑) (A9)

TS 7.5.10.1

च॒र्मा॒व॒ भि॒न्द॒न्ति॑ पा॒प्मान॑मे॒वैषा॑म॒व॒ भि॒न्द॒न्ति॑ मा॒ऽप॒ रा॒थ॒सी॒र्मा॒ऽति॑
व्या॒थ॒सी॒रि॒त्या॒ह॒ संप्र॑त्ये॒वैषां॑ पा॒प्मान॑म॒व॒ भि॒न्द॒न्त्यु॒दकु॑म्भान॒धिनि॑धाय
दा॒स्यो॑ मा॒र्जा॒ली॒यं॒ परि॑ नृत्यन्ति प॒दो नि॒घ्न॒ती॒रि॒दं॒मधुं॑ गा॒य॒न्त्यो॑
म॒धु॒ वै दे॒वानां॑ पर॒म-म॒न्नाद्यं॑ पर॒ममे॒वा-न्नाद्य॑म॒व॒ रु॒न्धते॑
प॒दो नि॑ घ्नन्ति म॒ही॒या॒मे॒वैषु॑ दधति ॥ 32

(च॒र्मे - का॒न्नप॑ञ्चा॒शत्) (A10)

TS 7.5.11.1

पृ॒थि॒व्यै स्वा॒हा ऽन्त॑रि॒क्षाय॑ स्वा॒हा दि॒वे स्वा॒हा संप्लो॑ष्यते स्वा॒हा
संप्ल॑व॒मा॒नाय॑ स्वा॒हा संप्लु॑ताय॒ स्वा॒हा मे॒घायि॑ष्यते स्वा॒हा मे॒घाय॑ते
स्वा॒हा मे॒घि॒ताय॑ स्वा॒हा मे॒घाय॑ स्वा॒हा नी॒हा॒राय॑ स्वा॒हा नि॒हा॒का॒यै
स्वा॒हा प्रा॒स॒चाय॑ स्वा॒हा प्र॒च॒ला॒का॒यै स्वा॒हा वि॒द्योति॑ष्यते स्वा॒हा
वि॒द्योत॑मा॒नाय॑ स्वा॒हा सँ॒वि॒द्योत॑मा॒नाय॑ स्वा॒हा स्त॒नयि॑ष्यते स्वा॒हा

स्तनय॑ते स्वाहा॑ –ग्र॒ ष॑ स्तनय॑ते स्वाहा॑ वर्॒षिष्य॑ते स्वाहा॑ वर्॒षते॑
स्वाहा॑ ऽभि॒वर्ष॑ते स्वाहा॑ परि॒वर्ष॑ते स्वाहा॑ सँव॒र्षते॑ – [] 33

TS 7.5.11.2

स्वाहा॑ ऽनु॒वर्ष॑ते स्वाहा॑ शी॒कायिष्य॑ते स्वाहा॑ शी॒काय॑ते स्वाहा॑
शी॒कि॒ताय॑ स्वाहा॑ प्रो॒षिष्य॑ते स्वाहा॑ पु॒ष्णते॑ स्वाहा॑ परि॒पुष्ण॑ते स्वाहा॑ –
द्ग्र॒हीष्य॑ते स्वाहा॑ द्गृ॒ह्णते॑ स्वाहा॑ –द्गृ॒हीताय॑ स्वाहा॑ वि॒प्लोष्य॑ते
स्वाहा॑ वि॒प्लव॑मानाय॑ स्वाहा॑ वि॒प्लुताय॑ स्वाहा॑ ऽत॒प॒स्यते॑ स्वाहा॑
ऽत॒प॒ते स्वाहा॑ –ग्र॒मा॒त॒प॒ते स्वाहा॑ –ग्भ्यः॑ स्वाहा॑ य॒जु॒र्भ्यः॑ स्वाहा॑
सा॒म॒भ्यः॑ स्वाहा॑ ऽङ्गि॒रो॒भ्यः॑ स्वाहा॑ वेदे॒भ्यः॑ स्वाहा॑ गा॒था॒भ्यः॑ स्वाहा॑
ना॒रा॒श॒सी॒भ्यः॑ स्वाहा॑ रै॒भी॒भ्यः॑ स्वाहा॑ () सर्व॑स्मै स्वाहा॑ ॥ 34

(सँव॒र्षते॑ – रै॒भी॒भ्यः॑ स्वाहा॑ – द्वे च॑) (A11)

TS 7.5.12.1

द॒त्व॒ते स्वाहा॑ ऽद॒न्त॒काय॑ स्वाहा॑ प्रा॒णि॒ने स्वाहा॑ प्रा॒णाय॑ स्वाहा॑
मु॒ख॒व॒ते स्वाहा॑ ऽमु॒खाय॑ स्वाहा॑ ना॒सि॒क॒व॒ते स्वाहा॑ ऽना॒सि॒काय॑ स्वाहा॑
ऽक्ष॒ण्व॒ते स्वाहा॑ ऽन॒क्षि॒काय॑ स्वाहा॑ क॒र्णि॒ने स्वाहा॑ ऽक॒र्ण॒काय॑ स्वाहा॑

शीर्॒ष॒ण्व॒ते॒ स्वा॒हाऽशी॒र्ष॒काय॒ स्वा॒हा प॒द्व॒ते॒ स्वा॒हा ऽपा॒द॒काय॒ स्वा॒हा
प्रा॒ण॒ते॒ स्वा॒हा ऽप्रा॒ण॒ते॒ स्वा॒हा व॒द॒ते॒ स्वा॒हा ऽव॒द॒ते॒ स्वा॒हा प॒श्य॒ते॒
स्वा॒हा ऽप॒श्य॒ते॒ स्वा॒हा शृ॒ण्व॒ते॒ स्वा॒हा ऽशृ॒ण्व॒ते॒ स्वा॒हा म॒न॒स्वि॒ने॒
स्वा॒हा – [] 35

TS 7.5.12.2

ऽम॒न॒से॒ स्वा॒हा रे॒त॒स्वि॒ने॒ स्वा॒हा ऽरे॒त॒स्काय॒ स्वा॒हा प्र॒जा॒भ्यः॒ स्वा॒हा
प्र॒ज॒न॒नाय॒ स्वा॒हा लो॒म॒व॒ते॒ स्वा॒हा ऽलो॒म॒काय॒ स्वा॒हा त्व॒चे॒ स्वा॒हा
ऽत्व॒क्काय॒ स्वा॒हा च॒र्म॒ण्व॒ते॒ स्वा॒हा ऽच॒र्म॒काय॒ स्वा॒हा लो॒हि॒त॒व॒ते॒
स्वा॒हाऽलो॒हि॒ताय॒ स्वा॒हा मा॒ञ् स॒न्व॒ते॒ स्वा॒हा ऽमा॒ञ् स॒काय॒ स्वा॒हा
स्ना॒व॒भ्यः॒ स्वा॒हा ऽस्ना॒व॒काय॒ स्वा॒हा स्थ॒न्व॒ते॒ स्वा॒हाऽन॒स्थि॒काय॒
स्वा॒हा म॒ज्ज॒न्व॒ते॒ स्वा॒हा ऽम॒ज्ज॒काय॒ स्वा॒हा ऽङ्गि॒ने॒ स्वा॒हाऽन॒ङ्गाय॒
स्वा॒हा ऽऽत्म॒ने॒ स्वा॒हा ऽना॒त्म॒ने॒ स्वा॒हा () स॒र्व॒स्मै॒ स्वा॒हा ॥ 36

(म॒न॒स्वि॒ने॒ स्वा॒हा – ऽना॒त्म॒ने॒ स्वा॒हा – द्वे च॑) (A12)

TS 7.5.13.1

क॒स्त्वा यु॒नक्ति॒ स त्वा यु॒नक्तु॒ विष्णु॑स्त्वा यु॒नक्त्व॒स्य य॒ज्ञस्य॑द्ध्यै
म॒ह्यञ् स॒न्न॒त्या अ॒मुष्मै॒ का॒मा॒याऽऽ*यु॒षे त्वा प्रा॒णाय॑ त्वा ऽपा॒नाय॑

त्वा व्या॒नाय॑ त्वा व्यु॒ष्ट्यै॑ त्वा र॒य्यै॑ त्वा रा॒धसे॑ त्वा घो॒षाय॑ त्वा पो॒षाय॑
त्वा ऽऽरा॒द्घो॒षाय॑ त्वा प्र॒च्युत्यै॑ त्वा ॥ 37

(क॒स्त्वा - ऽष्टा॒त्रिं॒शत्) (A13)

TS 7.5.14.1

अ॒ग्नये॑ गा॒यत्राय॑ त्रि॒वृते॑ रा॒थन्त॑राय वा॒सन्ता॒या-ष्टा॑क॒पाल
इन्द्रा॒य त्रै॒ष्टुभा॑य पञ्च॒दशाय॑ बा॒र्हता॑य ग्री॒ष्मायै॑का॒दश॑क॒पालो
वि॒श्वेभ्यो॑ दे॒वेभ्यो॑ जा॒गते॑भ्यः स॒प्तद॑शेभ्यो वै॒रूपे॑भ्यो वा॒र्षिके॑भ्यो
द्वा॒दश॑क॒पालो मि॒त्राव॑रुणाभ्या-मा॒नुष्टु॑भाभ्या-मे॒कवि॒ंशाभ्यां॑
वै॒राजा॑भ्यां शार॒दाभ्यां॑ प॒यस्या॑ बृ॒हस्प॑तये पा॒ङ्गाय॑ त्रि॒णवा॑य
शा॒क्वरा॑य है॒मन्ति॑काय च॒रुः स॒वित्र॑ आ॒तिच्छ॑न्द॒साय॑ त्रय॒स्त्रिं॒शाय॑
रै॒वता॑य शै॒शिरा॑य द्वा॒दश॑क॒पालो ऽदि॒त्यै वि॒ष्णुप॑त्यै च॒रुर॑ग्नये
वै॒श्वान॑राय द्वा॒दश॑क॒पालो ऽनु॑म॒त्यै च॒रुः का॒य ए॒कक॑पालः ॥ 38

(अ॒ग्नये॑ऽदि॒त्या अ॒नुम॑त्यै - स॒प्तच॑त्वा॒रिं॒शत्) (A14)

TS 7.5.15.1

यो वा अ॒ग्नाव॒ग्निः प्र॑हि॒यते॒ यश्च॒ सोमो॒ राजा॒ तयो॑रेष आ॒ति॒थ्यं
 य॑द॒ग्नी॒षोमी॑योऽथै॒ष रु॒द्रो यश्ची॑यते॒ यथ् संचि॑तेऽग्नावे॒तानि॑
 ह॒वी॒ष्णि न॒ निर्व॑पे॒देष॒ एव॒ रु॒द्रोऽशान्त॑ उपो॒त्थाय॑ प्र॒जां प॒शून्
 यज॑मानस्या॒भि म॑न्येत॒ यथ् संचि॑तेऽग्नावे॒तानि॑ ह॒वी॒ष्णि निर्व॑पति
 भा॒ग॒धेये॑नै॒वैन॑श्च॒ शम॑यति॒ नास्य॑ रु॒द्रोऽशान्त॑ - [] 39

TS 7.5.15.2

उपो॒त्थाय॑ प्र॒जां प॒शून्भि॑ म॒न्यते॒ दश॑ ह॒वी॒ष्णि भव॑न्ति न॒व वै पु॑रु॒षे
 प्रा॒णा नाभि॑र्द॒शमी॑ प्रा॒णाने॒व यज॑माने दधा॒त्यथो॒ दशा॑क्षरा वि॒राडन्नं॑
 वि॒राड् वि॒राज्ये॒वान्नाद्ये॒ प्रति॑ तिष्ठत्य॒तुभिर्वा॑ ए॒ष छन्दो॑भिः स्तो॒मैः
 पृ॒ष्ठैश्चे॑त॒व्य इ॒त्याहु॑र्यदे॒तानि॑ ह॒वी॒ष्णि निर्व॑पत्य॒तुभिरे॒वैनं॑
 छन्दो॑भिः स्तो॒मैः पृ॒ष्ठैश्चि॑नुते दि॒शः सु॑षुवा॒णेना॑ - [] 40

TS 7.5.15.3

-भि॒जित्या॑ इ॒त्याहु॑र्यदे॒तानि॑ ह॒वी॒ष्णि निर्व॑पति दि॒शाम॑भिजित्या॒ एतया॑
 वा इन्द्रं॑ दे॒वा अ॒याज॑यन् तस्मादिन्द्र॒सव॑ ए॒तया॑ म॒नुं म॒नुष्या॑स्तस्मान्-
 म॒नु॒स॒वो यथेन्द्रो॑ दे॒वानां॑ यथा॒ म॒नुर्म॑नुष्या॒णामे॒वं भव॑ति य ए॒वं

वि॒द्वाने॒तये॒ष्ट्या॒ यज॑ते दि॒ग्वतीः॑ पु॒रोऽनु॒वाक्या॑ भवन्ति॒ सर्वा॑सां
दि॒शाम॒भिजि॑त्यै ॥ 41

॥
(अ॒शान्तः॑ – सु॒षुवा॒णेनै॑ – क॒चत्वा॒रि॒ञ्शच्च॑) (A15)

TS 7.5.16.1

यः प्रा॒णतो॑ नि॒मिष॑तो म॒हित्वै॑क इ॒द्राजा॑ जग॒तो ब॒भूव॑ ।
य ई॒शे अ॒स्य द्वि॒पद॑श्चतु॒ष्पदः॑ कस्मै॑ दे॒वाय॑ ह॒विषा॑ वि॒धेम ॥
उप॒याम॑गृहीतोऽसि प्र॒जाप॑तये त्वा जु॒ष्टं गृ॒ह्णामि॑ तस्य॑ ते द्यौर्म॒हिमा॑
नक्ष॑त्राणि रू॒पमा॑दित्यस्ते तेज॒स्तस्मै॑ त्वा म॒हिम्ने॑ प्र॒जाप॑तये स्वाहा ॥ 42

॥
(यः प्रा॒णतो॑ द्यौर्ादित्यो॑ – ऽष्टा॒त्रि॒ञ्शत्) (A16)

TS 7.5.17.1

य आ॒त्मदा॑ ब॒लदा॑ यस्य॒ विश्व॑ उपा॒सते॑ प्र॒शिषं॑ य॒स्य दे॒वाः ।
यस्य॑ छा॒याऽमृतं॑ य॒स्य मृ॒त्युः कस्मै॑ दे॒वाय॑ ह॒विषा॑ वि॒धेम ॥
उप॒याम॑गृहीतोऽसि प्र॒जाप॑तये त्वा जु॒ष्टं गृ॒ह्णामि॑ तस्य॑ ते पृथि॒वी
म॒हिमौष॑धयो वन॒स्पत॑यो रू॒पम॑ग्निस्ते तेज॒स्तस्मै॑ त्वा म॒हिम्ने॑
प्र॒जाप॑तये स्वाहा ॥ 43

(य आ॒त्म॒दाः पृ॒थि॒व्य॒ग्नि॒-रे॒का॒न्न॒च॒त्वा॒रि॒ॽशत्) (A17)

TS 7.5.18.1

आ ब्र॒ह्मन् ब्रा॒ह्म॒णो ब्र॒ह्म॒वर्च॒सी जा॒यता॒मा ऽस्मिन् रा॒ष्ट्रे रा॒ज॒न्य
इ॒ष॒व्यः शू॒रो म॒हा॒रथो जा॒यतां दो॒ग्ध्री॒धे॒नु॒र्वो॒ढा ऽन॒ड्वा॒ना॒शुः
स॒प्तिः पु॒रन्धि॒र्योषा जि॒ष्णू रथे॒ष्टाः स॒भेयो यु॒वा ऽऽस्य यज॑मानस्य
वी॒रो जा॒यतां नि॒का॒मे॒नि॒का॒मे नः प॒र्जन्यो व॒र्ष॒तु फ॒लि॒न्यो न
ओष॑धयः पच्यन्तां यो॒गक्षे॒मो॒नः क॒ल्प॒तां ॥ 44

(आ ब्र॒ह्म - त्रे॒क॒च॒त्वा॒रि॒ॽशत्) (A18)

TS 7.5.19.1

आ॒ऽक्रान् वा॒जी पृ॒थि॒वी॒म॒ग्निं यु॒ज॒म॒कृत॑ वा॒ज्य॒र्वा ऽऽक्रान् वा॒ज्य॒न्त॒रि॒क्षं
वा॒युं यु॒ज॒म॒कृत॑ वा॒ज्य॒र्वा द्यां वा॒ज्या॒ऽक्र॒ॽस्त॒ सूर्यं यु॒ज॒म॒कृत॑
वा॒ज्य॒र्वा ऽग्नि॒स्ते वा॒जिन् यु॒ङ्ङ॒न् त्वा ऽऽ र॒भे स्व॒स्ति मा सं पा॒रय॑
वा॒युस्ते वा॒जिन् यु॒ङ्ङ॒न् त्वा ऽऽ र॒भे स्व॒स्ति मा सं - [] 45

TS 7.5.19.2

पा॒रया ऽऽदि॒त्यस्ते वा॒जिन् यु॒ङ्ङ॒न् त्वा ऽऽ र॒भे स्व॒स्ति मा सं पा॒रय॑
प्रा॒ण॒धृ॒ग॒सि प्रा॒णं मे दृ॒ह॒ व्यान॒धृ॒ग॒सि व्यानं मे दृ॒ह॒

ऽपान॑धृ॒गस्य॑पानं॑ मे दृ॒ह चक्षु॑रसि॒ चक्षु॑र्मयि॒ धेहि॑ श्रोत्र॑मसि॒ श्रोत्रं॑
मयि॑ धे॒ह्यायु॑रस्यायु॒र्मयि॑ धेहि ॥ 46

(वा॒युस्ते॑ वा॒जिन् यु॒ङ्ङनु॑ त्वा ऽऽ र॑भे स्व॒स्ति मा सं -
त्रि॑च॒त्वारि॑श॒च्च) (A19)

TS 7.5.20.1

ज॒ज्ञि बी॒जं व॑र्षा प॒र्जन्यः॑ प॒क्ता स॒स्य॑ सु॒पिप्प॒ला ओष॑धयः
स्व॒धिच॒रणेय॑ सु॒पस॒दनो॑ऽग्निः स्व॒द्ध्यक्ष॑मन्तरि॒क्ष सु॒पावः॑ प॒वमानः॑
सू॒पस्था॒ना द्यौः शि॒वम॒सौ तप॑न् यथापूर्व॑महो॒रात्रे प॑ञ्चद॒शिनो॑
ऽर्ध॑मा॒सा-स्त्रि॑शिनो॒ मासाः॑ क्लृ॒प्ता ऋ॒तवः॑ शान्तः
स॒व॒त्सरः॑ ॥ 47

(ज॒ज्ञि बी॒ज - मे॑क॒त्रि॑श॒त्) (A20)

TS 7.5.21.1

आ॒ग्नेयो॑ऽष्टाक॒पालः॑ सौ॒म्यश्च॒रुः सा॒वि॒त्रोऽष्टा॑क॒पालः॑ पौ॒ष्णश्च॒रुः
रौ॒द्रश्च॒रुर्ग॒नये॑ वै॒श्वान॒राय॑ द्वा॒दश॑क॒पालो॑ मृ॒गाख॒रे य॒दि

नाऽऽ*गच्छे-द॒ग्नये-ऽ॒होमु॒चे-ऽष्टा॑कपालः सौ॒र्यं पयो॑ वा॒यव्य॑

आज्यभागः ॥ 48

(आ॒ग्नेय - श्रु॒र्वि॒शतिः) (A21)

TS 7.5.22.1

अ॒ग्नये-ऽ॒होमु॒चे-ऽष्टा॑कपाल इन्द्रा॒याऽ॒होमु॒च एका॑दशकपालो
मि॒त्रावरु॑णाभ्या-मा॒गोमु॒ग्भ्यां प॒यस्या॑ वा॒योसा॒वित्र आ॑गोमु॒ग्भ्यां
च॒रुर॒श्चिभ्या॑-मा॒गोमु॒ग्भ्यां धा॒ना म॒रुद्भ्य॑ ए॒नोमु॒ग्भ्यः स॒प्तक॑पालो
वि॒श्वेभ्यो॑ दे॒वेभ्य॑ ए॒नोमु॒ग्भ्यो द्वा॑दशकपालो ऽनु॒मत्यै॑ च॒रुर॒ग्नये॑
वै॒श्वान॒राय॑ द्वा॑दशकपालो द्या॒वापृ॑थि॒वीभ्या॑-म॒होमु॒ग्भ्यां

द्विकपालः ॥ 49

(अ॒ग्नयेऽ॒होमु॒चे - त्रि॒शत्) (A22)

TS 7.5.23.1

अ॒ग्नये॑ स॒मन॑मत् पृ॒थिव्यै॑ स॒मन॑मद्यथाऽग्निः पृ॒थिव्या॑ स॒मन॑मदे॒वं
म॒ह्यं भ॒द्राः सं॑न॒तयः॑ सं न॑मन्तु वा॒यवे॑ स॒मन॑मदन्तरिक्षाय स॒मन॑मद्यथा
वा॒युर॒न्तरि॑क्षेण सूर्या॒य स॒मन॑मद्वि॒वे स॒मन॑मद्यथा सूर्यो॑ दि॒वा च॒न्द्रम॑से

समनमन्नक्षत्रेभ्यः समनमद्यथा चन्द्रमा नक्षत्रैर्वरुणाय

समनमदद्भ्यः समनमद्यथा – [] 50

TS 7.5.23.2

वरुणोऽद्भिः साम्ने समनमदृचे समनमद्यथा सामर्चा ब्रह्मणे
समनमत् क्षत्राय समनमद्यथा ब्रह्म क्षत्रेण राज्ञे समनमद्-विशे
समनमद्यथा राजा विशा रथायः समनमदश्चैभ्यः समनमद्यथा
रथोऽश्चैः प्रजापतये समनमद्-भूतेभ्यः समनमद्यथा प्रजापतिर्भूतैः
समनमदेवं मह्यं () भद्राः संनतयः सं नमन्तु ॥ 51

(अद्भ्यः समनमद्यथा-मह्यं-चत्वारि च) (A23)

TS 7.5.24.1

ये ते पन्थानः सवितः पूर्व्यासोऽरेणवो वितता अन्तरिक्षे ।
तेभिर्नो अद्य पथिभिः सुगेभी रक्षा च नो अधि च देव ब्रूहि ॥
नमोऽग्नये पृथिविक्षिते लोकस्पृते लोकमस्मै यजमानाय देहि
नमो वायवेऽन्तरिक्षक्षिते लोकस्पृते लोकमस्मै यजमानाय देहि
नमः सूर्याय दिविक्षिते लोकस्पृते लोकमस्मै यजमानाय देहि ॥ 52

(ये ते – चतुश्चत्वारिंशत्) (A24)

TS 7.5.25.1

यो वा अश्वस्य मेद्ध्यस्य शिरो वेद शीर्षण्वान् मेद्ध्यो
भवत्युषा वा अश्वस्य मेद्ध्यस्य शिरः सूर्यश्चक्षुर्वातः प्राणश्चन्द्रमाः
श्रोत्रं दिशः पादा अवान्तरदिशाः पर्शवोऽहोरात्रे निमेषोऽर्धमासाः
पर्वाणि मासाः संधानान्यृतवोऽङ्गानि सँवत्सर आत्मा रश्मयः केशा
नक्षत्राणि रूपं तारका अस्थानि नभो माँसान्योषधयो
लोमानि वनस्पतयो वाला अग्निमुखं वैश्वानरो व्यात्त - [] 53

TS 7.5.25.2

समुद्र उदरमन्तरिक्षं पायु-र्धावापृथिवी आण्डौ ग्रावा शेषः
सोमो रेतो यज्जञ्जभ्यते तद्वि द्योतते यद्विधूनुते तथ् स्तनयति
यन्मेहति तद्वर्षति वागेवास्य वागहर्वा अश्वस्य जायमानस्य महिमा
पुरस्ताज्जायते रात्रिरेनं महिमा पश्चादनु जायत एतौ वै महिमाना-
वश्चमभितः सं बभूवतुर्हयो देवानवह () दर्वाँसुरान् वाजी
गन्धर्वानश्चोमनुष्यान्थ् समुद्रो वा अश्वस्य योनिः समुद्रो बन्धुः ॥ 54

(व्यात्त – मवहद् – द्वादश च) (A25)

Prasna Korvai with starting Padams of 1 to 25 Anuvaakams :-

(गा॒वो – गा॒वः॑ सि॒षा॒सन्तीः॑ – प्र॒थ॒मे मा॒सि॑ – स॒मा॒न्यो॑ – य॒दि
सो॒मो – ष॒ड॒है – रु॒थ् सृ॒ज्या॑(३)न् – दे॒वा॒ना – म॒र्क्ये॑ण – च॒र्मा॒ऽव
– पृ॒थि॒व्यै – द॒त्व॒ते – क॒स्त्वा – ऽग्नये॑ – यो वै – यः प्रा॒ण॒तो –
य आ॒त्म॒दा – आ ब्र॒ह्म – त्रा॒ऽक्रान् – ज॒ज्ञि बी॒ज –
मा॒ग्ने॒यो॒ऽष्टा॑क॒पालो॑ – ऽग्नये॑ऽहो॒मु॒चे॒ऽष्टा॑क॒पालो॑ – ऽग्नये॑स॒म॒न॒म॒द्
– ये ते प॒न्था॒नो – यो वा अ॒श्व॒स्य॒मे॒द्ध्य॒स्य शि॒रः –
पञ्च॑विं॒शतिः॑)

Korvai with starting Padams of 1, 11, 21 Series of Panchaatis :-

(गा॒वः – स॒मा॒न्यः – स॒व॒न॒म॒ष्टा॒भि – वा ए॒ते दे॒व॒कृ॒त॒ञ्चा –
ऽभि॒जि॒त्या इ॒त्याहु॑ – र्व॒रु॒णो॒ऽद्भिः॑ सा॒म्ने – च॒तु॒ष् पञ्चा॒सत्)

First and Last Padam of fifth Prasnam of 7th Kandam :-

(गा॒वः – स॒मु॒द्रो ब॒न्धुः)

Kaanda Korvai with starting Padams of all 5 Prasnamams of Kandam 7

प्र॒ज॒न॒न् – सा॒द्याः – प्र॒ज॒वं – बृ॒ह॒स्प॒ति – गा॒वः – पञ्च॑

Samhita Korvai with starting Padams of all Seven Kandams

इ॒षे – वा॒य॒व्यं – प्र॒जा॒प॒ति- यु॒ञ्जा॒नाः – सा॒वि॒त्राणि –
प्रा॒ची॒न॒व॒शो – प्र॒ज॒न॒ - स॒प्त

॥ हरिः ओं ॥

॥ कृष्ण यजुर्वेदीय तैत्तिरीय संहितायां सप्तमकाण्डे पञ्चमः प्रश्नः समाप्तः ॥

॥ इति सप्तमं काण्डं ॥

॥ इति तैत्तिरीयसंहिता समाप्ता ॥

Details of Anuvakam, Panchati and Padam for Kandam 7

	Anuvakam	Panchati	Padams
Prasna 1	20	52	2635
Prasna 2	20	50	2330
Prasna 3	20	42	2123
Prasna 4	22	53	2621
Prasna 5	25	54	2631
Total	107	251	12340